

D.R. 12/2005

**RANG UNDANG-UNDANG SYARIKAT KAPAL LAYAR
ANTARABANGSA LANGKAWI 2005**

SUSUNAN FASAL

BAHAGIAN I

PERMULAAN

Fasal

1. Tajuk ringkas dan permulaan kuat kuasa
2. Tafsiran
3. Takrif subsidiari dan syarikat pemegangan
4. Syarikat berkaitan
5. Ketidakpakaian Akta Syarikat 1965
6. Tujuan dan aktiviti yang dibenarkan dan dilarang bagi syarikat Langkawi

BAHAGIAN II

PENTADBIRAN AKTA

7. Pendaftar Syarikat
8. Kuasa untuk memperoleh maklumat
9. Kuasa untuk menjalankan pemeriksaan
10. Kuasa untuk menjalankan penyiasatan
11. Kuasa untuk memeriksa orang
12. Penyerahan atau pemfailan dokumen dengan Pendaftar
13. Penyerahan atau pemfailan dokumen secara elektronik
14. Nilai keterangan dokumen yang diserahkan atau difailkan secara elektronik
15. Salinan asal disimpan di pejabat entiti pengurusan
16. Juruaudit yang diluluskan
17. Juruaudit syarikat
18. Pelikuidasi yang diluluskan
19. Daftar

Rang Undang-Undang

BAHAGIAN III

PENUBUHAN SYARIKAT

PBNGGAL 1

PEMERBADANAN

Fasal

20. Pembentukan syarikat
21. Pendaftaran dan pemerbadanan
22. Permohonan bagi pendaftaran syarikat asing sebagai terus wujud di Langkawi
23. Kelulusan terdahulu pada prinsipnya
24. Kehendak mengenai memorandum

PENCGAL 2

STATUS DAN NAMA

25. Kuasa syarikat
26. Transaksi *ultra vires*
27. Nama syarikat Langkawi
28. Pertukaran nama
29. Perkara persatuan
30. Perubahan memorandum atau perkara persatuan
31. Salinan memorandum dan perkara persatuan
32. Transaksi dan penubuhan cawangan
33. Larangan terhadap menjalankan perniagaan apabila syarikat Langkawi tidak ada anggota

BAHAGIAN IV

SYER DAN GADAIAN

PEMGGAL 1

SYER

34. Penyata pengumpulan
35. Panggilan
36. Liabiliti rizab
37. Akaun premium syer
38. Kuasa untuk menerbitkan syer dan hak pengundian

Fasal

39. Syarikat Langkawi berurus niaga dalam syer sendiri, dsb.
40. Pengkenselan syer perolehan semula oleh syarikat Langkawi
41. Menerbitkan syer dengan diskaun
42. Perubahan modal syer
43. Pengesahan syer yang diterbitkan dengan tidak sepatutnya
44. Ketetapan khas bagi pengurangan modal syer
45. Hak pemegang syer keutamaan hendaklah dinyatakan dalam perkara persatuan
46. Syer keutamaan boleh tebus
47. Sekatan terhadap mempelawa pelaburan daripada awam

PENGGAL 2

HAKMILIK DAN PEMINDAHAN

48. Jenis syer
49. Penomboran syer
50. Perakuan hendaklah menjadi keterangan hakmilik
51. Syarikat Langkawi boleh mempunyai meterai syer
52. Surat cara pemindahan hakmilik dan pemindahan hakmilik oleh wakil diri
53. Kewajipan syarikat Langkawi berkenaan dengan pengeluaran perakuan

PENGGAL 3

DAFTAR GADAIAN

54. Ketidapkakaian Penggal
55. Daftar gadaian

BAHAGIAN V

PHNGURUSAN DAN PENTADBIRAN

PENGGAL 1

PEJABAT DAN NAMA

56. Pejabat berdaftar syarikat Langkawi
57. Nama hendaklah dipamerkan di semua pejabat dan terdapat pada meterai, surat, dsb.

Rang Undang'Undang

Pf.NGGAL2

PENGARAH DAN PEGAWAI

Fasal

58. Pengarah
59. Persetujuan untuk bertindak sebagai pengarah
60. Kesahan tindakan pengarah
61. Kuasa Pendaftar untuk menghalang orang daripada menguruskan syarikat Langkawi
62. Penzahiran kepentingan dalam kontrak, harta, jawatan, dsb.
63. Kewajipan dan liabiliti pegawai
64. Setiausaha
65. Daftar pengarah dan pegawai
66. Kesalahan terhadap mana-mana peruntukan Akta ini yang dilakukan oleh pengarah dan setiausaha

PENGOAL 3

MESYUARAT DAN PROSIDING

67. Mesyuarat anggota
68. Notis mesyuarat anggota
69. Kuorum, pengerusi, pengundian, dsb., dalam mesyuarat
70. Pengundian oleh anggota
71. Tindakan melalui persetujuan secara bertulis anggota
72. Kuasa Mahkamah untuk memerintahkan mesyuarat dipanggil
73. Ketetapan khas
74. Penyerahan salinan ketetapan dan perjanjian tertentu
75. Minit prosiding

PENGGAL 4 DAFTAR

ANGGOTA

76. Daftar anggota
77. Tempat daftar disimpan
78. Akibat keingkaran oleh ejen
79. Kuasa Mahkamah untuk membetulkan daftar

PENGGAL 5

PENYATA SYARIKAT

Fasal

80. Penyata syarikat Langkawi

BAHAGIAN VI

AKAUN DAN AUDIT

PENGGAL 1

AKAUN

81. Akaun yang perlu disimpan
82. Akaun hendaklah dibentangkan di hadapan mesyuarat
83. Akaun dihantar kepada anggota

PENGGAL 2

AUDIT

84. Juruaudit hendaklah diantik
85. Juruaudit tidak diperlukan dalam keadaan tertentu
86. Pemberhentian dan peletakan jawatan juruaudit
87. Saraan juruaudit
88. Juruaudit boleh menghadiri mesyuarat
89. Hak dan kewajipan juruaudit

BAHAGIAN VII

PERKIRAAN DAN PEMBENTUKAN SEMULA

90. Perkiraan
91. Peraturan-peraturan berkenaan dengan pengambilalihan dan percantuman

BAHAGIAN VIII

SYARIKAT LANGKAWI ASING

92. Pemakaian dan tafsiran
93. Pendaftaran syarikat Langkawi asing
94. Larangan dan sekatan ke atas syarikat Langkawi asing
95. Pejabat berdaftar syarikat Langkawi asing

Fasal

96. Penyata hendakiah diserahkan apabila dokumen, dsb., diubah
97. Penyampaian ke atas syarikat Langkawi asing
98. Pemberhentian perniagaan di Langkawi
99. Pelikuidasian atau pembubaran syarikat Langkawi asing di tempat pemerbadanannya atau tempat asalnya
100. Nama syarikat Langkawi asing
101. Penyata syarikat Langkawi asing

BAHAGIAN IX

ENTITI PENGURUSAN

102. Pemberikuasaan entiti pengurusan
103. Pembatalan pemberikuasaan

BAHAGIAN X

PELBAGAI

104. Penerimaan dan penggulangan
105. Penyampaian dokumen ke atas syarikat Langkawi
106. Pemindahan hakmilik dari Langkawi
107. Kos prosiding di hadapan Mahkamah
108. Jaminan untuk kos
109. Pelupusan syer pemegang syer yang tidak diketahui di mana berada
110. Kuasa untuk memberi relief
111. Luar aturan dalam prosiding
112. Terjemahan surat cara
113. Dividen kena dibayar daripada keuntungan sahaja
114. Penggunaan perkataan "Corporation", dsb.
115. Penalti am
116. Penalti ingkar
117. Pendakwaan
118. Pengkompaunan kesalahan
119. Tatacara jika tidak dinyatakan
120. Peraturan-peraturan
121. Larangan oleh Menteri

Syarikat Kapal Layar Antarabangsa Langkawi

Fasal

122. Kerahsiaan
123. Kuasa pengecualian
124. Fi, penalti dan pembatalan
125. Syarikat yang dibatalkan bertanggung untuk fi, dsb.
126. Fi yang kena dibayar kepada Pendaftar
127. Kesan pembatalan

JADUAL

RANG UNDANG-UNDANG

b e r n a m a

Suatu Akta bagi mengadakan peruntukan mengenai pemerbadanan, pendaftaran dan pentadbiran syarikat kapal layar antarabangsa di Langkawi dan mengenai perkara-perkara yang berkaitan dengannya.

DIPERBUAT oleh Parlimen Malaysia seperti yang berikut:

BAHAGIAN I

PERMULAAN

Tajuk ringkas dan permulaan kuat kuasa

1. (1) Akta ini bolehlah dinamakan Akta Syarikat Kapal Layar Antarabangsa Langkawi 2005.

(2) Akta ini mula berkuat kuasa pada tarikh yang ditetapkan oleh Menteri melalui pemberitahuan dalam *Warta*.

Tafsiran

2. (1) Dalam Akta ini, melainkan jika konteksnya menghendaki makna yang lain —

"aktiviti yang berhubungan dengan kapal layar" ertinya pemunyaan kapal layar, pemunyaan pesawat udara (terutamanya helikopter) yang dibawa di atas sesuatu kapal layar, pengurusan kapal layar, pengambilan anak kapal dalam kapal layar dan latihannya, pencarteran

kapal layar, pembrokeran kapal layar atau selainnya pemasaran, pembekalan dan perkhidmatan kapal layar, keselamatan kapal layar, aktiviti kemudahan atau rekreasi atau percutian yang berhubungan dengan kapal layar, atau apa-apa perniagaan lain yang berhubungan dengan kapal layar dan pelayaran sebagaimana yang ditentukan oleh Pendaftar;

"buku" termasuklah apa-apa daftar atau rekod maklumat yang lain dan apa-apa akaun atau rekod perakaunan, tidak kira bagaimana sekalipun ia disusun, direkodkan atau disimpan, dan juga termasuk apa-apa dokumen;

"bulan" ertinya suatu tempoh selama tiga puluh hari;

"debentur" ertinya apa-apa sekuriti bagi sesuatu perbadanan berhubung dengan sesuatu gadaian ke atas aset perbadanan itu;

"dicetak" termasuklah ditaip atau dilitograf atau dikeluarkan semula dengan apa-apa cara mekanikal;

"diperakui" ertinya diperakui mengikut cara yang ditetapkan sebagai suatu dokumen tertentu atau sebagai suatu salinan benar dokumen itu;

"diserahkan" ertinya diserahkan mengikut peruntukan Akta ini;

"ditetapkan" ertinya ditetapkan oleh atau di bawah Akta ini;

"dokumen" termasuklah saman, perintah dan proses undang-undang lain, serta notis dan daftar;

"dolar" ertinya suatu unit dolar dalam mata wang Amerika Syarikat;

"entiti pengurusan" ertinya perbadanan yang diberi kuasa oleh Menteri untuk bertindak bagi pihak sesuatu syarikat Langkawi atau syarikat Langkawi asing di bawah seksyen 102 Akta ini;

"gadaian" termasuklah suatu gadai janji dan apa-apa perjanjian bagi memberi atau menyempurnakan suatu gadaian atau gadai janji sama ada atas tuntutan atau selainnya;

"juruaudit yang diluluskan" ertinya seseorang yang diluluskan di bawah subseksyen 16(1);

"Langkawi" ertinya Pulau Langkawi dan semua pulau yang bersebelahan yang lebih hampir kepada Pulau Langkawi daripada tanah besar;

"Mahkamah" ertinya Mahkamah Tinggi atau seseorang hakim Mahkamah Tinggi;

"memorandum", berhubung dengan sesuatu syarikat Langkawi, ertinya memorandum persatuan syarikat itu yang sedang berkuat kuasa, dan berhubung dengan sesuatu syarikat Langkawi asing, ertinya piagam, statut, memorandum persatuan atau surat cara yang menjadi atau menentukan perlembagaan syarikat itu;

"Menteri" ertinya Menteri yang dipertanggungjawabkan dengan tanggungjawab bagi perdagangan dalam negeri dan hal ehwal pengguna;

"modal syer terbitan", berhubung dengan syer nilai tara, ertinya, pada bila-bila masa tertentu, jumlah nilai tara semua syer suatu syarikat Langkawi yang telah diterbitkan;

"orang" termasuklah sesuatu perbadanan, perkongsian, kumpulan orang dan perbadanan seorang;

"pakar" ertinya seorang jurutera, penilai, akauntan, juruaudit dan mana-mana orang lain yang profesion atau reputasinya memberi autoriti kepada sesuatu pernyataan yang dibuat olehnya;

"pegawai", berhubung dengan sesuatu syarikat Langkawi atau syarikat Langkawi asing, termasuklah—

- (a) mana-mana pengarah, setiausaha atau orang lain yang dilantik di bawah suatu resolusi pengarah untuk memegang suatu jawatan yang dinyatakan;
- (b) mana-mana penerima dan pengurus mana-mana bahagian perusahaan syarikat itu yang dilantik di bawah suatu kuasa yang terkandung dalam mana-mana surat cara; dan
- (c) mana-mana pelikuidasi syarikat itu yang dilantik dalam suatu penggulungan sukarela;

tetapi tidaklah termasuk —

- (d) mana-mana penerima yang juga bukannya seorang pengurus;

- (e) mana-mana penerima dan pengurus yang dilantik oleh Mahkamah; atau
- (f) mana-mana pelikuidasi yang dilantik oleh Mahkamah atau oleh pemiutang;

"pelikuidasi yang diluluskan" ertinya seseorang yang diluluskan di bawah subseksyen 18(1);

"pemastautin" ertinya—

- (a) berhubung dengan orang sebenar, seorang warganegara atau pemastautin tetap Malaysia; atau
- (b) berhubung dengan mana-mana orang lain, seorang yang telah menubuhkan suatu tempat perniagaan dan mengendalikan perniagaannya di Malaysia,

dan termasuklah seseorang yang diisytiharkan sebagai pemastautin menurut seksyen 43 Akta Kawalan Pertukaran Wang 1953 [*Akta 17*];

"penaja", berhubung dengan sesuatu prospektus yang dikeluarkan oleh atau yang berkaitan dengan suatu syarikat Langkawi, ertinya seorang penaja syarikat itu yang menjadi suatu pihak dalam penyediaan prospektus atau mana-mana bahagian prospektus itu yang berkaitan, tetapi tidak termasuk mana-mana orang yang bertindak hanya oleh sebab atas sifat profesionalnya atau atas sifatnya sebagai penasihat;

"pencarum", berhubung dengan sesuatu syarikat Langkawi, ertinya seseorang yang bertanggung untuk mencarum kepada aset syarikat itu sekiranya syarikat itu digulungkan, dan termasuklah pemegang syer berbayar penuh dalam syarikat itu dan, sebelum penentuan muktamad orang yang menjadi pencarum, termasuklah mana-mana orang yang dikatakan sebagai seorang pencarum;

"Pendaftar" ertinya Pendaftar Syarikat di bawah Akta Syarikat 1965 [*Akta 125*], dan termasuklah mana-mana Pendaftar Rantau, Timbalan Pendaftar atau Penolong Pendaftar Syarikat;

"pengarah" ertinya mana-mana orang, tidak kira dengan apa jua namanya disebut, yang memegang jawatan pengarah sesuatu syarikat Langkawi atau syarikat Langkawi asing, dan termasuklah seseorang yang mengikut arahan atau petunjuknya pengarah syarikat sedemikian biasanya bertindak dan seorang pengarah gilir atau ganti;

"peraturan-peraturan" ertinya peraturan-peraturan yang dibuat di bawah Akta ini;

"perbadanan" ertinya sesuatu syarikat Langkawi, syarikat Langkawi asing, syarikat domestik atau syarikat asing;

"pos" termasuklah komunikasi melalui mel, e-mel, kurier, tambang muatan, teleks atau faksimile;

"prospektus" ertinya apa-apa prospektus, notis, pekeliling, iklan atau pelawaan yang mempelawa permohonan atau tawaran daripada awam untuk melanggan atau membeli, atau yang menawarkan kepada awam untuk dilanggan atau dibeli, mana-mana syer atau mana-mana unit syer dalam sesuatu syarikat Langkawi atau syarikat Langkawi yang dicadangkan;

"syarikat asing" ertinya—

- (a) sesuatu syarikat, pertubuhan, persatuan atau badan lain yang diperbadankan di luar Malaysia; atau
- (b) sesuatu pertubuhan, persatuan atau badan lain yang tidak diperbadankan yang di bawah undang-undang tempat asalnya boleh membawa guaman atau dibawa guaman terhadapnya, atau memegang harta atas nama setiausaha atau pegawai lain pertubuhan, persatuan atau badan itu yang dilantik dengan sewajarnya bagi maksud itu, dan yang tidak mempunyai ibu pejabat atau tempat utama perniagaannya di Malaysia;

"syarikat domestik" ertinya sesuatu syarikat yang diperbadankan di bawah Akta Syarikat 1965;

"syarikat Langkawi" ertinya sesuatu syarikat yang diperbadankan di bawah Akta ini dan yang menjalankan aktiviti yang berhubungan dengan kapal layar;

"syarikat Langkawi asing" ertinya sesuatu syarikat asing yang didaftarkan di bawah Bahagian VIII;

"syer", berhubung dengan sesuatu syarikat Langkawi, ertinya suatu syer dalam modal syer syarikat itu, dan termasuklah saham;

"tarikh pembayaran fi tahunan" ertinya tarikh yang fi tahunan bagi sesuatu syarikat Langkawi hendaklah kena dibayar menurut subseksyen 21(6);

"umpuk" termasuklah jual, terbit, serah hak dan pindah hak; dan "pengumpulan" mempunyai erti yang bersamaan.

(2) Bagi maksud Akta ini, seseorang hendaklah disifatkan memegang sesuatu kepentingan benefisial dalam sesuatu syer—

- (a) jika orang itu, sama ada berseorangan atau bersama dengan orang lain, berhak (selainnya sebagai seorang pemegang amanah bagi, bagi pihak, atau oleh sebab, orang lain) untuk menerima, secara langsung atau tidak langsung, apa-apa dividen berkenaan dengan syer itu atau untuk menjalankan, atau untuk mengawal perjalanan, apa-apa hak yang berkait dengan syer itu; atau
- (b) jika orang itu, iaitu suatu perbadanan, memegang apa-apa kepentingan benefisial dalam sesuatu syer perbadanan lain yang memegang, atau yang subsidiarinya memegang, apa-apa kepentingan benefisial dalam syer yang mula-mula disebut itu.

(3) Apabila dalam Akta ini mana-mana orang yang memegang atau menduduki sesuatu jawatan atau kedudukan tertentu disebut atau dirujuk, sebutan atau rujukan itu hendaklah, melainkan jika didapati tujuan yang berlawanan, dikira termasuk semua orang yang hendaklah pada bila-bila masa selepas itu menduduki buat sementara waktu jawatan atau kedudukan itu.

(4) Mana-mana peruntukan Akta ini yang mengatasi atau mentafsirkan perkara persatuan bagi sesuatu perbadanan hendaklah, kecuali jika diperuntukkan selainnya oleh Akta ini, terpakai berhubung dengan perkara persatuan yang berkuat kuasa pada permulaan kuat kuasa Akta ini, dan juga kepada perkara persatuan yang mula berkuat kuasa selepas itu, dan hendaklah juga terpakai berhubung dengan memorandum suatu perbadanan sebagaimana ia terpakai berhubung dengan perkara persatuan perbadanan itu.

Takrif subsidiari dan syarikat pemegangan

3. (1) Bagi maksud Akta ini, sesuatu perbadanan hendaklah, tertakluk kepada peruntukan subseksyen (3), disifatkan sebagai suatu subsidiari perbadanan yang lain jika—

- (a) perbadanan yang satu lagi itu —
 - (i) mengawal keanggotaan lembaga pengarah perbadanan yang mula-mula disebut itu;

- (ii) mengawal lebih daripada setengah kuasa pengundian perbadanan yang mula-mula disebut itu; atau
 - (iii) memegang lebih daripada setengah modal syer terbitan perbadanan yang mula-mula disebut itu (tidak termasuk mana-mana bahagiannya yang tidak mempunyai apa-apa hak untuk melibatkan diri yang melebihi sesuatu amaun yang dinyatakan dalam pembahagian sama ada keuntungan atau modal); atau
- (b) perbadanan yang mula-mula disebut itu adalah suatu subsidiari mana-mana perbadanan yang menjadi subsidiari perbadanan yang satu lagi itu.
- (2) Bagi maksud subseksyen (1), keanggotaan lembaga pengarah suatu perbadanan hendaklah disifatkan dikawal oleh perbadanan yang lain jika perbadanan yang satu lagi itu, melalui penjalanan kuasa yang boleh dijalankannya tanpa keizinan atau persetujuan mana-mana orang lain, boleh melantik atau memberhentikan semua atau majoriti pengarah itu, dan bagi maksud peruntukan ini perbadanan yang satu lagi itu hendaklah disifatkan mempunyai kuasa untuk membuat pelantikan sedemikian jika—
- (a) seseorang tidak boleh dilantik sebagai seorang pengarah tanpa penjalanan kuasa sedemikian bagi faedahnya oleh perbadanan yang satu lagi itu; atau
 - (b) pelantikan seseorang sebagai seorang pengarah semestinya berikutan daripada kedudukannya sebagai pengarah atau pegawai lain perbadanan yang satu lagi itu.
- (3) Dalam menentukan sama ada sesuatu perbadanan adalah suatu subsidiari perbadanan yang lain—
- (a) apa-apa syer yang dipegang atau kuasa yang boleh dijalankan oleh perbadanan yang satu lagi itu atas sifat pemegang amanah atau fidusiari hendaklah dikira sebagai tidak dipegang atau tidak boleh dijalankan olehnya;
 - (b) tertakluk kepada perenggan (c) dan (d), apa-apa syer yang dipegang atau kuasa yang boleh dijalankan —
 - (i) oleh mana-mana orang sebagai penama bagi perbadanan yang satu lagi itu (kecuali jika perbadanan yang satu lagi itu hanya terlibat atas sifat pemegang amanah atau fidusiari); atau

- (ii) oleh, atau oleh penama bagi, sesuatu subsidiari perbadanan yang satu lagi itu, yang bukannya suatu subsidiari yang hanya terlibat atas sifat pemegang amanah atau fidusiari,

hendaklah dikira sebagai dipegang atau boleh dijalankan oleh perbadanan yang satu lagi itu;

- (c) apa-apa syer yang dipegang atau kuasa yang boleh dijalankan oleh mana-mana orang menurut kuasa peruntukan mana-mana debentur perbadanan yang mula-mula disebut itu atau menurut suatu surat ikatan amanah bagi menjamin apa-apa penerbitan debentur sedemikian tidaklah boleh diambil kira; dan
- (d) apa-apa syer yang dipegang atau kuasa yang boleh dijalankan oleh, atau oleh penama bagi, perbadanan yang satu lagi itu atau subsidiarinya (yang tidak dipegang atau tidak boleh dijalankan sebagaimana yang disebut dalam perenggan (c)) hendaklah dikira sebagai tidak dipegang atau tidak boleh dijalankan oleh perbadanan yang satu lagi itu jika perniagaan biasa perbadanan yang satu lagi itu atau subsidiarinya, mengikut mana-mana yang berkenaan, termasuk pemberian pinjaman wang dan syer itu dipegang atau kuasa itu boleh dijalankan sebagaimana yang disebut terdahulu sebagai suatu jaminan hanya bagi maksud suatu transaksi yang dibuat dalam perjalanan biasa perniagaan itu.

(4) Sesuatu rujukan dalam Akta ini kepada syankat pemegangan suatu perbadanan hendaklah dibaca sebagai suatu rujukan kepada suatu perbadanan yang perbadanan yang terakhir disebut itu adalah suatu subsidiarinya.

Syarikat berkaitan

4. Jika sesuatu perbadanan —

- (a) adalah syarikat pemegangan suatu perbadanan yang lain;
- (b) adalah suatu subsidiari suatu perbadanan yang lain; atau
- (c) adalah suatu subsidiari bagi syarikat pemegangan suatu perbadanan yang lain,

perbadanan yang mula-mula disebut itu dan perbadanan yang satu lagi itu hendaklah bagi maksud Akta ini disifatkan sebagai berkaitan antara satu sama lain.

Ketidakpakaian Akta Syarikat 1965

5. Kecuali sebagaimana yang diperuntukkan dengan nyata selainnya dalam Akta ini, peruntukan Akta Syarikat 1965 tidak terpakai kepada sesuatu syarikat Langkawi atau syarikat Langkawi asing yang diperbadankan atau didaftarkan di bawah Akta ini.

Tujuan dan aktiviti yang dibenarkan dan dilarang bagi syarikat Langkawi

6. (1) Tertakluk kepada subseksyen (2), sesuatu syarikat Langkawi boleh menjalankan apa-apa perniagaan yang sah di sisi undang-undang berkenaan dengan aktiviti yang berhubungan dengan kapal layar, tetapi syarikat itu tidak boleh menjalankan apa-apa perniagaan dengan seseorang pemastautin Malaysia kecuali sebagaimana yang diperuntukkan dalam subseksyen (3).

(2) Perniagaan yang dirujuk dalam subseksyen (1) sekiranya dijalankan dalam, dari atau melalui Malaysia, hendaklah hanya dijalankan dalam, dari atau melalui Langkawi.

(3) Tiada syarikat Langkawi boleh menjalankan apa-apa perniagaan dengan seseorang pemastautin Malaysia kecuali berhubung dengan aktiviti yang berhubungan dengan kapal layar atau memperoleh pembiayaan atau pemberian pinjaman berhubung dengan aktiviti yang berhubungan dengan kapal layar.

(4) Bagi maksud subseksyen (3), suatu syarikat Langkawi tidak boleh dikira sebagai menjalankan perniagaan dengan orang yang bermastautin di Malaysia hanya oleh sebab —

- (a) syarikat itu membuat atau menyenggarakan deposit dengan seseorang yang menjalankan perniagaan di dalam Malaysia;
- (b) syarikat itu membuat atau mengadakan perhubungan profesional dengan mana-mana peguam dan wakil, akauntan, penyimpan kira, penasihat pelaburan, pemegang amanah atau orang lain yang seumpama yang menjalankan perniagaan di dalam Malaysia;

- (c) syarikat itu menyediakan atau menyenggarakan buku dan rekod di dalam Malaysia;
- (d) syarikat itu mengadakan, di dalam Malaysia, mesyuarat pengarah atau anggotanya;
- (e) syarikat itu memperoleh atau memegang apa-apa pajakan mana-mana harta bagi maksud pengendaliannya atau sebagai tempat penginapan bagi pegawai atau pekerjanya;
- (f) syarikat itu memegang syer, obligasi hutang atau sekuriti lain dalam suatu syarikat Langkawi; atau
- (g) seorang pemastautin Malaysia memegang syer dalam syarikat Langkawi itu.

(5) Suatu syarikat Langkawi boleh diuruskan oleh satu anggotanya atau lebih, yang dalam ini dirujuk sebagai "anggota pengurusan", dan jika diuruskan sedemikian, hendaklah mempunyai apa-apa perkataan bersesuaian atau singkatannya dalam huruf rumi yang memperihalkannya sedemikian.

(6) Anggota pengurusan yang dirujuk dalam subseksyen (5) hendaklah, bagi maksud Akta ini, dianggap sebagai pengarah syarikat Langkawi itu.

BAHAGIAN II

PENTADBIRAN AKTA

Pendaftar Syarikat

7. (1) Pendaftar hendaklah bertanggungjawab terhadap pentadbiran Akta ini.

(2) Semua mahkamah, hakim dan orang yang bertindak secara kehakiman hendaklah memberi pengiktirafan kehakiman akan meterai dan tandatangan Pendaftar.

(3) Maka hendaklah dibayar kepada Pendaftar apa-apa fi sebagaimana yang ditetapkan.

(4) Pendaftar atau mana-mana orang yang diberi kuasa oleh Pendaftar di bawah Akta ini tidak boleh dibawa guaman terhadapnya di dalam mana-mana mahkamah untuk apa-apa tindakan atau perkara yang dilakukan atau yang diperintah untuk dilakukan atau yang

ditinggalkan untuk dilakukan olehnya dengan suci hati dan dalam perjalanan apa-apa kuasa atau pelaksanaan apa-apa kewajipan yang dicadangkan, yang diberikan atau dikenakan padanya oleh atau di bawah Akta ini.

Kuasa untuk memperoleh maklumat

8. (1) Pendaftar boleh menghendaki mana-mana syarikat Langkawi atau syarikat Langkawi asing untuk memberi secara lisan atau boieh melalui notis bertulis menghendaki mana-mana syarikat Langkawi atau syarikat Langkawi asing untuk memberi secara bertulis dalam masa yang dinyatakan dalam notis itu semua maklumat dalam pemilikannya atau yang dalam pengetahuannya sebagaimana yang dikehendaki oleh Pendaftar bagi maksud Akta ini.

(2) Mana-mana syarikat Langkawi atau syarikat Langkawi asing yang tidak memberikan apa-apa maklumat, atau yang dalam memberikan apa-apa maklumat membuat apa-apa pernyataan yang disedarinya adalah palsu dalam butir yang material, atau membuat pernyataan sedemikian secara melulu, melakukan suatu kesalahan terhadap Akta ini.

Kuasa untuk menjalankan pemeriksaan

9. (1) Bagi maksud menentukan sama ada sesuatu syarikat Langkawi atau syarikat Langkawi asing mematuhi Akta ini, Pendaftar atau mana-mana orang yang diberi kuasa olehnya boleh mempunyai akses ke mana-mana tempat atau bangunan dan boleh memeriksa dan membuat salinan atau mengambil cabutan daripada mana-mana buku, buku minit, daftar, rekod atau dokumen yang dikehendaki oleh atau di bawah Akta ini untuk disimpan oleh syarikat itu.

(2) Suatu syarikat Langkawi atau syarikat Langkawi asing atau mana-mana pegawai syarikat itu hendaklah, apabila dikehendaki oleh Pendaftar atau mana-mana pegawai yang diberi kuasa olehnya, mengemukakan buku, buku minit, daftar, rekod atau dokumen sedemikian.

(3) Suatu syarikat Langkawi atau syarikat Langkawi asing atau mana-mana pegawai syarikat itu yang —

(a) tidak mengemukakan buku, buku minit, daftar, rekod atau dokumen itu sebagaimana yang dikehendaki oleh Pendaftar atau mana-mana orang yang diberi kuasa olehnya di bawah seksyen ini; atau

- (b) menghalang atau menggalang Pendaftar atau mana-mana orang yang diberi kuasa olehnya semasa menjalankan mana-mana kuasa di bawah seksyen ini,

melakukan suatu kesalahan terhadap Akta ini.

(4) Pendaftar atau mana-mana orang yang diberi kuasa olehnya, kecuali bagi maksud Akta ini atau semasa dalam mana-mana prosiding jenayah, tidak boleh membuat sesuatu rekod mengenai, atau mendedahkan atau memberitahu kepada mana-mana orang lain, apa-apa maklumat yang dia telah memperoleh oleh sebab pemeriksaan sedemikian.

(5) Subseksyen (1) tidak boleh ditafsirkan sebagai mengehadkan atau menjejaskan apa-apa kuasa untuk membuat mana-mana pemeriksaan yang diberikan kepada mana-mana orang oleh mana-mana undang-undang lain.

Kuasa untuk menjalankan penyiasatan

10. (1) Jika Pendaftar mempunyai sebab untuk mengesyaki bahawa seseorang telah melakukan suatu kesalahan terhadap Akta ini, dia boleh membuat apa-apa penyiasatan sebagaimana yang difikirkannya suai manfaat bagi pentadbiran sewajarnya Akta ini.

(2) Apabila ternyata pada mana-mana Majistret berdasarkan maklumat bertulis dan selepas apa-apa siasatan yang difikirkannya perlu, bahawa ada sebab yang munasabah untuk mempercayai bahawa di mana-mana tempat atau bangunan terdapat mana-mana barang, artikel, bahan, benda, akaun, buku atau dokumen lain termasuk mana-mana dokumen perjalanan atau peribadi yang lain yang boleh digunakan sebagai keterangan tentang pelakuan suatu kesalahan terhadap Akta ini, dia boleh dengan waran mengarahkan Pendaftar supaya memasuki tempat atau bangunan itu, dengan kekerasan jika perlu, dan menggeledah, menyita, mengambil milik dan menahan di situ barang, artikel, bahan, benda, akaun, buku atau dokumen itu.

(3) Apabila didapati oleh Pendaftar bahawa ada sebab yang munasabah untuk mempercayai bahawa di mana-mana tempat atau bangunan ada tersembunyi atau disimpan mana-mana barang, artikel, bahan, benda, akaun, buku atau dokumen lain termasuk mana-mana dokumen perjalanan atau peribadi lain yang boleh digunakan sebagai keterangan tentang pelakuan suatu kesalahan terhadap Akta ini, dan Pendaftar mempunyai alasan yang munasabah untuk

mempercayai bahawa oleh sebab kelengahan untuk mendapatkan suatu waran geledah, barang, artikel, bahan, benda, akaun, buku atau dokumen itu boleh diganggu dengan atau dimusnahkan atau tujuan penggeledahan itu berkemungkinan terhalang, dia boleh berkenaan dengan tempat atau bangunan itu menjalankan semua kuasa yang disebut dalam subseksyen (2) secara penuh dan secukupnya seolah-olah dia telah diberi kuasa untuk berbuat sedemikian melalui waran yang dikeluarkan di bawah subseksyen itu.

(4) Pendaftar boleh memberi kuasa kepada mana-mana orang untuk memeriksa mana-mana akaun, buku atau dokumen lain yang disita dan diambil milik oleh Pendaftar semasa dalam penyiasatan di bawah Akta ini jika orang sedemikian berhak untuk memeriksa akaun, buku atau dokumen itu di bawah Akta ini.

Kuasa untuk memeriksa orang

11. (1) Bagi maksud mana-mana penyiasatan di bawah seksyen 10, Pendaftar boleh melalui notis bertulis menghendaki mana-mana orang yang dipercayainya mengetahui fakta dan hal keadaan kes itu untuk hadir di hadapannya dan untuk diperiksa secara lisan, dan hendaklah diubah ke dalam bentuk bertulis apa-apa pernyataan yang dibuat oleh orang yang diperiksa.

(2) Orang yang dipenksa di bawah subseksyen (1) adalah terikat di sisi undang-undang untuk menjawab semua soalan yang berhubungan dengan kes itu yang dikemukakan kepadanya oleh Pendaftar dan untuk menyatakan yang benar, sama ada atau tidak pernyataan itu dibuat keseluruhannya atau sebahagiannya sebagai jawapan kepada soalan itu, dan tidak boleh enggan menjawab apa-apa soalan atas alasan soalan itu akan menunjukkan bahawa dia bersalah.

(3) Suatu pernyataan yang dibuat oleh seseorang di bawah seksyen ini dan diubah ke dalam bentuk bertulis hendaklah ditandatangani oleh orang yang membuatnya atau dilekatkan dengan cap ibu jarinya, mengikut mana-mana yang berkenaan, selepas pernyataan itu dibacakan kepadanya dan selepas dia telah diberi peluang untuk membuat apa-apa pembedulan yang dia mahu:

Dengan syarat bahawa jika orang yang diperiksa itu enggan menandatangani atau melekatkan dengan cap ibu jarinya pada pernyataan itu, Pendaftar hendaklah mengendors pada pernyataan

itu di bawah tandatangannya hakikat keengganan itu dan sebab-sebabnya, jika ada, yang dinyatakan oleh orang yang diperiksa itu.

(4) Apa-apa pernyataan yang dibuat dan direkodkan di bawah seksyen ini hendaklah diterima sebagai keterangan dalam mana-mana prosiding di bawah Akta ini di dalam mana-mana mahkamah, sama ada terhadap orang yang membuat pernyataan itu atau mana-mana orang lain.

(5) Mana-mana orang yang —

- (a) tanpa sebab yang munasabah tidak hadir di hadapan Pendaftar sebagairnana yang dikehendaki di bawah subseksyen (1);
- (b) tanpa sebab yang munasabah enggan menjawab semua soalan yang dikemukakan kepadanya oleh Pendaftar sebagaimana yang dikehendaki oleh subseksyen (2); atau
- (c) dengan disedarinya memberi kepada Pendaftar apa-apa maklumat atau pernyataan yang palsu atau mengelirukan dalam butir yang material,

melakukan suatu kesalahan terhadap Akta ini.

Penyerahan atau pemfailan dokumen dengan Pendaftar

12. (1) Tiap-tiap dokumen yang dikehendaki atau dibenarkan untuk diserahkan atau difailkan dengan Pendaftar di bawah Akta ini hendaklah diserahkan atau difailkan melalui sesuatu entiti pengurusan.

(2) Tertakluk kepada subseksyen (3), tiap-tiap permohonan kepada Pendaftar untuk apa-apa perakuan atau dokumen atau apa-apa cabutan atau salinan suatu perakuan atau dokumen yang berhubungan dengan suatu syarikat Langkawi atau syarikat Langkawi asing yang akan dikeluarkan di bawah Akta ini hendaklah dibuat melalui sesuatu entiti pengurusan.

(3) Sesuatu permohonan boleh dibuat terus kepada Pendaftar jika permohonan itu adalah berkenaan dengan suatu syarikat Langkawi atau syarikat Langkawi asing dan permohonan itu dibuat oleh seorang anggota syarikat itu untuk suatu perakuan, dokumen, atau suatu cabutan atau salinan suatu perakuan atau dokumen untuk kegunaannya sendiri.

Penyerahan atau pemfailan dokumen secara elektronik

13. (1) Pendaftar boleh menyediakan suatu perkhidmatan untuk penyerahan atau pemfailan dokumen secara elektronik yang dikehendaki oleh Akta ini untuk diserahkan atau difailkan dengan Pendaftar.

(2) Seseorang yang bercadang untuk menggunakan perkhidmatan yang disediakan di bawah subseksyen (1) hendaklah menjadi seorang pelanggan kepada perkhidmatan itu dengan membayar fi yang ditetapkan dan dengan mematuhi apa-apa terma dan syarat sebagaimana yang ditentukan oleh Pendaftar.

(3) Hanya seorang pelanggan kepada perkhidmatan yang disediakan di bawah subseksyen (1) boleh menyerahkan atau memfailkan dokumen secara elektronik dengan Pendaftar.

(4) Sesuatu dokumen yang diserahkan atau difailkan secara elektronik di bawah seksyen ini hendaklah disifatkan sebagai telah memuaskan kehendak untuk penyerahan atau pemfailan jika dokumen itu disampaikan atau dihantarkan kepada Pendaftar melalui apa-apa cara sebagaimana yang dinyatakan oleh Pendaftar.

(5) Pendaftar boleh, melalui notis bertulis, menyatakan dokumen yang boleh diserahkan atau difailkan secara elektronik.

(6) Sesuatu dokumen yang dikehendaki untuk diperakui atau disahkan hendaklah, jika dokumen itu dikehendaki supaya diserahkan atau difailkan secara elektronik, diperakui atau disahkan mengikut apa-apa cara sebagaimana yang dinyatakan oleh Pendaftar.

(7) Jika sesuatu dokumen diserahkan atau difailkan secara elektronik dengan Pendaftar, Pendaftar atau ejen yang diberi kuasa olehnya tidak bertanggungjawab bagi apa-apa kerugian atau kerosakan yang ditanggung oleh mana-mana orang oleh sebab apa-apa jua jenis kesilapan atau peninggalan atau yang bagaimana jua pun berbangkit yang terdapat dalam apa-apa dokumen yang diperolehi oleh mana-mana orang di bawah perkhidmatan yang dirujuk dalam subseksyen (1), jika kesilapan atau peninggalan itu dibuat dengan suci hati dan dalam perjalanan biasa penunaian kewajipan Pendaftar atau ejen yang diberi kuasa olehnya atau yang berlaku atau berbangkit akibat daripada apa-apa kecacatan atau kerosakan dalam perkhidmatan itu atau pada kelengkapan yang digunakan bagi penyediaan perkhidmatan itu.

Nilai keterangan dokumen yang diserahkan atau difailkan secara elektronik

14. Suatu salinan atau cabutan daripada mana-mana dokumen yang diserahkan atau difailkan secara elektronik dengan Pendaftar di bawah seksyen 13 yang diperakui dengan sewajarnya oleh Pendaftar sebagai suatu salinan benar atau cabutan daripada dokumen itu boleh diterima sebagai keterangan dalam mana-mana prosiding sebagai mempunyai kesahan yang sama dengan dokumen asal.

Salinan asal disimpan di pejabat entiti pengurusan

15. (1) Salinan asal dokumen yang dinyatakan oleh Pendaftar untuk diserahkan atau difailkan secara elektronik dengan Pendaftar oleh suatu entiti pengurusan hendaklah, sepanjang masa, disimpan di pejabat entiti pengurusan itu.

(2) Sesuatu entiti pengurusan yang tidak mematuhi subseksyen (1) melakukan suatu kesalahan terhadap Akta ini.

Penalti: Sepuluh ribu ringgit. Penalti ingkar.

Juruaudit yang diluluskan

16. (1) Tertakluk kepada apa-apa syarat yang difikirkannya sesuai dikenakan, Pendaftar boleh meluluskan mana-mana orang untuk menjadi seorang juruaudit yang diluluskan bagi maksud Akta ini.

(2) Tiada seorang pun boleh melaksanakan kewajipan seorang juruaudit bagi suatu syarikat Langkawi melainkan jika dia ialah seorang juruaudit yang diluluskan.

(3) Pendaftar boleh membatalkan mana-mana kelulusan yang diberikan di bawah subseksyen (1).

(4) Pendaftar hendaklah menyimpan suatu daftar juruaudit yang diluluskan.

(5) Seorang juruaudit yang diluluskan hendaklah membayar kepada Pendaftar apa-apa fi tahunan sebagaimana yang ditetapkan.

Juruaudit syarikat

17. (1) Seseorang tidak boleh dengan disedarinya bersetuju untuk dilantik, dan tidak boleh dengan disedarinya bertindak, sebagai seorang juruaudit bagi mana-mana syarikat Langkawi di bawah Akta ini dan tidak boleh menyediakan untuk atau bagi pihak syarikat itu apa-apa laporan yang dikehendaki oleh Akta ini supaya disediakan oleh seorang juruaudit yang diluluskan —

- (a) jika dia bukannya seorang juruaudit yang diluluskan;
- (b) jika dia berhutang dengan syarikat itu atau dengan suatu syarikat yang disifatkan berkaitan dengan syarikat itu menurut kuasa seksyen 4 dalam suatu amaun yang melebihi lima ribu dolar atau suatu amaun yang setara dalam apa-apa mata wang lain;
- (c) jika dia ialah —
 - (i) seorang pegawai syarikat itu;
 - (ii) seorang pekongsi, majikan atau pekerja seseorang pegawai syarikat itu;
 - (iii) seorang pekongsi, atau pekerja seorang pekerja seseorang pegawai syarikat itu;
 - (iv) seorang suami atau isteri seseorang pegawai syarikat itu;
 - (v) seorang suami atau isteri seorang pekerja seseorang pegawai syarikat itu; atau
 - (vi) seorang pemegang syer, atau suami atau isteri seorang pemegang syer, suatu perbadanan yang pekerjaanya ialah seorang pegawai syarikat itu; atau
- (d) jika dia bertanggungjawab untuk, atau jika dia ialah pekongsi, majikan atau pekerja seorang yang bertanggungjawab untuk, menyimpan daftar anggota atau daftar pemegang debentur syarikat itu.

(2) Bagi maksud subseksyen (1), seseorang hendaklah disifatkan sebagai seorang pegawai suatu syarikat Langkawi jika dia ialah seorang pegawai suatu syarikat yang disifatkan sebagai berkaitan dengan syarikat Langkawi itu menurut kuasa seksyen 4 atau dia telah, pada bila-bila masa dalam tempoh dua belas bulan yang terdahulu, menjadi seorang pegawai atau penaja syarikat Langkawi itu atau syarikat yang satu lagi itu.

(3) Bagi maksud seksyen ini, seseorang tidak boleh disifatkan sebagai seorang pegawai syarikat Langkawi hanya oleh sebab dia telah dilantik sebagai seorang juruaudit suatu syarikat.

(4) Tiada seorang pun boleh melantik seorang sebagai juruaudit suatu syarikat Langkawi melainkan jika orang yang akan dilantik sebagai juruaudit telah, sebelum pelantikan itu, bersetuju secara bertulis untuk bertindak sebagai juruaudit sedemikian.

(5) Menteri boleh membuat peraturan-peraturan yang menghendaki juruaudit yang diluluskan untuk mengambil insurans terhadap liabiliti mereka sebagai juruaudit syarikat Langkawi.

Pelikuidasi yang diluluskan

18. (1) Tertakluk kepada apa-apa syarat sebagaimana yang difikirkannya sesuai dikenakan, Pendaftar boleh meluluskan mana-mana orang untuk menjadi pelikuidasi yang diluluskan.

(2) Pendaftar boleh merabatakan mana-mana kelulusan yang diberikan di bawah subseksyen (1).

(3) Pendaftar hendaklah menyimpan suatu daftar pelikuidasi yang diluluskan.

(4) Tiada seorang pun boleh dilantik atau boleh bertindak sebagai pelikuidasi suatu syarikat Langkawi —

(a) jika dia bukannya seorang pelikuidasi yang diluluskan;

(b) jika dia terhutang dengan syarikat yang dilikuidasikan itu atau dengan suatu syarikat yang disifatkan sebagai berkaitan dengan syarikat yang dilikuidasikan itu menurut kuasa seksyen 4 dalam suatu amaun yang melebihi lima ribu dolar atau suatu amaun yang setara dalam apa-apa mata wang yang lain; atau

(c) jika dia tidak memberi persetujuannya secara bertulis bagi pelantikan itu.

(5) Jika seorang pelikuidasi yang diluluskan dilantik untuk menjadi pelikuidasi suatu syarikat Langkawi, sama ada oleh Mahkamah atau dalam suatu penggulungan sukarela, dia hendaklah dengan serta-merta memberitahu Pendaftar secara bertulis mengenai

apa-apa kepentingan yang dipunyainya dalam syarikat Langkawi itu sebagai seorang pegawai, majikan atau pekerja syarikat Langkawi itu atau sebagai seorang pekongsi, majikan atau pekerja seseorang pegawai syarikat Langkawi itu, dan apa-apa kepentingan yang mana-mana syarikat yang berkaitan dengannya mempunyai dalam syarikat Langkawi itu.

Daftar

19. (1) Pendaftar hendaklah, tertakluk kepada Aktaini, menyimpan apa-apa daftar yang difikirkannya perlu mengikut apa-apa bentuk yang difikirkannya sesuai.

(2) Mana-mana pegawai, anggota, pemegang debentur, pengarah atau pelikuidasi suatu syarikat Langkawi atau syarikat Langkawi asing, atau mana-mana orang lain yang mempunyai kebenaran bertulis daripada pegawai, anggota, pemegang debentur, pengarah atau pelikuidasi sedemikian atau yang dapat menunjukkan kepada Pendaftar bahawa dia mempunyai sebab yang baik untuk berbuat demikian, boleh, tertakluk kepada Akta ini dan apabila dibayar fi yang ditetapkan —

- (a) memeriksa mana-mana dokumen yang diserahkan atau difailkan dengan Pendaftar berkenaan dengan syarikat itu; atau
- (b) menghendaki mana-mana perakuan untuk dikeluarkan di bawah Akta ini atau suatu salinan atau cabutan daripada mana-mana dokumen berkenaan dengan syarikat itu supaya diberikan atau diberikan dan diperakui oleh Pendaftar.

(3) Suatu salinan atau cabutan daripada mana-mana dokumen yang diserahkan atau difailkan di pejabat Pendaftar, yang diperakui sebagai suatu salinan benar atau cabutan di bawah tandatangan dan meterai Pendaftar, hendaklah, dalam mana-mana prosiding, boleh diterima sebagai keterangan yang mempunyai kesahan yang sama dengan dokumen asal.

(4) Dalam mana-mana prosiding undang-undang—

- (a) suatu perakuan di bawah tandatangan dan meterai Pendaftar bahawa, pada tarikh atau semasa tempoh yang dinyatakan dalam perakuan itu, tiada syarikat yang didaftarkan di bawah Akta ini dengan suatu nama yang dinyatakan dalam perakuan itu hendaklah diterima sebagai keterangan *prima*

facie bahawa pada tarikh itu atau semasa tempoh itu, mengikut mana-mana yang berkenaan, tiada sesuatu syarikat telah didaftarkan dengan nama itu di bawah Akta ini; dan

- (b) suatu perakuan di bawah tandatangan dan meterai Pendaftar bahawa suatu kehendak Akta ini yang dinyatakan dalam perakuan itu—
 - (i) telah atau tidak dipatuhi pada suatu tarikh atau dalam tempoh yang dinyatakan dalam perakuan itu; atau
 - (ii) telah dipatuhi pada suatu tarikh yang dinyatakan dalam perakuan itu tetapi tidak sebelum tarikh itu,

hendaklah diterima sebagai keterangan *prima facie* mengenai perkara yang dinyatakan dalam perakuan itu.

(5) Jika Pendaftar berpendapat bahawa suatu dokumen yang dikemukakan untuk diserahkan kepada Pendaftar—

- (a) mengandungi perkara yang berlawanan dengan undang-undang;
- (b) mengandungi perkara yang, dalam butir yang material, adalah palsu atau mengelirukan mengikut bentuk atau konteks yang perkara itu dimasukkan;
- (c) oleh sebab suatu peninggalan atau salah perihalan, tidak disempurnakan dengan sewajarnya;
- (d) tidak mematuhi kehendak Akta ini; atau
- (e) mengandungi suatu kesilapan, perubahan atau pepadaman,

Pendaftar boleh enggan mendaftarkan atau menerima dokumen itu dan boleh meminta—

- (f) supaya dokumen itu dipinda atau disempurnakan dengan sesuai dan dikemukakan semula;
- (g) supaya suatu dokumen yang baru dikemukakan sebagai gantinya; atau
- (h) jika dokumen itu tidak disempurnakan dengan sewajarnya, supaya suatu dokumen tambahan dalam bentuk yang ditetapkan diserahkan.

(6) Pendaftar boleh menghendaki seorang yang mengemukakan suatu dokumen untuk diserahkan kepada Pendaftar supaya mengemukakan kepada Pendaftar apa-apa dokumen lain, atau untuk memberi kepada Pendaftar apa-apa maklumat, sebagaimana yang difikirkan perlu oleh Pendaftar bagi membuat suatu pendapat sama ada dia boleh enggan menerima atau mendaftarkan dokumen itu.

(7) Mana-mana orang yang terkilan dengan keengganan Pendaftar untuk mendaftarkan sesuatu syarikat Langkawi atau syarikat Langkawi asing atau untuk mendaftarkan atau menerima apa-apa dokumen, atau dengan apa-apa tindakan atau keputusan Pendaftar, boleh merayu dalam masa tiga puluh hari dari keputusan Pendaftar itu kepada Menteri, yang boleh mengesahkan keengganan, tindakan atau keputusan itu atau memberikan apa-apa arahan mengenai perkara itu sebagaimana yang difikirkannya patut atau selainnya memutuskan perkara itu, tetapi subseksyen ini tidaklah terpakai bagi apa-apa tindakan atau keputusan Pendaftar—

(a) yang berkenaan dengannya mana-mana peruntukan yang berupa rayuan atau kajian semula diperuntukkan dengan nyata dalam Akta ini; atau

(b) yang diisytiharkan oleh Akta ini sebagai konklusif atau muktamad atau yang termaktub dalam mana-mana dokumen yang diisytiharkan oleh Akta ini sebagai keterangan konklusif bagi apa-apa tindakan, perkara atau benda.

(8) Jika suatu syarikat Langkawi atau syarikat Langkawi asing atau seseorang, setelah melakukan keingkaran dalam mematuhi —

(a) mana-mana peruntukan Akta ini atau mana-mana undang-undang lain yang menghendaki supaya diserahkan atau difailkan mengikut apa-apa cara dengan Pendaftar apa-apa penyata, akaun atau dokumen lain atau, supaya diberikan notis kepadanya mengenai apa-apa perkara; atau

(b) apa-apa permintaan oleh Pendaftar untuk meminda atau menyempurnakan dan mengemukakan semula apa-apa dokumen atau mengemukakan suatu dokumen yang baru,

tidak memperbaiki keingkaran itu dalam masa tiga puluh hari selepas disampaikan kepada syarikat atau orang itu suatu notis yang menghendakinya dilakukan, Pendaftar boleh memerintahkan syarikat itu dan mana-mana pegawai syarikat itu atau orang sedemikian supaya memperbaiki keingkaran itu dalam masa sebagaimana yang dinyatakan dalam perintah itu.

(9) Pendaftar boleh, jika pada pendapatnya tidak lagi perlu atau dikehendaki untuk menyimpannya, memusnahkan atau memberikan kepada Arkib Negara—

- (a) dalam hal suatu syarikat Langkawi atau syarikat Langkawi asing —
 - (i) mana-mana penyata mengenai pengumpulan syer bagi wang tunai yang telah diserahkan atau difailkan selama tidak kurang daripada enam tahun;
 - (ii) mana-mana penyata atau kunci kira-kira yang telah diserahkan atau difailkan selama tidak kurang daripada tujuh tahun, atau mana-mana dokumen yang mewujudkan atau membuktikan suatu gadaian atau penyelesaian sepenuhnya atau sebahagiannya suatu gadaian yang mana suatu memorandum penyelesaian gadaian itu telah didaftarkan selama tidak kurang daripada tujuh tahun; atau
 - (iii) mana-mana dokumen lain (selain memorandum dan perkara persatuan atau mana-mana dokumen lain yang menyentuhnya) yang telah diserahkan, difailkan atau didaftarkan selama tidak kurang daripada lima belas tahun;
- (b) dalam hal suatu syarikat Langkawi atau syarikat Langkawi asing yang telah dibubarkan atau yang terhenti didaftarkan selama tidak kurang daripada lima belas tahun, mana-mana dokumen yang diserahkan, difailkan atau didaftarkan; atau
- (c) mana-mana dokumen yang transparensinya telah dimasukkan dengan suatu daftar yang disimpan oleh Pendaftar.

BAHAGIAN III

PENUBUHAN SYARIKAT

PBNGGAL I

PEMERBADANAN

Pembentukan syarikat

20. (1) Tertakluk kepada Aktaini, mana-mana orang boleh, dengan menurunkan tandatangannya pada suatu memorandum dan mematuhi kehendak mengenai pendaftaran, membentuk suatu syarikat Langkawi bagi apa-apa perniagaan yang sah di sisi undang-undang yang berkenaan dengan aktiviti yang berhubungan dengan kapal layar.

(2) Jika penandatanganan kepada memorandum **itu** ialah suatu perbadanan, memorandum itu boleh ditandatangani oleh perbadanan itu di bawah meterainya atau oleh mana-mana orang yang diberi kuasa dengan sewajarnya bagi pihaknya.

(3) Tiap-tiap syarikat Langkawi hendaklah suatu syarikat yang terhad mengikut syer.

Pendaftaran dan pemerbadanan

21. (1) Seseorang yang berhasrat hendak memperbadankan sesuatu syarikat Langkawi hendaklah menyerahkan kepada Pendaftar memorandum dan perkara persatuan bagi syarikat yang dicadangkan itu dan dokumen lain yang dikehendaki supaya diserahkan oleh atau di bawah Akta ini, dan Pendaftar apabila dibayar fi yang ditetapkan hendaklah, tertakluk kepada Akta ini, mendaftarkan syarikat itu dengan mendaftarkan memorandum dan perkara persatuan itu.

(2) Pendaftar boleh menghendaki suatu akuan berkanun yang dibuat oleh seorang pegawai untuk diserahkan dengan menyatakan bahawa semua atau mana-mana kehendak Akta ini telah dipatuhi, dan Pendaftar boleh menerima akuan sedemikian sebagai keterangan yang mencukupi bagi pematuhan.

(3) Apabila memorandum itu didaftarkan, Pendaftar hendaklah memperakui di bawah tandatangan dan meterainya bahawa syarikat itu, pada dan mulai dari tarikh yang dinyatakan dalam perakuan itu, telah diperbadankan, dan bahawa syarikat itu ialah suatu syarikat yang terhad mengikut syer.

(4) Pada dan mulai dari tarikh pemerbadanan yang dinyatakan dalam perakuan pemerbadanan itu, tetapi tertakluk kepada Akta ini, penandatanganan kepada memorandum bersama dengan mana-mana orang lain yang dari semasa ke semasa akan menjadi anggota syarikat itu hendaklah menjadi suatu pertubuhan perbadanan dengan nama yang terkandung dalam memorandum itu, yang boleh dengan serta-merta menjalankan semua fungsi sesuatu syarikat yang diperbadankan, dan yang boleh membawa guaman dan dibawa guaman terhadapnya, dan yang kekal tetap dan mempunyai suatu meterai perbadanan, dengan kuasa untuk memegang tanah tetapi dengan apa-apa liabiliti di pihak anggota itu untuk menyumbang kepada aset syarikat sekiranya syarikat itu digulungkan sebagaimana yang diperuntukkan oleh Akta ini.

(5) Sesuatu perakuan pemerbadanan bagi suatu syarikat yang dikeluarkan oleh Pendaftar hendaklah menjadi keterangan *prima facie* mengenai pematuhan semua kehendak Akta ini berkenaan dengan pemerbadanan.

(6) Sesuatu syarikat Langkawi hendaklah membayar apa-apa fi tahunan sebagaimana yang ditetapkan mengikut cara yang ditetapkan.

(7) Tiap-tiap penandatanganan kepada memorandum hendaklah disifatkan sebagai telah bersetuju untuk menjadi seorang anggota suatu syarikat Langkawi dan, apabila syarikat itu diperbadankan, hendaklah dicatatkan sebagai seorang anggota dalam daftar anggotanya berkenaan dengan syer yang dilanggan untuk atau olehnya dalam memorandum itu, dan tiap-tiap orang lain yang bersetuju untuk menjadi seorang anggota suatu syarikat dan yang namanya dicatatkan dalam daftar anggota itu hendaklah menjadi seorang anggota syarikat itu.

Permohonan bagi pendaftaran syarikat asing sebagai terus wujud di Langkawi

22. (1) Tertakluk kepada seksyen 6, sesuatu syarikat asing yang diperbadankan di bawah undang-undang mana-mana negara selain Malaysia, atau mana-mana bidang kuasa dalam negara sedemikian, boleh, jika dibenarkan sedemikian oleh undang-undang negara atau bidang kuasa itu, memohon kepada Pendaftar untuk pendaftaran syarikat itu terus wujud di Langkawi seolah-olah syarikat itu telah diperbadankan di bawah Akta ini.

(2) Apabila permohonan dibuat di bawah subseksyen (1), yang disokong oleh apa-apa bahan yang didapati oleh Pendaftar sebagai cukup dan memuaskan, Pendaftar boleh, jika dia berpuas hati bahawa persetujuan daripada apa-apa bilangan atau perkadaran pemegang syer, pemegang debentur dan pemiutang syarikat asing itu sebagaimana yang dikehendaki oleh undang-undang negara atau bidang kuasa itu, dan persetujuan daripada pegawai yang sesuai bagi negara atau bidang kuasa itu, terhadap pendaftaran sedemikian telah didapatkan oleh syarikat itu, mendaftarkan syarikat itu sebagai terus wujud dan, jika didaftarkan sedemikian, syarikat itu hendaklah selepas itu disifatkan sebagai suatu syarikat Langkawi yang diperbadankan di bawah Akta ini dan berdomisil di Langkawi:

Dengan syarat bahawa tiada syarikat asing boleh didaftarkan di bawah seksyen ini jika—

- (a) syarikat itu adalah dalam proses penggulungan atau likuidasi;
- (b) seorang penerima bagi hartanya telah dilantik; atau
- (c) terdapat apa-apa skim atau perintah yang berkuat kuasa berhubung dengan syarikat itu yang menurutnya hak pemiutang telah digantung atau disekat.

(3) Pendaftaran sesuatu syarikat asing di bawah seksyen ini tidak boleh berkuat kuasa untuk—

- (a) mewujudkan suatu entiti undang-undang yang baru;
- (b) menjejaskan atau menyentuh keberterusan syarikat itu;
- (c) menyentuh harta syarikat itu;
- (d) mencatitkan apa-apa prosiding undang-undang atau prosiding lain yang dimulakan, atau yang akan dimulakan, oleh atau terhadap syarikat itu atau mana-mana orang lain; atau
- (e) menyentuh apa-apa hak, kuasa, autoriti, kewajipan, fungsi, liabiliti atau obligasi syarikat itu atau mana-mana orang lain.

(4) Apabila suatu syarikat asing didaftarkan di bawah seksyen ini—

- (a) sekian banyak daripada perlembagaannya yang, jika syarikat itu telah diperbadankan di bawah Akta ini, dikehendaki oleh Akta ini supaya dimasukkan ke dalam memorandum persatuannya, hendaklah disifatkan sebagai memorandum persatuan bagi syarikat itu; dan
- (b) sekian banyak daripada perlembagaannya yang tidak, menurut kuasa perenggan (a), mengandungi memorandum persatuannya, hendaklah disifatkan sebagai perkara persatuan syarikat itu,

dan memorandum dan perkara persatuan yang disifatkan itu hendaklah mengikat syarikat itu dan anggotanya dengan sewajarnya.

Kelulusan terdahulu pada prinsipnya

23. (1) Sesuatu syarikat asing boleh, sebelum memohon untuk didaftarkan di bawah seksyen 22, meminta supaya pendaftaran sedemikian diluluskan pada prinsipnya dan apabila permintaan itu dibuat dan fi yang ditetapkan dibayar, Pendaftar boleh, jika dia berpuas hati bahawa syarikat itu layak untuk didaftarkan di bawah seksyen 22, mengeluarkan suatu perakuan yang mengesahkan kelulusannya bagi syarikat itu didaftarkan sedemikian tertakluk kepada sesuatu permohonan dibuat di bawah seksyen 22 dalam tempoh enam bulan dan tarikh perakuan itu.

(2) Perakuan kelulusan yang diberikan oleh Pendaftar di bawah subseksyen (1) tidak melepaskan syarikat asing yang kepadanya perakuan itu dikeluarkan daripada mematuhi peruntukan seksyen 22 dalam permohonan bagi pendaftaran yang berikutnya.

Kehendak mengenai memorandum

24. (1) Memorandum bagi tiap-tiap syarikat Langkawi hendaklah bercetak dan dibahagikan kepada perenggan bernombor dan bertarikh dan hendaklah menyatakan yang berikut:

- (a) nama syarikat itu;
- (b) matlamat syarikat itu;
- (c) amaun modal syer yang dengannya syarikat itu dicadang hendak didaftarkan dan pembahagiannya kepada syer bagi amaun yang tetap;
- (d) nama penuh dan alamat setiap penandatanganan kepada memorandum itu; dan
- (e) bahawa penandatanganan atau penandatanganan-penandatanganan kepada memorandum itu berhasrat supaya dibentuk menjadi suatu syarikat Langkawi menurut memorandum itu dan masing-masing bersetuju untuk mengambil bilangan syer dalam modal syarikat itu yang dinyatakan bersetentangan dengan nama mereka masing-masing.

(2) Anggota syarikat Langkawi hendaklah bertanggung kepada syarikat itu bagi amaun yang tidak berbayar bagi syer mereka tetapi liabiliti mereka sebagai anggota adalah, tertakluk kepada peruntukan Akta ini, terhadap kepada amaun, jika ada, yang tidak berbayar bagi syer yang dipegang oleh mereka.

PENGGAL 2 STATUS

DAN NAMA

Kuasa syarikat

25. Tertakluk kepada seksyen 6, kuasa sesuatu syarikat Langkawi hendaklah termasuk, melainkan jika dikecualikan atau diubahsuaikan dengan nyata oleh perkara persatuannya setakat ia tidak menjadi tidak selaras dengan Akta ini, kuasa yang dinyatakan dalam Jadual, yang hendaklah dijalankan di Langkawi dan di tempat lain, dan apa-apa kuasa lain sebagaimana yang dinyatakan dalam perkara persatuannya atau yang diberikan kepadanya secara am atau khusus oleh peraturan-peraturan.

Transaksi *ultra vires*

26. (1) Tiada tindakan atau yang berupa tindakan bagi sesuatu syarikat Langkawi (termasuk membuat sesuatu perjanjian oleh syarikat itu dan termasuk apa-apa tindakan yang dilakukan bagi pihak syarikat itu oleh seseorang pegawai atau ejen syarikat itu di bawah apa-apa yang berupa autoriti, sama ada nyata atau tersirat, bagi syarikat itu) dan tiada apa-apa pemindahhakan atau pemindahan hakmilik harta, sama ada harta tanah atau harta alih, kepada atau oleh suatu syarikat Langkawi boleh menjadi tidak sah hanya oleh sebab fakta bahawa syarikat itu tidak berkeupayaan atau berkuasa untuk melakukan tindakan atau yang berupa tindakan itu atau untuk menyempurnakan atau mengambil pemindahhakan atau pemindahan hakmilik itu.

(2) Apa-apa ketidakupayaan atau ketiadaan kuasa sedemikian boleh ditegaskan atau diharapkan hanya dalam—

(a) mana-mana prosiding terhadap syarikat Langkawi itu oleh mana-mana anggota syarikat itu atau, jika syarikat itu telah menerbitkan debentur yang dicagarkan oleh suatu gadaian terapung atas semua atau mana-mana harta syarikat itu, oleh pemegang mana-mana debentur itu, atau oleh pemegang amanah bagi pemegang debentur itu, untuk menahan perlakuan apa-apa tindakan atau pemindahhakan atau pemindahan hakmilik mana-mana harta kepada atau oleh syarikat itu;

- (b) mana-mana prosiding oleh syarikat itu atau oleh mana-mana anggota syarikat itu terhadap pegawai sekarang atau yang dahulu syarikat itu; atau
- (c) apa-apa petisyen oleh Menteri untuk menggulung syarikat itu.

(3) Jika tindakan, pemindahhakan atau pemindahan hakmilik yang tidak dibenarkan yang hendak ditahan dalam mana-mana prosiding di bawah perenggan (2)(a) sedang dilaksanakan atau dibuat atau hendak dilaksanakan atau dibuat menurut mana-mana kontrak yang kepadanya syarikat Langkawi itu menjadi suatu pihak, Mahkamah boleh, jika semua pihak kepada kontrak itu adalah pihak dalam prosiding itu dan jika disifatkan adil dan saksama oleh Mahkamah, mengetepikan dan menahan pelaksanaan kontrak itu dan boleh membenarkan kepada syarikat itu atau kepada pihak lain kepada kontrak itu, mengikut kehendak kes itu, pampasan bagi kerugian atau kerosakan yang ditanggung oleh mana-mana daripada mereka yang boleh menjadi akibat daripada pengetepian dan penahanan pelaksanaan kontrak itu, tetapi keuntungan yang dijangkakan yang akan terbit daripada pelaksanaan kontrak itu tidak boleh diawardkan oleh Mahkamah sebagai suatu kerugian atau kerosakan yang ditanggung.

Nama syarikat Langkawi

27. (1) Kecuali dengan keizinan Menteri, sesuatu syarikat Langkawi tidak boleh didaftarkan dengan suatu nama yang, pada pendapat Pendaftar, adalah tidak diinginkan atau adalah suatu nama, atau termasuk suatu nama, daripada jenis yang Pendaftar tidak selainnya sanggup menerima bagi pendaftaran.

(2) Sesuatu syarikat Langkawi hendaklah mempunyai —

- (a) perkataan "Corporation" atau perkataan "Incorporated" atau singkatan "Corp." atau "Inc.";
- (b) perkataan "Limited" atau singkatan "Ltd.";
- (c) perkataan "Public Limited Company" atau singkatan "P.L.C.";
- (d) perkataan "Societe Anonyme" atau "Sociedad Anonima" atau singkatan "S.A.";
- (e) perkataan "Aktiengesellschaft" atau singkatan "A.G.";

- (f) perkataan "Naamloze Vennootschap" atau singkatan "N.V.";
- (g) perkataan "Perseroan Terbatas" atau singkatan "P.T."; atau
- (h) dalam huruf rumi, apa-apa perkataan atau perkataan-perkataan dalam bahasa kebangsaan mana-mana negara yang bermaksud sesuatu syarikat saham bersama yang terhad mengikut syer, atau apa-apa singkatannya,

sebagai sebahagian daripada namanya.

(3) Sesuatu syarikat Langkawi boleh mempunyai perkataan "(LGK)" sebagai sebahagian daripada namanya.

(4) Walau apa pun subseksyen (2), sesuatu syarikat Langkawi boleh mempunyai perkataan "Berhad" atau singkatan "Bhd." sebagai sebahagian daripada namanya, tetapi apabila perkataan "Berhad" atau singkatan "Bhd." digunakan sebagai sebahagian daripada nama syarikat Langkawi itu, syarikat Langkawi itu hendaklah sebagai tambahan mempunyai perkataan "(LGK)" sebagai sebahagian daripada namanya.

(5) Tiada apa-apa perihalan mengenai sesuatu syarikat Langkawi boleh disifatkan sebagai tidak mencukupi atau tidak betul oleh sebab penggunaan satu singkatan atau singkatan-singkatan sebagai menggantikan apa-apa perkataan atau perkataan-perkataan yang dirujuk dalam subseksyen (2) dan sebaliknya.

(6) Seseorang boleh menyerahkan kepada Pendaftar sesuatu permohonan dalam bentuk yang ditetapkan bagi penempahan sesuatu nama yang dinyatakan dalam permohonan itu sebagai —

- (a) nama suatu syarikat Langkawi yang dicadangkan; atau
- (b) nama yang kepadanya suatu syarikat Langkawi bercadang hendak menukarkan namanya.

(7) Jika Pendaftar berpendapat bahawa permohonan itu dibuat secara *bonafide* dan berpuas hati bahawa nama yang dicadangkan itu ialah suatu nama yang dengannya syarikat Langkawi yang dicadangkan itu atau syarikat Langkawi itu boleh didaftarkan tanpa melanggar subseksyen (1), dia hendaklah menempahkan nama yang dicadangkan itu selama tempoh tiga bulan mulai dari tarikh permohonan itu diserahkan.

(8) Semasa tempoh yang suatu nama ditempahkan, tiada seorang pun (selain syarikat Langkawt atau syarikat Langkawi yang dicadangkan yang berkenaan dengannya nama itu ditempahkan) boleh didaftarkan di bawah Akta ini atau mana-mana Akta lain, sama ada pada asalnya atau atas pertukaran nama, dengan nama yang ditempahkan itu atau dengan apa-apa nama lain yang, pada pendapat Pendaftar, begitu hampir menyerupai nama yang ditempahkan itu hingga mungkin menyebabkan kesilapan bagi nama itu.

(9) Penempahan sesuatu nama di bawah seksyen ini berkenaan dengan suatu syarikat Langkawi yang dicadangkan atau syarikat Langkawi tidak dengan sendirinya memberikan hak kepada syarikat yang dicadangkan atau syarikat itu untuk didaftarkan dengan nama itu, sama ada pada asalnya atau atas pertukaran nama.

Pertukaran nama

28. (1) Sesuatu syarikat Langkawi boleh, melalui ketetapan khas, membuat ketetapan bahawa namanya patut ditukar kepada suatu nama yang dengannya syarikat itu boleh didaftarkan tanpa melanggar subseksyen 27(1).

(2) Jika Pendaftar meluluskan nama yang syarikat itu telah membuat ketetapan sebagai patut menjadi nama barunya, dia hendaklah, apabila dibayar fi yang ditetapkan, mengeluarkan suatu perakuan pemerbadanan bagi syarikat itu di bawah nama barunya dan apabila dikeluarkan perakuan pemerbadanan itu pertukaran nama itu hendaklah berkuat kuasa.

(3) Jika nama sesuatu syarikat Langkawi (sama ada dengan tidak sengaja atau selainnya dan sama ada pada asalnya atau melalui pertukaran nama) adalah suatu nama yang dengannya syarikat itu tidak boleh didaftarkan tanpa melanggar subseksyen 27(1), syarikat itu boleh, melalui ketetapan khas, menukarkan namanya kepada suatu nama yang dengannya syarikat itu boleh didaftarkan tanpa melanggar subseksyen itu dan, jika diarahkan sedemikian oleh Pendaftar, hendaklah menukarkannya dalam masa enam minggu selepas tarikh arahan itu atau apa-apa tempoh yang lebih lama sebagaimana yang dibenarkan oleh Pendaftar, melainkan jika Menteri, melalui notis bertulis, mengungkaikan arahan itu, dan jika syarikat itu tidak mematuhi arahan itu ia melakukan suatu kesalahan terhadap Akta ini.

Penalti: Lima ribu ringgit.

(4) Suatu pertukaran nama menurut Akta ini tidaklah menyentuh identiti syarikat Langkawi itu atau apa-apa hak atau obligasi syarikat itu atau mencatitkan apa-apa prosiding oleh atau terhadap syarikat itu; dan apa-apa prosiding undang-undang yang mungkin telah diteruskan atau dimulakan oleh atau terhadap syarikat itu dengan nama dahulunya boleh diteruskan atau dimulakan oleh atau terhadap syarikat itu dengan nama barunya.

Perkara persatuan

29. (1) Maka hendaklah diserahkan bersama dengan memorandum sesuatu syarikat Langkawi perkara persatuan yang ditandatangani oleh penandatangan kepada memorandum itu yang menetapkan peraturan-peraturan bagi syarikat itu.

(2) Perkara persatuan hendaklah—

- (a) bercetak;
- (b) dibahagikan kepada perenggan bernombor; dan
- (c) ditandatangani oleh setiap penandatangan kepada memorandum itu atau, jika mana-mana penandatangan ialah suatu syarikat, dimeterai dengan meterai syarikatnya atau ditandatangani bagi pihaknya.

Perubahan memorandum atau perkara persatuan

30. (1) Tertakluk kepada Akta ini, sesuatu syarikat Langkawi boleh, melalui ketetapan khas, mengubah atau menambah memorandum atau perkara persatuannya.

(2) Apa-apa perubahan atau penambahan yang dibuat sedemikian dalam memorandum atau perkara persatuan hendaklah berkuat kuasa mulai dari tarikh notis ketetapan yang berkaitan diserahkan kepada Pendaftar dan sama sahnyanya seolah-olah pada mulanya ia terkandung dalam memorandum atau perkara persatuan itu dan tertakluk mengikut cara yang sama kepada perubahan melalui ketetapan khas itu.

Salinan memorandum dan perkara persatuan

31. (1) SesuatusyarikatLangkawihendaklah, apabila dikehendaki oleh mana-mana anggota, memberi kepadanya suatu salinan memorandum dan perkara persatuan (jika ada) apabila anggota itu membayar apa-apa amaun yang ditentukan oleh pengarah sebagai semunasabahnya perlu bagi menanggung kos penyediaan dan pemberian salinan itu.

(2) Jika suatu perubahan dibuat dalam memorandum atau perkara persatuan suatu syarikat Langkawi, suatu salinan memorandum atau perkara persatuan itu tidak boleh dikeluarkan oleh syarikat itu selepas tarikh perubahan itu melainkan jika—

- (a) salinan itu adalah mengikut perubahan itu; atau
- (b) suatu salinan bercetak ketetapan yang membuat perubahan itu dilampirkan kepada salinan memorandum atau perkara persatuan dan fasal atau perkara tertentu yang tersentuh ditunjukkan dengan dakwat.

(3) Jika berlaku keingkaran pada mematuhi seksyen ini, syarikat Langkawi itu dan tiap-tiap pegawai syarikat itu yang ingkar melakukan suatu kesalahan terhadap Akta ini.

Penalti: Lima ribu ringgit.

Transaksi dan penubuhan cawangan

32. (1) Kontrak bagi pihak sesuatu syarikat Langkawi boleh dibuat seperti yang berikut:

- (a) suatu kontrak yang, jika dibuat antara orang persendirian, adalah dikehendaki oleh undang-undang dibuat secara bertulis di bawah meterai, boleh dibuat bagi pihak syarikat itu secara bertulis di bawah meterai perbadanan syarikat itu;
- (b) suatu kontrak yang, jika dibuat antara orang persendirian, adalah dikehendaki oleh undang-undang dibuat secara bertulis dengan ditandatangani oleh pihak yang dipertanggungjawabkannya, boleh dibuat bagi pihak syarikat itu secara bertulis dan ditandatangani oleh mana-mana orang yang bertindak di bawah autoritinya, yang nyata atau tersirat; atau

- (c) suatu kontrak yang, jika dibuat antara orang persendirian, adalah sah di sisi undang-undang walaupun dibuat secara lisan sahaja, dan tidak diubah ke dalam bentuk bertulis, boleh dibuat secara lisan bagi pihak syarikat itu oleh mana-mana orang yang bertindak di bawah autoritinya, yang nyata atau tersirat,

dan mana-mana kontrak yang dibuat sedemikian hendaklah berkesan di sisi undang-undang dan hendaklah mengikat syarikat itu dan penggantinya dan semua pihak lain kepadanya dan boleh diubah atau dilaksanakan mengikut cara yang ia dibenarkan dibuat.

(2) Suatu dokumen atau prosiding yang menghendaki pengesahan oleh suatu syarikat Langkawi boleh ditandatangani oleh seorang pegawai yang diberi kuasa syarikat itu dan tidak perlu dibuat di bawah meterai perbadanannya.

(3) Suatu syarikat Langkawi boleh, secara bertulis di bawah meterai perbadanannya, memberi kuasa kepada mana-mana orang, sama ada secara am atau berkenaan dengan apa-apa perkara yang dinyatakan sebagai ejen atau wakilnya, untuk menyempurnakan surat ikatan bagi pihaknya, dan suatu surat ikatan yang ditandatangani oleh ejen atau wakil itu bagi pihak syarikat itu di bawah meterainya atau di bawah meterai yang sesuai bagi syarikat itu, hendaklah mengikat syarikat itu; dan semua orang yang berurusan dengan suci hati hendaklah berhak untuk menganggap penyempurnaan surat ikatan itu adalah secara biasa dan patut, dan untuk bertindak dengan sewajarnya.

(4) Sesuatu syarikat Langkawi boleh, jika dibenarkan oleh perkara persatuannya, menubuhkan sesuatu cawangan di mana-mana bahagian dunia tetapi ia tidak boleh menubuhkan sesuatu cawangan di mana-mana bahagian di Malaysia di luar Langkawi.

(5) Suatu syarikat Langkawi dan mana-mana cawangan syarikat itu boleh mempunyai untuk kegunaan di mana-mana tempat di luar Langkawi suatu meterai perbadanan pendua yang adalah suatu faksimile meterai perbadanan syarikat itu dengan penambahan pada mukanya nama cawangan itu; dan meterai itu hendaklah dikenali sebagai meterai cawangan.

(6) Jika suatu syarikat Langkawi telah menubuhkan suatu cawangan ia boleh, dalam surat cara yang menubuhkan cawangan itu atau dalam suatu surat cara yang kemudiannya yang ditandatangani atau dimeteraikan oleh setiausaha atau di bawah meterainya sendiri,

melantik seorang atau lebih untuk menjadi pengarah cawangan dan untuk menubuhkan suatu lembaga tempatan dan membuat peruntukan bagi suatu meterai cawangan dan bagi penjagaannya dan menetapkan orang yang boleh melekatkan meterai itu; dan tertakluk kepada apa-apa arahan atau sekatan yang dikenakan dari semasa ke semasa oleh pengarah syarikat itu, suatu cawangan hendaklah mempunyai kuasa untuk mengikat syarikat itu dan menerbitkan syer atau debentur syarikat itu.

(7) Sesuatu cawangan boleh mengadakan transaksi mengikut cara yang sama sebagaimana syarikat Langkawi boleh mengadakan transaksi.

(8) Surat cara yang dibuat atau disahkan di bawah atau dengan menggunakan mana-mana meterai cawangan sesuatu syarikat Langkawi hendaklah sama berkesannya seolah-olah meterai perbadanan syarikat itu telah dilekatkan padanya; dan tarikh bila dan tempat di mana meterai cawangan itu dilekatkan pada mana-mana surat cara hendaklah ditunjukkan pada surat cara itu.

Larangan terhadap menjalankan perniagaan apabila syarikat Langkawi tidak ada anggota

33. (1) Tertakluk kepada subseksyen (2), jika pada bila-bila masa sesuatu syarikat Langkawi tidak ada anggota dan menjalankan perniagaan selama tempoh lebih dari enam bulan semasa ia tidak ada anggota, tiap-tiap pegawai, pekhidmat, pekerja atau ejen syarikat itu semasa syarikat itu menjalankan perniagaan selepas tempoh enam bulan itu yang menyedari bahawa syarikat itu tidak ada anggota hendaklah bertanggungjawab, dan jika lebih daripada seorang, bersesama dan berasingan, untuk membayar keseluruhan hutang syarikat itu yang diadakan semasa syarikat itu menjalankan perniagaan selepas tempoh enam bulan itu, dan pegawai, pekhidmat, pekerja atau ejen sedemikian melakukan suatu kesalahan terhadap Akta ini jika syarikat itu menjalankan perniagaan selepas tempoh enam bulan itu.

(2) Subseksyen (1) tidak terpakai berkenaan dengan seorang pegawai, pekhidmat, pekerja atau ejen suatu syarikat Langkawi yang tidak ada anggota yang menjalankan perniagaan syarikat itu selepas tempoh enam bulan, jika pegawai, pekhidmat, pekerja atau ejen itu berbuat sedemikian menurut kuasa suatu arahan Mahkamah atau di bawah arahan seorang pelikuidasi yang diluluskan yang dilantik berkenaan dengan syarikat itu.

BAHAGIAN IV

SYER DAN GADAIAN

PENGGAL 1

SYER

Penyata pengumpulan

34. (1) Jika sesuatu syarikat Langkawi membuat apa-apa pengumpulan syernya, syarikat itu hendaklah membuat suatu penyata mengenai pengumpulan itu yang menyatakan —

- (a) bilangan syer yang terkandung dalam pengumpulan itu dan amaun yang dibayar bagi syer itu;
- (b) tarikh pengumpulan itu;
- (c) amaun (jika ada) yang disifatkan dibayar, atau yang genap masa dan kena dibayar, bagi pengumpulan setiap syer;
- (d) jika modal syarikat itu terbahagi kepada syer daripada kelas yang berlainan, kelas syer yang setiap syer dalam pengumpulan itu tergolong; dan
- (e) nama penuh dan alamat setiap penerima umpukan itu dan bilangan serta kelas syer yang diumpukkan kepadanya.

(2) Penyata di bawah subseksyen (1) hendaklah disimpan di pejabat berdaftar syarikat Langkawi itu.

(3) Pendaftar boleh, sebagaimana dalam hal keadaan yang disifatkan perlu melalui notis bertulis, menghendaki suatu syarikat Langkawi untuk menyerahkan kepada Pendaftar suatu penyata berkenaan dengan mana-mana pengumpulan syernya.

(4) Jika berlaku keingkaran pada mematuhi seksyen ini, tiap-tiap pegawai syarikat Langkawi itu yang ingkar melakukan suatu kesalahan terhadap Akta ini.

Penalti: Lima ribu ringgit. Penalti ingkar.

Panggilan

35. Sesuatu syarikat Langkawi boleh —

- (a) membuat perkiraan, mengenai penerbitan syer, bagi mengubah amaun dan masa pembayaran panggilan antara pemegang syer;
- (b) menerima daripada mana-mana anggota keseluruhan atau mana-mana bahagian daripada amaun yang masih tidak dibayar atas mana-mana syer walaupun tiada mana-mana bahagian daripada amaun itu telah dipanggil; dan
- (c) membayar dividen seimbang dengan amaun yang dibayar atas setiap syer jika suatu amaun yang lebih besar dibayar atas beberapa syer daripada bagi syer yang lain.

Liabiliti rizab

36. Sesuatu syarikat Langkawi boleh, melalui ketetapan khas, menentukan bahawa mana-mana bahagian modal syer yang tidak dipanggil bagi syarikat itu tidak boleh dipanggil kecuali dalam keadaan syarikat itu digulung, tetapi tiada ketetapan sedemikian boleh menjejaskan hak yang diperolehi oleh mana-mana orang sebelum ketetapan itu diluluskan.

Akaun premium syer

37. (1) Jika sesuatu syarikat Langkawi menerbitkan syer dengan harga premium, sama ada bagi wang tunai atau selainnya, suatu jumlah wang yang sama banyak dengan amaun atau nilai agregat bagi premium atas syer itu hendaklah dipindahkan ke dalam sesuatu akaun yang dinamakan "akaun premium syer", dan peruntukan Akta ini yang berhubungan dengan pengurangan modal syer sesuatu syarikat Langkawi hendaklah, kecuali sebagaimana yang diperuntukkan dalam seksyen ini, terpakai seolah-olah akaun premium syer itu adalah modal syer berbayar syarikat itu.

(2) Jika aset diperolehi melalui penerbitan syer suatu syarikat Langkawi dan tiada apa-apa balasan direkodkan, aset yang diperolehi sedemikian hendaklah dinilai, dan jika nilai aset itu melebihi nilai

tara syer sedemikian, perbezaan antara nilai tara syer itu dengan nilai aset yang diperolehi sedemikian hendaklah dipindahkan ke dalam akaun premium syer,

(3) Akaun premium syer boleh, walaupun apa-apa yang terkandung dalam subseksyen (1), dipakai oleh syarikat Langkawi itu—

- (a) bagi membayar syer tidak terbit yang akan diterbitkan kepada anggota syarikat itu sebagai syer bonus berbayar penuh;
- (b) bagi menghapuskiran—
 - (i) perbelanjaan awal syarikat itu; atau
 - (ii) perbelanjaan bagi, atau komisen yang dibayar atau diskaun yang dibenarkan atas, mana-mana penerbitan syer dalam, atau debentur, syarikat itu; atau
- (c) bagi mengadakan premium yang kena dibayar atas penebusan debentur atau syer keutamaan boleh tebus.

(4) Jika syer diterbitkan bagi suatu balasan selain wang tunai di bawah subseksyen (2), syer itu tidak boleh diumpukkan sehingga—

- (a) aku janji yang menjadi balasan itu telah dilaksanakan; atau
- (b) aset yang menjadi balasan itu telah dipindahkan kepada syarikat itu; dan aset hendaklah dianggap sebagai telah dipindahkan kepada suatu syarikat—
 - (i) dalam hal barang, apabila pemunyaan atau hak kepunyaan barang itu berpindah kepada syarikat itu atau apabila barang itu dihantarkan kepadanya;
 - (ii) dalam hal surat cara boleh niaga, apabila syarikat itu menjadi berhak untuk menguatkuasakan segala hak yang termaktub dalamnya atas namanya sendiri tanpa persetujuan mana-mana orang lain; dan
 - (iii) dalam mana-mana hal lain, apabila pemunyaan atau hak yang kurang yang dipersetujui untuk terletak hak pada syarikat itu telah diletakhakkan dengan sahnya pada syarikat itu.

Kuasa untuk menerbitkan syer dan hak pengundian

38. (1) Sesuatu syarikat Langkawi hendaklah mempunyai kuasa untuk menerbitkan bilangan syer yang dinyatakan dalam memorandumnya, yang boleh dibahagikan kepada satu kelas atau lebih, dengan apa-apa nama, keutamaan, batasan dan hak relatif sebagaimana yang hendaklah dinyatakan atau diperuntukkan dalam perkara persatuan, dan semua harga dan nilai yang diberikan berkenaan dengan syer hendaklah dinyatakan dalam mata wang selain mata wang Malaysia.

(2) Perkara persatuan boleh membataskan atau menafikan hak pengundian, atau memperuntukkan hak pengundian khas, bagi syer daripada mana-mana kelas atau syer dalam mana-mana kelas setakat ia tidak menjadi tidak selaras dengan peruntukan Akta ini atau peraturan-peraturan.

Syarikat Langkawi berurus niaga dalam syer sendiri, dsb.

39. (1) Sesuatu syarikat Langkawi boleh memberikan bantuan kewangan, sama ada secara langsung atau tidak langsung, bagi maksud atau berkaitan dengan pembelian syernya sendiri atau syer mana-mana subsidiarinya atau syarikat pemegangannya—

- (a) jika transaksi itu telah diluluskan melalui suatu ketetapan khas syarikat itu, dan pengarah telah memperakukan kepada mesyuarat itu, secara bertulis, dengan maksud bahawa tiada apa-apa alasan yang munasabah bagi mempercayai bahawa—
 - (i) syarikat itu adalah, atau selepas memberi bantuan kewangan itu akan menjadi, tidak solven; atau
 - (ii) nilai boleh hasil aset syarikat itu, tidak termasuk amaun apa-apa bantuan kewangan dalam bentuk pinjaman dan dalam bentuk aset yang disandarkan atau dibebankan bagi menjamin sesuatu jaminan, akan, selepas memberikan bantuan kewangan atau pinjaman itu, menjadi kurang daripada agregat liabiliti dan modal yang dinyatakan bagi syarikat itu; atau
- (b) kepada pekerja (selain seorang pekerja yang juga menjadi seorang pengarah) syarikat itu atau mana-mana subsidiarinya atau syarikat pemegangannya.

(2) Sesuatu syarikat Langkawi boleh membeli, mengambil, menerima atau selainnya memperoleh, memegang, memiliki, menandatangani, memindahkan atau selainnya melupuskan syernya sendiri, atau syer mana-mana subsidiarinya atau syarikat pemegangannya, tetapi pembelian syer itu, sama ada secara langsung atau tidak langsung, boleh dibuat hanya setakat lebihan terperoleh yang tidak dirizabkan dan tidak tersekat yang ada bagi pembelian itu; dan jika perkara persatuan memperuntukkan sedemikian, atau dengan undi pengesahan pemegang sekurang-kurangnya tiga perempat daripada semua syer yang berhak mengundi mengenainya, setakat lebihan modal yang tidak dirizabkan dan tidak tersekat yang ada bagi pembelian itu.

(3) Walau apa pun subseksyen (2), dengan syarat bahawa tiada apa-apa alasan yang munasabah bagi mempercayai bahawa syarikat itu adalah, atau selepas pembayaran itu akan menjadi, tidak solven atau bahawa nilai boleh hasil aset syarikat itu akan, selepas pembayaran itu, menjadi kurang daripada agregat liabiliti dan modal yang dinyatakan bagi syarikat itu, suatu syarikat Langkawi boleh membeli atau selainnya memperoleh syernya sendiri bagi maksud—

- (a) menghapuskan syer pecahan;
- (b) membayar pemegang syer yang menentang yang berhak mendapat bayaran bagi syer mereka di bawah peruntukan Akta ini atau peraturan-peraturan; atau
- (c) melaksanakan, tertakluk kepada Akta ini, penarikan balik syer boleh tebus syarikat itu melalui penebusan atau pembelian dengan harga yang tidak melebihi harga penebusan.

Pengkenselan syer perolehan semula oleh syarikat Langkawi

40. Sesuatu syarikat Langkawi boleh pada bila-bila masa, melalui ketetapan pengarahnya, mengkenselkan semua atau mana-mana bahagian syer syarikat itu daripada mana-mana kelas yang diperolehnya semula, selain syer boleh tebus yang telah ditebus atau dibeli, dan dalam perkara sedemikian suatu pernyataan mengenai pengkenselan itu hendaklah diserahkan kepada Pendaftar dalam masa tiga puluh hari dari tarikh pengkenselan itu.

Menerbitkan syer dengan diskaun

41. (1) Tertakluk kepada seksyen ini, sesuatu syarikat Langkawi boleh menerbitkan dengan diskaun syer syarikat itu daripada kelas yang telah pun diterbitkan.

(2) Tiada apa-apa syer boleh diterbitkan dengan diskaun tanpa terlebih dahulu mendapatkan kelulusan bertulis Pendaftar.

(3) Sesuatu permohonan bagi menerbitkan syer dengan diskaun hendaklah dibuat kepada sesuatu entiti pengurusan, dan hendaklah disertakan dengan nama dan alamat semua anggota bersama dengan notis yang dialamatkan kepada anggota itu yang memberitahu mereka tentang penerbitan yang dicadangkan itu dan menyatakan kadar diskaun maksimum yang padanya syer itu akan diterbitkan.

(4) Entiti pengurusan yang kepadanya permohonan dibuat hendaklah, apabila menerima permohonan dan notis itu, menghantarkan notis itu dan memberitahu anggota yang kepadanya notis itu dialamatkan bahawa apa-apa bantahan hendaklah disampaikan supaya dapat diterima oleh entiti pengurusan itu dalam masa empat puluh dua hari dari tarikh notis itu.

(5) Apabila tamatnya tempoh enam puluh hari dari tarikh penghantaran notis yang dirujuk dalam subseksyen (3), entiti pengurusan itu hendaklah menyerahkan permohonan itu, bersama dengan apa-apa bantahan yang diterimanya, kepada Pendaftar.

(6) Jika mana-mana permohonan sedemikian dibuat, Pendaftar boleh, jika memandangkan kepada hal keadaan dalam perkara itu dan apa-apa bantahan, difikirkannya patut berbuat demikian, meluluskan penerbitan itu atas apa-apa terma dan syarat yang difikirkannya sesuai.

Perubahan modal syer

42. (1) Sesuatu syarikat Langkawi boleh, melalui ketetapan khas, mengubah syarat memorandum dan perkara persatuannya mengikut mana-mana satu cara atau lebih daripada yang berikut:

(a) menambahkan modal syernya dengan mewujudkan syer yang baru sebanyak amaun yang difikirkannya suai manfaat;

- (b) menyatukan dan membahagikan semua atau mana-mana modal syernya kepada syer yang lebih besar amaunnya daripada syernya yang ada;
- (c) memecah bahagikan syernya atau mana-mana daripada syer itu kepada syer yang amaunnya kecil daripada yang ditetapkan oleh memorandum atau perkara persatuan, dengan sedemikian cara supaya dalam pecah bahagian itu kadar antara amaun berbayar dengan amaun (jika ada) tidak berbayar atas setiap syer yang dikurangkan hendaklah sama seperti dalam perkara syer yang daripadanya syer yang dikurangkan itu diperoleh;
- (d) menukarkan semua atau mana-mana syer berbayarnya kepada saham dan menukarkan semula saham itu kepada syer berbayar daripada apa-apa peringkat nilai;
- (e) mengkenselkan syer yang, pada tarikh ketetapan diluluskan bagi maksud itu, belum diambil atau belum dipersetujui untuk diambil oleh mana-mana orang, dan mengurangkan amaun modal syer itu sebanyak amaun syer yang telah dikenselkan itu;
- (f) mendenominasikan semula mata wang mana-mana syer dengan menukar syer yang didenominasikan dalam satu mata wang kepada nombor syer yang sama bagi mata wang lain, dengan terlebih dahulu mendapat persetujuan bertulis daripada pemiutang, jika ada.

(2) Sesuatu denominasi semula mata wang bagi mana-mana syer di bawah perenggan (X)(f) hendaklah disifatkan sebagai tidak membawa kesan kepada pengkenselan syer yang sedia ada dan penerbitan syer yang baru.

(3) Suatu pengkenselan syer di bawah perenggan(1)(e) tidak boleh disifatkan sebagai suatu pengurangan modal syer mengikut pengertian Akta ini.

(4) Jika, di bawah subseksyen (1), sesuatu syarikat Langkawi telah menambahkan modal syernya dengan melebihi modal yang dinyatakan dalam memorandumnya dengan syer daripada amaun yang ditetapkan, ia hendaklah, dalam masa satu bulan selepas ketetapan yang membenarkan penambahan itu diluluskan, menyebabkan diserahkan kepada Pendaftar suatu notis mengikut bentuk yang ditetapkan mengenai penambahan itu.

(5) Jika mana-mana syarikat Langkawi tidak mematuhi subseksyen (4), syarikat itu dan tiap-tiap pegawai syarikat itu yang ingkar melakukan suatu kesalahan terhadap Akta ini.

Penalti: Lima ribu ringgit. Penalti ingkar.

Pengesahan syer yang diterbitkan dengan tidak sepatutnya

43. Jika sesuatu syarikat Langkawi berupa telah menerbitkan atau mengumpulkan syer, dan penerbitan atau pengumpulan syer itu adalah tidak sah oleh sebab mana-mana peruntukan Akta ini atau memorandum atau perkara persatuan syarikat itu atau selainnya, atau terma penerbitan atau pengumpulan itu adalah tidak selaras dengan atau tidak dibenarkan oleh mana-mana peruntukan itu, Mahkamah boleh, apabila suatu permohonan diserahkan kepadanya oleh syarikat itu atau oleh seorang pemegang atau pemegang gadai janji mana-mana syer itu atau oleh seorang pemiutang syarikat itu, dan apabila berpuas hati bahawa dalam semua hal keadaan adalah adil dan saksama untuk berbuat demikian, membuat suatu perintah yang mengesahkan penerbitan atau pengumpulan syer itu, atau yang mengesahkan terma penerbitan atau pengumpulannya, atau kedua-duanya, tertakluk kepada apa-apa syarat, jika ada, yang dikenakan, dan apabila perintah sedemikian dibuat dan suatu salinan perintah itu diserahkan oleh syarikat itu atau oleh pemegang, pemegang gadai janji atau pemiutang sedemikian kepada Pendaftar, syer itu hendaklah disifatkan sebagai telah diterbitkan atau diumpukkan secara sah atas terma penerbitan atau pengumpulannya sebagaimana yang diubah oleh syarat, jika ada, yang dikenakan oleh Mahkamah.

Ketetapan khas bagi pengurangan modal syer

44. (1) Tertakluk kepada pengesahan oleh Mahkamah, sesuatu syarikat Langkawi boleh, jika dibenarkan sedemikian oleh perkara persatuannya, melalui ketetapan khas mengurangkan modal syernya mengikut apa-apa cara dan khususnya, tanpa mengehendkan keluasan makna yang disebut di atas, boleh —

- (a) menghapuskan atau mengurangkan liabiliti ke atas mana-mana syernya berkenaan dengan modal syer yang tidak

- (c) membayar mana-mana modal syer berbayar yang melebihi keperluan syarikat itu, atau yang selainnya adalah bagi kepentingan syarikat itu keseluruhannya untuk dibayar,

dan boleh, setakat yang perlu, mengubah memorandumnya dengan mengurangkan amaun modal syernya dan amaun syernya dengan sewajarnya.

(2) Jika pengurangan modal syer yang dicadangkan itu melibatkan pengurangan liabiliti berkenaan dengan modal syer tidak berbayar atau pembayaran kepada mana-mana pemegang syer mana-mana modal syer berbayar, dan dalam mana-mana hal lain jika Mahkamah mengarahkan demikian —

- (a) tiap-tiap pemiutang syarikat Langkawi yang, pada tarikh yang ditetapkan oleh Mahkamah, berhak terhadap mana-mana hutang atau tuntutan yang, jika tarikh itu adalah permulaan bagi penggulungan syarikat itu, boleh diterima sebagai bukti terhadap syarikat itu, adalah berhak membantah pengurangan itu;
- (b) Mahkamah, melainkan jika berpuas hati dengan akuan berkanun oleh pengarah bahawa tidak terdapat pemiutang sedemikian, hendaklah menetapkan suatu senarai pemiutang yang berhak untuk membantah, dan bagi maksud itu hendaklah menentukan, seboleh-bolehnya tanpa menghendaki suatu permohonan daripada mana-mana pemiutang, nama pemiutang itu dan jenis serta amaun hutang atau tuntutannya, dan boleh menyiarkan notis yang menetapkan hari terakhir yang pada atau sebelumnya pemiutang yang tidak dicatatkan dalam senarai itu boleh menuntut untuk dicatatkan sedemikian; dan
- (c) jika seorang pemiutang yang dicatatkan dalam senarai itu yang hutang atau tuntutannya tidak dijelaskan atau belum ditentukan tidak bersetuju dengan pengurangan itu, Mahkamah boleh mengetepikan persetujuan pemiutang itu apabila syarikat Langkawi itu menjamin pembayaran hutang atau tuntutannya dengan mengagihkan, sebagaimana yang diarahkan oleh Mahkamah—
 - (i) jika syarikat itu mengakui amaun penuh hutang atau tuntutan itu atau, walaupun tidak mengakuinya, bersetuju untuk memperuntukkan baginya, amaun penuh hutang atau tuntutan itu; atau

(ii) jika syarikat itu tidak mengakui, dan tidak bersedia untuk memperuntukkan baginya, amaun penuh hutang atau tuntutan itu, atau jika amaun itu adalah kontinjen atau belum ditentukan, suatu amaun yang ditetapkan oleh Mahkamah selepas siasatan dan hukuman yang seumpamanya seolah-olah syarikat itu digulungkan oleh Mahkamah.

(3) Walau apa pun peruntukan subseksyen (2), Mahkamah boleh, dengan mengambil kira hal keadaan kes itu, mengarahkan bahawa semua atau mana-mana peruntukan subseksyen itu tidak terpakai berkaitan dengan mana-mana kelas pemiutang.

(4) Mahkamah, jika berpuas hati berkenaan dengan tiap-tiap pemiutang yang di bawah subseksyen (2) berhak untuk membantah, bahawa sama ada persetujuannya terhadap pengurangan itu telah diperoleh, atau hutang atau tuntutannya telah dijelaskan atau telah ditentukan atau telah dijamin, boleh membuat suatu perintah yang mengesahkan pengurangan itu atas apa-apa terma dan syarat yang difikirkannya sesuai, dan boleh menghendaki syarikat Langkawi itu untuk menyiarkan sebagaimana yang diarahkan oleh Mahkamah sebab-sebab bagi pengurangan itu atau apa-apa maklumat lain sebagaimana yang difikirkan suai manfaat oleh Mahkamah, dan, jika difikirkan sesuai oleh Mahkamah, sebab-sebab yang membawa kepada pengurangan itu.

(5) Suatu perintah yang dibuat di bawah subseksyen (4) hendaklah menunjukkan amaun modal syer syarikat Langkawi itu sebagaimana yang diubah oleh perintah itu, bilangan syer yang kepadanya syer itu hendak dibahagikan dan amaun setiap syer dan amaun, jika ada, pada tarikh perintah itu, yang disifatkan sebagai berbayar ke atas setiap syer.

(6) Apabila salinan pejabat perintah itu diserahkan kepada Pendaftar, ketetapan bagi pengurangan modal syer sebagaimana yang disahkan oleh perintah yang diserahkan sedemikian hendaklah berkuat kuasa.

(7) Perakuan Pendaftar hendaklah menjadi keterangan konklusif bahawa semua kehendak Akta ini berkenaan dengan pengurangan modal syer telah dipatuhi dengan dan bahawa modal syer suatu syarikat Langkawi adalah sebagaimana yang dinyatakan dalam perintah itu.

(8) Apabila salinan perintah itu diserahkan, butir-butir yang ditunjukkan dalam perintah itu menurut subseksyen (5) hendaklah disifatkan sebagai digantikan dengan butir-butir yang bersamaan dalam memorandum, dan penggantian sedemikian dan apa-apa tambahan yang diperintahkan oleh Mahkamah supaya dibuat pada nama syarikat Langkawi itu hendaklah (dalam hal apa-apa tambahan kepada nama, untuk tempoh sebagaimana yang dinyatakan dalam perintah Mahkamah itu) disifatkan sebagai suatu perubahan kepada memorandum bagi maksud Akta ini.

(9) Seseorang anggota, yang dahulu atau yang ada sekarang, tidak bertanggung berkenaan dengan mana-mana syer terhadap apa-apa panggilan atau caruman yang melebihi dalam amaunnya perbezaan antara amaun syer sebagaimana yang ditetapkan oleh perintah itu dan amaun yang dibayar, atau amaunnya yang dikurangkan yang disifatkan sebagai telah dibayar atas syer itu, mengikut mana-mana yang berkenaan, tetapi jika mana-mana pemiutang yang berhak membantah pengurangan itu, oleh sebab kejahilannya tentang prosiding bagi pengurangan itu, atau tentang jenis dan kesan prosiding itu terhadap tuntutan, tidak dicatatkan dalam senarai pemiutang, dan selepas pengurangan itu syarikat Langkawi itu tidak dapat, mengikut pengertian peruntukan Akta ini berkenaan dengan penggulangan oleh Mahkamah, membayar amaun hutang atau tuntutannya—

- (a) tiap-tiap orang yang menjadi anggota syarikat Langkawi itu pada tarikh penyerahan salinan perintah Mahkamah bagi pengurangan itu bertanggung untuk menyumbang bagi pembayaran hutang atau tuntutan itu sebanyak amaun yang tidak melebihi amaun yang dia sepatutnya bertanggung menyumbang jika syarikat itu telah mula digulung pada had sebelum tarikh itu; dan
- (b) jika syarikat Langkawi itu digulung, Mahkamah, atas permohonan mana-mana pemiutang itu dan apabila terbukti kejahilannya mengenai prosiding bagi pengurangan itu atau mengenai jenis dan kesan prosiding itu terhadap tuntutannya, boleh menetapkan suatu senarai orang yang bertanggung menyumbang, dan membuat serta menguatkuasakan panggilan dan perintah ke atas pencarum yang ditetapkan dalam senarai itu, seolah-olah dia adalah pencarum biasa dalam suatu penggulangan,

tetapi tiada apa-apa jua pun dalam subseksyen ini boleh menyentuh hak pencarum-pencarum itu sesama mereka sendiri.

(10) Mana-mana pegawai suatu syarikat Langkawi yang —

- (a) dengan sengaja menyembunyikan nama mana-mana pemiutang yang berhak untuk membantah terhadap pengurangan itu;
- (b) dengan sengaja menyalah nyatakan jenis atau amaun hutang atau tuntutan mana-mana pemiutang; atau
- (c) membantu, bersubahat atau menjadi pihak kepada mana-mana penyembunyian atau salah nyataan itu,

adalah melakukan suatu kesalahan terhadap Akta ini.

Penalti: Sepuluh ribu ringgit.

Hak pemegang syer keutamaan hendaklah dinyatakan dalam perkara persatuan

45. (1) Tiada mana-mana syarikat Langkawi boleh mengumpukkan suatu syer keutamaan, atau menukarkan suatu syer terbitan kepada suatu syer keutamaan, melainkan jika dinyatakan dalam perkara persatuannya hak pemegang syer itu berkenaan dengan pembayaran balik modal, penyertaan dalam aset lebihan dan keuntungan, dividen kumulatif atau tidak kumulatif, pengundian dan keutamaan pembayaran modal dan dividen berhubung dengan syer lain atau kelas syer keutamaan yang lain.

(2) Penerbitan syer keutamaan oleh suatu syarikat Langkawi yang berperingkat *part passu* dengan syer keutamaan yang sedia ada yang diterbitkan oleh syarikat itu hendaklah disifatkan sebagai suatu perubahan hak yang berkembar dengan syer keutamaan yang sedia ada itu melainkan jika penerbitan syer yang mula-mula disebut itu dibenarkan oleh terma penerbitan syer keutamaan yang sedia ada atau oleh perkara persatuannya yang berkuat kuasa pada masa syer keutamaan yang sedia ada itu diterbitkan.

(3) Jikaberlaku keingkaran padamematuhi seksyen ini, syarikat Langkawi itu dan tiap-tiap pegawai syarikat itu yang ingkar melakukan suatu kesalahan terhadap Akta ini.

Syer keutamaan boleh tebus

46. (1) Tertakluk kepada seksyen ini, sesuatu syarikat Langkawi yang mempunyai modal syer boleh, jika dibenarkan sedemikian oleh perkara persatuannya, menerbitkan syer keutamaan yang boleh,

atau atas opsyen syarikat itu akan boleh, ditebus dan penebusan itu hendaklah dibuat hanya atas apa-apa terma dan mengikut apa-apa cara sebagaimana yang diperuntukkan oleh perkara persatuan itu.

(2) Penebusan itu tidaklah boleh dikira sebagai mengurangkan amaun modal syer yang dibenarkan bagi syarikat itu.

(3) Syer itu tidak boleh ditebus —

(a) kecuali daripada keuntungan yang selainnya boleh diadakan untuk dividen, atau daripada hasil penerbitan baru syer yang dibuat bagi maksud penebusan itu; dan

(b) melainkan jika syer itu berbayar penuh.

(4) Premium, jika ada, yang kena dibayar atas penebusan hendaklah diperuntukkan daripada keuntungan atau akaun premium syer sebelum syer itu ditebus.

(5) Jika mana-mana syer itu ditebus selainnya daripada hasil suatu penerbitan yang baru, maka hendaklah, daripada keuntungan yang selainnya boleh diadakan untuk dividen, dipindahkan kepada sesuatu rizab yang dinamakan "rizab penebusan modal" suatu jumlah wang yang sama banyak dengan amaun nominal syer yang ditebus, dan peruntukan Akta ini yang berhubungan dengan pengurangan modal syer suatu syarikat Langkawi hendaklah, kecuali sebagaimana yang diperuntukkan dalam seksyen ini, terpakai seolah-olah rizab penebusan modal itu adalah modal syer berbayar syarikat itu.

(6) Jika, menurut seksyen ini, suatu syarikat Langkawi telah menebus, atau hampir hendak menebus, mana-mana syer keutamaan, syarikat itu boleh menerbitkan syer hingga setakat amaun nominal syer yang ditebus atau yang hendak ditebus seolah-olah syer itu tidak pernah diterbitkan, dan dengan demikian itu modal syer syarikat itu tidak boleh, bagi maksud apa-apa fi di bawah Akta ini, disifatkan sebagai telah ditambah dengan penerbitan itu, tetapi jika syer baru diterbitkan sebelum penebusan syer lama, syer baru itu tidak boleh, setakat yang berhubungan dengan apa-apa fi di bawah Akta ini, disifatkan sebagai telah diterbitkan menurut subseksyen ini melainkan jika syer lama itu telah ditebus dalam masa satu bulan selepas penerbitan syer baru itu.

(7) Rizab penebusan modal boleh digunakan bagi membayar syer yang tidak diterbitkan bagi syarikat itu yang hendak diterbitkan kepada anggota syarikat itu sebagai syer bonus berbayar penuh.

(8) Jika suatu syarikat Langkawi menebus mana-mana syer keutamaan boleh tebus, syarikat itu hendaklah, dalam masa satu bulan selepas berbuat demikian, memberikan notis mengenainya kepada Pendaftar yang menyatakan syer yang telah ditebus itu.

Sekatan terhadap mempelawa pelaburan daripada awam

47. (1) Sesuatu syarikat Langkawi tidak boleh membuat apa-apa tawaran atau mengeluarkan apa-apa pelawaan kepada awam untuk melanggan atau membeli apa-apa syer atau kepentingan dalam syarikat itu kecuali jika tawaran atau pelawaan itu berhubung dengan syer atau kepentingan yang memberi pemegang syer atau kepentingan itu hak untuk menggunakan atau menikmati apa-apa kemudahan atau aktiviti percutian atau rekreasi yang berhubung dengan kapal layar.

(2) Peruntukan Penggal 1 dan 5 Bahagian IV Akta Syarikat 1965 hendaklah terpakai berhubung dengan apa-apa tawaran atau pelawaan yang dibuat oleh suatu syarikat Langkawi kepada awam untuk melanggan atau membeli syer atau kepentingannya seolah-olah tawaran atau pelawaan itu kepada awam dibuat oleh suatu kelab rekreasi tidak tersenarai, tertakluk kepada apa-apa pengubahsuaian sebagaimana yang Menteri boleh membuat melalui perintah supaya selaras dengan tujuan dan maksud Akta ini, dan khususnya rujukan kepada "syarikat" hendak dikira sebagai rujukan kepada suatu syarikat Langkawi.

(3) Bagi maksud seksyen ini —

"kelab rekreasi tidak tersenarai" ertinya sesuatu perbadanan yang memberi pemegang syernya hak untuk menggunakan atau menikmati apa-apa kemudahan atau aktiviti percutian atau rekreasi yang berhubung dengan kapal layar dan yang syernya tidak tersenarai atau dicadangkan untuk disenaraikan untuk sebut harga di mana-mana pasaran saham suatu bursa saham;

"kepentingan" ertinya apa-apa hak untuk mengambil bahagian atau kepentingan, sama ada boleh dikuatkuasakan atau tidak dan sama ada sebenar, prospektif atau kontingen dalam apa-apa skim berkongsi masa atau kontrak pelaburan, sama ada hak atau

kepentingan itu terbukti dengan suatu kontrak formal dan sama ada atau tidak hak atau kepentingan itu berhubung dengan suatu aset fizikal, tetapi tidak termasuk —

- (a) apa-apa syer dalam atau debentur suatu perbadanan; atau
- (b) apa-apa kepentingan dalam suatu perjanjian perkongsian melainkan jika perjanjian itu —
 - (i) berhubung dengan sesuatu pengusahaan, skim, perusahaan atau kontrak pelaburan yang ditaja oleh, atau bagi pihak, seorang yang perniagaan biasanya adalah atau termasuk penajaan pengusahaan, skim, perusahaan atau kontrak pelaburan yang seumpama, sama ada atau tidak orang itu adalah suatu pihak kepada perjanjian itu; atau
 - (ii) adalah suatu perjanjian, atau berada dalam suatu kelas perjanjian, yang ditetapkan oleh peraturan-peraturan bagi maksud perenggan ini;

"kontrak pelaburan"ertinya apa-apa kontrak, skim atau perkiraan yang pada matannya dan tanpa mengira bentuknya memberi pelabur hak untuk menggunakan atau menikmati apa-apa kemudahan atau aktiviti percutian atau rekreasi yang berhubungan dengan kapal layar untuk suatu balasan dan seiama tempoh tidak kurang daripada dua belas bulan sama ada atau tidak secara berulang-ulang;

"pengubahsuaian" termasuklah pindaan,penyesuaian,perubahan, variasi, penambahan, pembahagian, penggantian atau pengecualian;

"skim berkongsi masa" ertinya sesuatu skim, pengusahaan atau perusahaan —

- (a) yang pesertanya adalah, atau boleh, berhak untuk menggunakan, mendiami atau memiliki, untuk dua tempoh atau lebih seiama tempoh yang skim, pengusahaan atau perusahaan itu, sama ada di Malaysia atau di tempat lain akan dikendalikan, suatu kapal layar yang kepadanya skim, pengusahaan atau perusahaan itu berkaitan; dan
- (b) yang akan dikendalikan untuk tempoh tidak kurang daripada tiga tahun.

Jenis syer

48. Syer atau kepentingan lain mana-mana anggota dalam sesuatu syarikat Langkawi adalah harta alih, yang boleh dipindah hakmilik mengikut cara yang diperuntukkan oleh perkara persatuan, dan tidak boleh daripada jenis harta tak alih.

Penomboran syer

49. (1) Setiap syer dalam sesuatu syarikat Langkawi hendaklah dikenali melalui nombornya yang sesuai.

(2) Walau apa pun subseksyen (1) —

- (a) jika pada bila-bila masa semua syer terbitan dalam suatu syarikat Langkawi, atau semua syer terbitan daripada sesuatu kelas tertentu dalam syarikat itu, telah membayar penuh dan berperingkat *part passu* bagi segala maksud, tiada mana-mana syer itu perlu selepas itu mempunyai suatu nombor pengenalan selagi syer itu tetap membayar penuh dan berperingkat *part passu* bagi segala maksud dengan semua syer yang sama kelasnya yang pada masa ini diterbitkan dan membayar penuh; atau
- (b) jika semua syer terbitan dalam suatu syarikat Langkawi adalah terbukti melalui perakuan mengikut seksyen 50 dan setiap perakuan itu dikenali dengan nombornya yang sesuai dan nombor itu direkodkan dalam daftar anggota, tiada mana-mana syer itu perlu mempunyai suatu nombor pengenalan.

Perakuan hendaklah menjadi keterangan hakmilik

50. (1) Sesuatu perakuan, di bawahmeterai suatu syarikat Langkawi atau mana-mana cawangan syarikat itu, yang menyatakan apa-apa syer yang dipegang oleh seseorang anggota hendaklah menjadi keterangan *prima facie* mengenai hakmiliknya terhadap syer itu.

(2) Tiap-tiap perakuan syer hendaklah di bawah meterai syarikat Langkawi itu atau suatu cawangan syarikat itu dan hendaklah menyatakan —

- (a) nama syarikat itu dan autoriti yang di bawahnya syarikat itu ditubuhkan;
- (b) alamat bagi pejabat berdaftar syarikat itu di Langkawi atau, jika perakuan itu dikeluarkan oleh suatu cawangan syarikat itu, alamat cawangan itu;
- (c) nilai nominal dan takat yang syer itu berbayar; dan
- (d) kelas syer.

(3) Kegagalan untuk mematuhi seksyen ini tidak boleh menyentuh hak mana-mana pemegang syer.

(4) Jika berlaku keingkaran pada mematuhi seksyen ini, syarikat Langkawi itu dan tiap-tiap pegawai syarikat itu yang ingkar melakukan suatu kesalahan terhadap Akta **ini**.

Syarikat Langkawi boleh mempunyai meterai syer

51. Sesuatu syarikat Langkawi boleh, jika dibenarkan oleh perkara persatuannya, mempunyai suatu meterai yang pada mukanya hendaklah terdapat nama syarikat itu dan perkataan "Meterai Syer", dan suatu perakuan syer di bawah meterai sedemikian hendaklah disifatkan sebagai telah dimeterai dengan meterai perbadanan syarikat itu bagi maksud Akta ini.

Surat cara pemindahan hakmilik dan pemindahan hakmilik oleh wakil diri

52. (1) Sesuatu syarikat Langkawi tidak boleh mendaftarkan suatu pemindahan hakmilik syer atau debentur melainkan jika suatu surat cara pemindahan hakmilik yang sempurna telah diserahkan kepada syarikat itu, tetapi subseksyen ini tidaklah menjejaskan apa-apa kuasa untuk mendaftarkan sebagai seorang pemegang syer atau pemegang debentur mana-mana orang yang kepadanya hak terhadap mana-mana syer dalam, atau debentur bagi, syarikat itu telah dipindahkan melalui kuat kuasa undang-undang.

(2) Sesuatu pemindahan hakmilik syer, debentur atau kepentingan lain seorang yang mati yang dibuat oleh wakil dirinya hendaklah, walaupun wakil diri itu sendiri bukannya seorang anggota syarikat itu, sama sahnyanya seolah-olah dia telah menjadi anggota sedemikian pada masa penyempurnaan surat cara pemindahan hakmilik itu.

(3) Apa-apa dokumen yang dikemukakan kepada suatu syarikat Langkawi yang menurut undang-undang adalah keterangan yang mencukupi bahawa probet wasiat, atau surat kuasa mentadbir harta pusaka, orang yang mati telah diberikan kepada seorang hendaklah diterima oleh syarikat itu, walaupun apa-apa jua pun dalam perkara persatuannya, sebagai keterangan yang mencukupi mengenai pemberian itu.

(4) Dalam seksyen ini "surat cara pemindahan hakmilik" termasuklah sesuatu permohonan bertulis bagi memindahkan syer, debentur atau kepentingan lain kepada seorang wakil diri.

Kewajipan syarikat Langkawi berkenaan dengan pengeluaran perakuan

53. (1) Tiap-tiap syarikat Langkawi hendaklah, dalam masa dua bulan selepas pengumpulan mana-mana syer atau debenturnya, dan dalam masa satu bulan selepas tarikh yang padanya suatu pemindahan hakmilik (selain pemindahan hakmilik yang syarikat itu, atas apa-apa sebab, berhak enggan untuk mendaftarkan dan tidak mendaftarkannya) mana-mana syer atau debenturnya diserahkan kepada syarikat itu, melengkapkan dan menyediakan untuk diserahkan semua perakuan dan debentur yang sesuai yang berkaitan dengan pengumpulan atau pemindahan hakmilik itu, melainkan jika syarat penerbitan syer atau debentur itu memperuntukkan selainnya.

(2) Jika berlaku keingkaran pada mematuhi seksyen ini, syarikat Langkawi itu dan tiap-tiap pegawai syarikat itu yang ingkar melakukan suatu kesalahan terhadap Akta ini.

Penalti: Lima ribu ringgit. Penalti ingkar.

(3) Jika sesuatu syarikat Langkawi yang terhadapnya suatu notis telah disampaikan yang menghendaknya memperbaiki apa-apa keingkaran pada mematuhi peruntukan seksyen ini tidak memperbaiki keingkaran itu dalam masa dua puluh satu hari selepas penyampaian notis itu, Mahkamah boleh, atas permohonan orang yang berhak diserahkan kepadanya perakuan bagi syer atau debentur itu,

mengarahkan syarikat itu dan tiap-tiap pegawai syarikat itu supaya memperbaiki keingkaran itu dalam inasa sebagaimana yang dinyatakan dalam arahan itu, dan arahan itu boleh memperuntukkan bahawa segala kos dan perbelanjaan bagi dan yang bersampingan dengan permohonan itu hendaklah ditanggung oleh syarikat itu dan oleh mana-mana pegawai syarikat itu yang ingkar mengikut apa-apa kadar yang difikirkan sesuai oleh Mahkamah.

PENGGAL 3

DAFTAR GADAIAN

Ketidapkajaan Penggal

54. Tiada apa-apa jua pun dalam Penggal ini terpakai bagi suatu gadaian yang diwujudkan oleh suatu syarikat Langkawi atau syarikat Langkawi asing ke atas harta di luar Malaysia.

Daftar gadaian

55. (1) Tiap-tiap syarikat Langkawi atau syarikat Langkawi asing hendaklah menyimpan di pejabat berdaftarnya sesuatu daftar gadaian dan hendaklah mencatatkan dalamnya semua gadaian yang khususnya melibatkan harta syarikat itu dalam masa satu bulan selepas pewujudan gadaian itu, dengan memberikan dalam setiap hal suatu perihalan ringkas mengenai harta yang digadaikan itu, amaun yang didapatkan melalui gadaian itu, nama pemegang gadaian atau orang yang berhak terhadap gadaian itu, dan butir yang berhubungan dengan penyelesaian atau pelepasan daripada gadaian sedemikian.

(2) Jika mana-mana harta suatu syarikat Langkawi atau syarikat Langkawi asing digadaikan tanpa dibuat catatan sebagaimana yang dikehendaki oleh subseksyen (1), tiap-tiap pegawai syarikat itu yang dengan disedarinya dan dengan sengaja memberi kuasa atau membenarkan peninggalan catatan sedemikian melakukan suatu kesalahan terhadap Akta ini.

Penalti: Sepuluh ribu ringgit.

(3) Tiap-tiap syarikat Langkawi atau syarikat Langkawi asing hendaklah menyebabkan suatu salinan tiap-tiap surat cara yang mewujudkan apa-apa gadaian disimpan di pejabat berdaftarnya.

(4) Daftar gadaian dan salinan surat cara yang disimpan menurut seksyen ini hendaklah terbuka untuk pemeriksaan oleh mana-mana pemiutang dengan kelulusan seorang pengarah atau anggota syarikat itu pada bila-bila masa yang munasabah tanpa apa-apa bayaran.

(5) Jika berlaku keingkaran pada mematuhi subseksyen (3) atau (4), syarikat Langkawi atau syarikat Langkawi asing itu dan tiap-tiap pegawai syarikat itu yang ingkar melakukan suatu kesalahan terhadap Akta ini.

Penalti: Lima ribu ringgit. Penalti ingkar.

BAHAGIAN V

PENGURUSAN DAN PENTADBIRAN

PENGGAL 1

PEJABAT DAN NAMA

Pejabat berdaftar syarikat Langkawi

56. (1) Tiap-tiap syarikat Langkawi hendaklah pada setiap masa mempunyai suatu pejabat berdaftar di Langkawi, yang mana pejabat itu adalah pejabat utama sesuatu entiti pengurusan.

(2) Jika berlaku keingkaran pada mematuhi seksyen ini, syarikat itu dan tiap-tiap pegawai syarikat itu yang ingkar adalah melakukan suatu kesalahan terhadap Akta ini.

Penalti: Lima ribu ringgit. Penalti ingkar.

Nama hendaklah dipamerkan di semua pejabat dan terdapat pada meterai, surat, dsb,

57. (1) Tiap-tiap syarikat Langkawi atau syarikat Langkawi asing hendaklah mengecat atau melekatkan, dan memastikan dicat atau dilekatkan, namanya di tempat yang mudah dilihat, dalam huruf rumi yang mudah dibaca, secara bercetak atau dalam format paparan elektronik atau selainnya, di tiap-tiap pejabat atau tempat di mana perniagaannya dijalankan.

Penalti: Lima ribu ringgit. Penalti ingkar.

(2) Nama sesuatu syarikat Langkawi atau syarikat Langkawi asing hendaklah (sama ada atau tidak syarikat itu menjalankan perniagaan di bawah suatu nama perniagaan) tertera dalam huruf rumi yang mudah dibaca pada—

- (a) meterainya; dan
- (b) semua surat perniagaan, penyata akaun, invois, notis rasmi, penerbitan, bil pertukaran, nota janji hutang, pengendorsan, cek, pesanan, resit dan surat kredit bagi, atau yang berupa sebagai dikeluarkan atau ditandatangani oleh atau bagi pihak, syarikat itu,

dan jika berlaku keingkaran pada mematuhi subseksyen ini, syarikat itu adalah melakukan suatu kesalahan terhadap Akta ini.

(3) Nama sesuatu syarikat Langkawi atau syarikat Langkawi asing (sama ada atau tidak syarikat itu menjalankan perniagaan di bawah suatu nama perniagaan) dalam huruf rumi yang mudah dibaca dan nombor syarikat bagi syarikat Langkawi atau syarikat Langkawi asing itu hendaklah tertera pada memorandum dan perkara persatuan syarikat itu dan apa-apa dokumen lain sebagaimana yang ditetapkan, dan jika berlaku keingkaran pada mematuhi subseksyen ini, syarikat itu adalah melakukan suatu kesalahan terhadap Akta ini.

(4) Jika sesuatu syarikat Langkawi atau syarikat Langkawi asing telah menukarkan namanya, nama syarikat itu yang dahulu hendaklah juga tertera di bawah nama sekarang pada semua dokumen, surat perniagaan, penyata akaun, invois, notis rasmi, penerbitan, bil pertukaran, nota janji hutang, pengendorsan, cek, pesanan, resit dan surat kredit bagi, atau yang berupa sebagai dikeluarkan atau ditandatangani oleh atau bagi pihak, syarikat itu selama tempoh yang tidak kurang daripada dua belas bulan dari tarikh pertukaran itu.

(5) Jika seseorang pegawai suatu syarikat Langkawi atau syarikat Langkawi asing atau mana-mana orang bagi pihak syarikat itu—

- (a) menggunakan atau membenarkan penggunaan apa-apa meterai yang berupa sebagai meterai syarikat itu yang padanya namanya tidak tertera sedemikian;
- (b) mengeluarkan atau membenarkan pengeluaran apa-apa surat perniagaan, penyata akaun, invois, notis rasmi atau penerbitan syarikat itu yang dalamnya namanya atau namanya yang dahulu (jika berkenaan) tidak disebut sedemikian;

- (c) menandatangani, mengeluarkan atau membenarkan ditandatangani atau dikeluarkan, bagi pihak syarikat itu, apa-apa bil pertukaran, nota janji hutang, cek atau surat cara boleh niaga lain atau, apa-apa pengendorsan, pesanan, resit atau surat kredit, yang dalamnya namanya atau namanya yang dahulu (jika berkenaan) tidak disebut sedemikian; atau
- (d) menandatangani atau membenarkan ditandatangani bagi pihak syarikat itu, memorandum dan perkara persatuan syarikat atau apa-apa dokumen lain sebagaimana yang ditetapkan oleh Pendaftar, yang dalamnya nama dan nombor syarikat bagi syarikat Langkawi atau syarikat Langkawi asing itu tidak disebut sedemikian,

dia melakukan suatu kesalahan terhadap Akta ini dan, jika dia telah menandatangani, mengeluarkan atau membenarkan ditandatangani atau dikeluarkan bagi pihak syarikat itu apa-apa bil pertukaran, nota janji hutang atau surat cara boleh niaga lain atau apa-apa pengendorsan yang padanya atau pesanan yang dalamnya nama itu atau namanya yang dahulu (jika berkenaan) tidak disebut sedemikian, dia hendaklah sebagai tambahan bertanggung sendiri kepada pemegang surat cara atau pesanan itu bagi amaun yang genap masa baginya, melainkan jika ia telah dibayar oleh syarikat itu.

Penalti: Lima ribu ringgit. Penalti ingkar.

PENGGAL 2 PENGARAH

DAN PEGAWAI

Pengarah

58. (1) Tiap-tiap syarikat Langkawi hendaklah mempunyai sekurang-kurangnya seorang pengarah.

(2) Pengarah pertama bagi suatu syarikat Langkawi hendaklah dinamakan dalam perkara persatuan syarikat itu.

(3) Apa-apa kekosongan luar jangka pengarah boleh, setakat mana perkara persatuan bagi sesuatu syarikat Langkawi tidak memperuntukkan selainnya, diisikan oleh seseorang yang dilantik oleh pengarah atau pengarah-pengarah yang masih kekal atau, jika tidak ada pengarah yang masih kekal, oleh Pendaftar atas permohonan oleh seorang anggota syarikat itu.

(4) Tertakluk kepada apa-apa peruntukan yang berlawanan dalam perkara persatuan suatu syarikat Langkawi, seorang pengarah atau pegawai suatu syarikat Langkawi boleh merupakan suatu perbadanan dan perbadanan sedemikian bolehlah bertindak dengan sendirinya atau melalui seorang penama yang dilantik secara bertulis, dan boleh dilantik atau boleh bertindak sebagai pengarah kepada lebih daripada satu syarikat.

(5) Seorang pengarah suatu syarikat Langkawi tidak boleh menzahirkan kepada mana-mana orang, atau menggunakan bagi apa-apa maksud, apa-apa maklumat yang didapati oleh sebab jawatannya kecuali mengikut kewajipannya sebagai seorang pengarah syarikat itu dan setakat mana yang dia boleh dipaksa oleh undang-undang untuk berbuat sedemikian, tetapi seorang pengarah boleh menzahirkan kepada seorang pegawai awam yang berkenaan di Malaysia, atau selainnya menggunakan di dalam Malaysia, apa-apa maklumat yang ada dalam pengetahuannya yang dipercayai dengan jujurnya menjangkakan bahawa suatu fraud sedang atau akan diamalkan oleh syarikat itu atau oleh mana-mana anggotanya atau pengarahnya atau ke atas syarikat itu atau mana-mana anggotanya.

(6) Seorang pengarah suatu syarikat Langkawi yang, dengan melanggar subseksyen (4), menzahirkan kepada mana-mana orang, atau menggunakan bagi apa-apa maksud, apa-apa maklumat yang didapati oleh sebab jawatannya melakukan suatu kesalahan terhadap Akta ini.

(7) Walau apa pun apa-apa peruntukan lain dalam Akta ini atau peraturan-peraturan yang berlawanan, dan melainkan jika diperuntukkan selainnya dalam perkara persatuan suatu syarikat Langkawi, seorang pengarah suatu syarikat Langkawi tidak boleh dikenakan apa-apa penalti yang diperuntukkan di bawah Akta ini bagi apa-apa kerosakan yang disebabkan kepada atau yang ditanggung oleh mana-mana orang, walau bagaimana jua pun kerosakan itu berbangkit, selainnya oleh sebab perbuatan salah laku yang sengaja, keingkaran yang sengaja atau keabaiannya yang sengaja pengarah itu.

Persetujuan untuk bertindak sebagai pengarah

59. Seseorang tidak boleh dilantik atau dinamakan sebagai seorang pengarah atau pengarah yang dicadangkan dalam perkara persatuan suatu syarikat Langkawi melainkan, sebelum pendaftaran perkara

persatuan itu, orang itu telah, dengan sendirinya atau melalui ejennya yang diberi kuasa secara bertulis bagi maksud itu, menandatangani dan menyebabkan diserahkan kepada Pendaftar suatu persetujuan bertulis untuk bertindak sebagai seorang pengarah.

Kesahan tindakan pengarah

60. Tindakan seorang pengarah sesuatu syarikat Langkawi adalah sah walaupun apa-apa kecacatan yang didapati dalam pelantikan atau kelayakannya.

Kuasa Pendaftar untuk menghalang orang daripada menguruskan syarikat Langkawi

61. (1) Pendaftar boleh mengeluarkan suatu arahan bahawa seseorang yang, di Langkawi atau di tempat lain —

- (a) telah disabitkan atas suatu kesalahan yang berkaitan dengan penajaan, pembentukan atau pengurusan sesuatu perbadanan;
- (b) telah disabitkan atas apa-apa tindakan yang melibatkan fraud atau kecurangan; atau
- (c) adalah seorang bankrap belum lepas atau tidak solven,

hilang kelayakannya untuk bertindak sebagai seorang pengarah atau penaja bagi, atau dengan apa-apa cara secara langsung atau tidak langsung terlibat dalam atau mengambil bahagian dalam pengurusan, suatu syarikat Langkawi.

(2) Selepas suatu arahan dikeluarkan oleh Pendaftar di bawah subseksyen (1), suatu syarikat Langkawi tidak boleh kemudian daripada itu melantik atau menyimpan seseorang yang telah hilang kelayakannya sedemikian sebagai seorang pengarah, dan seseorang yang hilang kelayakannya sedemikian yang bertindak dengan melanggar arahan itu tanpa kebenaran Mahkamah melakukan suatu kesalahan terhadap Akta ini.

Penalti: Sepuluh ribu ringgit.

Penzahiran kepentingan dalam kontrak, harta, jawatan dsb.

62. (1) Tertakluk kepada seksyen ini, tiap-tiap pengarah sesuatu syarikat Langkawi yang adalah dengan apa-apa cara, sama ada secara langsung atau tidak langsung, berkepentingan dalam sesuatu kontrak atau kontrak yang dicadangkan dengan syarikat itu hendaklah, dengan seberapa segera yang praktik selepas fakta yang berkaitan telah sampai ke pengetahuannya, mengisytiharkan jenis kepentingannya di suatu mesyuarat pengarah syankat itu atau menyebabkan diedarkan secara bertulis kepada semua pengarah yang lain butir-butir mengenai kepentingannya.

(2) Subseksyen (1) tidaklah terpakai dalam hal yang kepentingan pengarah syarikat Langkawi itu hanya terdiri daripada pengarah itu menjadi seorang anggota atau pemiutang suatu syarikat Langkawi lain yang berkepentingan dalam suatu kontrak atau kontrak yang dicadangkan dengan syarikat yang mula-mula disebut itu, jika kepentingan pengarah itu boleh dengan sepatutnya dianggap sebagai bukan kepentingan yang material.

(3) Tertakluk kepada apa-apa peruntukan yang berlawanan dalam perkara persatuan suatu syarikat Langkawi, seorang pengarah syarikat itu tidak boleh, bagi maksud seksyen ini, disifatkan sebagai berkepentingan dalam atau pada bila-bila masa telah berkepentingan dalam suatu kontrak atau kontrak yang dicadangkan itu, oleh sebab kontrak atau kontak yang dicadangkan itu —

- (a) telah atau akan dibuat dengan;
- (b) adalah bagi faedah; atau
- (c) adalah bagi pihak,

suatu syarikat yang, menurut kuasa peruntukan dalam seksyen 4, adalah disifatkan sebagai suatu syarikat berkaitan, dan bahawa pengarah itu adalah juga pengarah syarikat itu.

(4) Bagi maksud subseksyen (1), sesuatu notis am yang diberikan kepada pengarah suatu syarikat Langkawi oleh seorang pengarah yang membawa kesan bahawa dia adalah seorang pegawai atau anggota suatu syarikat Langkawi yang dinyatakan atau seorang anggota suatu firma yang dinyatakan dan dia hendaklah dianggap sebagai berkepentingan dalam apa-apa kontrak yang boleh, selepas tarikh notis itu, dibuat dengan syarikat atau firma itu hendaklah

disifatkan sebagai suatu pengisytiharan kepentingan yang mencukupi berhubung dengan apa-apa kontrak yang dibuat sedemikian, tetapi tiada apa-apa notis sedemikian boleh mempunyai kesan melainkan jika notis itu diberikan di suatu mesyuarat pengarah atau pengarah itu mengambil langkah yang munasabah untuk memastikan bahawa notis itu dikemukakan dan dibaca di mesyuarat pengarah yang berikutnya selepas notis itu diberikan.

(5) Tiap-tiap pengarah suatu syarikat Langkawi yang memegang apa-apa jawatan atau memiliki apa-apa harta yang melaluinya, sama ada secara langsung atau tidak langsung, kewajipan atau kepentingan mungkin diwujudkan yang bercanggahan dengan kewajipan atau kepentingannya sebagai seorang pengarah, hendaklah mengisytiharkan di suatu mesyuarat pengarah syarikat itu atau menyebabkan diedarkan secara bertulis kepada pengarah lain fakta dan jenis, sifat dan takat percanggahan itu.

(6) Pengisytiharan yang dikehendaki dibuat oleh seorang pengarah di bawah subseksyen (5) hendaklah dibuat di mesyuarat pertama pengarah yang diadakan —

- (a) selepas dia menjadi seorang pengarah; atau
- (b) (jika dia telah pun menjadi seorang pengarah) selepas dia mula memegang jawatan atau memiliki harta itu,

melainkan jika fakta itu telah diedarkan secara bertulis sebelum mesyuarat itu.

(7) Tiap-tiap pengisytiharan di bawah seksyen ini hendaklah direkodkan dalam minit mesyuarat yang mana pengisytiharan itu telah dibuat.

(8) Seksyen ini adalah sebagai tambahan kepada dan tidaklah mengurangkan perjalanan apa-apa rukun undang-undang atau apa-apa peruntukan dalam perkara persatuan suatu syarikat Langkawi yang menyekat seorang pengarah syarikat itu daripada mempunyai apa-apa kepentingan dalam kontrak dengan syarikat itu atau daripada memegang jawatan atau memiliki harta yang melibatkan kewajipan atau kepentingan yang bercanggahan dengan kewajipan atau kepentingannya sebagai seorang pengarah.

Kewajipan dan liabiliti pegawai

63. (1) Tiap-tiap pegawai sesuatu syarikat Langkawi hendaklah pada setiap masa bertindak dengan jujur dan menggunakan usaha yang munasabah dalam menunaikan kewajipan jawatannya.

(2) Seseorang pegawai suatu syarikat Langkawi tidak boleh menggunakan secara tidak patut apa-apa maklumat yang diperoleh oleh sebab jawatannya untuk mendapatkan, sama ada secara langsung atau tidak langsung, apa-apa faedah bagi dirinya atau bagi mana-mana orang lain atau untuk menyebabkan kemudaratan kepada syarikat itu.

(3) Seorang pegawai suatu syarikat Langkawi yang melanggar seksyen ini adalah —

(a) bertanggung kepada syarikat itu bagi apa-apa keuntungan yang dibuat olehnya dan bagi apa-apa kerosakan yang ditanggung oleh syarikat itu oleh sebab peianggaran itu; dan

(b) melakukan suatu kesalahan terhadap Akta ini.

(4) Seksyen ini adalah sebagai tambahan kepada dan tidaklah mengurangkan mana-mana undang-undang bertulis atau rukun undang-undang yang lain yang berhubungan dengan kewajipan atau liabiliti pengarah atau pegawai suatu syarikat.

Setiausaha

64. (1) Tiap-tiap syarikat Langkawi hendaklah melantik seorang setiausaha atau lebih, yang sekurang-kurangnya seorang hendaklah menjadi suatu entiti pengurusan dan yang hendaklah juga menjadi setiausaha pemastautin syarikat Langkawi itu.

(2) Tertakluk kepada apa-apa peruntukan yang berlawanan dalam memorandum dan perkara persatuan suatu syarikat Langkawi, seorang setiausaha suatu syarikat Langkawi boleh merupakan suatu perbadanan dan perbadanan itu boleh bertindak dengan sendirinya atau melalui seorang penama yang dilantik secara bertulis dan boleh dilantik atau boleh bertindak sebagai seorang setiausaha kepada lebih daripada satu syarikat.

(3) Tiap-tiap setiausaha suatu syarikat Langkawi hendaklah dilantik oleh pengarah syarikat itu.

(4) Tertakluk kepada subseksyen (5), setiausaha pemastautin suatu syarikat Langkawi hendaklah bertanggungjawab bagi pematuhan oleh syarikat itu dengan kehendak Akta ini berhubung dengan penyerahan setnua dokumen kepada Pendaftar, penyenggaraan rekod syarikat di pejabat berdaftar syarikat itu dan bagi menguruskan komunikasi yang disampaikan kepada syarikat itu di pejabat berdaftar.

(5) Walau apa pun apa-apa peruntukan yang lain dalam Akta ini yang berlawanan, setiausaha pemastautin tidak bertanggung sebagai seorang pegawai syarikat itu bagi apa-apa penalti yang diperuntukkan dalam Akta ini kecuali bagi apa-apa yang dilakukan atau yang ditinggalkan daripada dilakukan olehnya dalam menjalankan kewajipan jawatannya, atau pun bertanggung bagi apa-apa kerosakan yang disebabkan kepada atau yang ditanggung oleh mana-mana orang walau bagaimana jua pun ia berbangkit selain oleh sebab perbuatan salah laku yang sengaja, keingkaran yang sengaja atau keabaian yang sengaja setiausaha pemastautin itu.

(6) Suatu syarikat Langkawi hendaklah dengan serta-merta membayar apa-apa kos, caj dan perbelanjaan yang ditanggung oleh setiausaha pemastautin berkenaan dengan apa-apa yang dilakukan di bawah Akta ini bagi pihak syarikat itu.

Daftar pengarah dan pegawai

65. (1) Tiap-tiap syarikat Langkawi hendaklah menyimpandi pejabat berdaftar di Langkawi sesuatu daftar pengarah dan pegawai.

(2) Daftar itu hendaklah mengandungi berkenaan dengan setiap pengarah, dalam hal seorang individu, nama penuhnya pada masa ini dan apa-apa namanya yang dahulu, alamat kediaman biasanya dan pengenalannya (jika ada) atau, dalam hal suatu perbadanan, nama penuh perbadanan itu dan alamat pejabat berdaftar dan nama penama dan wakilnya yang diberi kuasa di Langkawi, jika ada.

(3) Daftar itu hendaklah mengandungi berkenaan dengan setiap pegawai, dalam hal seorang individu nama penuhnya pada masa ini dan apa-apa namanya yang dahulu, alamat kediaman biasanya dan pengenalannya (jika ada) dan, jika berkenaan, nama suatu entiti pengurusan yang baginya dia adalah seorang pegawai dan alamat berdaftar entiti pengurusan itu atau, dalam hal suatu perbadanan, nama penuh perbadanan itu dan alamat pejabat berdaftar perbadanan itu.

(4) Daftar yang disimpan oleh suatu syarikat Langkawi hendaklah dibuka untuk pemeriksaan oleh mana-mana pengarah, anggota atau juruaudit syarikat itu sahaja tanpa apa-apa caj.

(5) Suatu syarikat Langkawi hendaklah menyerahkan kepada Pendaftar—

- (a) dalam masa satu bulan selepas ia diperbadankan, suatu penyata dalam bentuk yang ditetapkan yang mengandungi, berhubung dengan pengarah dan setiausahanya, butir-butir yang dikehendaki dinyatakan dalam daftar itu;
- (b) dalam masa satu bulan selepas seorang yang dinamakan dalam penyata itu terhenti menjadi seorang pengarah atau setiausaha syarikat itu, suatu penyata dalam bentuk yang ditetapkan yang memberitahu Pendaftar mengenai pertukaran itu dan mengandungi berkenaan dengan setiap pengarah atau setiausaha syarikat pada masa itu butir-butir yang dikehendaki dinyatakan dalam daftar itu dan tarikh pemberhentian pengarah atau setiausaha itu;
- (c) dalam masa satu bulan selepas seorang menjadi pengarah atau setiausaha syarikat itu, suatu penyata dalam bentuk yang ditetapkan yang memberitahu Pendaftar mengenai fakta itu dan yang mengandungi butir yang dikehendaki dinyatakan dalam daftar dan tarikh pelantikan orang itu; dan
- (d) dalam masa satu bulan selepas apa-apa pertukaran dalam butir-butir yang ditetapkan mengenai pengarah dan setiausaha, suatu notis dalam bentuk yang ditetapkan yang memberitahu Pendaftar mengenai pertukaran itu.

(6) Jika berlaku suatu keingkaran oleh suatu syarikat Langkawi pada mematuhi mana-mana peruntukan seksyen ini, syarikat itu dan tiap-tiap pegawai syarikat itu yang ingkar melakukan suatu kesalahan terhadap Akta ini.

Penalti: Lima ribu ringgit. Penalti ingkar.

(7) Dalam seksyen ini, "pengenalan" ertinya, dalam hal mana-mana orang yang kepadanya dikeluarkan suatu kad pengenalan, nombor kad pengenalan itu, dan dalam hal seseorang yang kepadanya tidak dikeluarkan suatu kad pengenalan, butir-butir mengenai pasportnya atau apa-apa keterangan pengenalan seumpama lain sebagaimana yang ada.

Kesalahan terhadap mana-mana peruntukan Akta ini yang dilakukan oleh pengarah dan setiausaha

66. Jika apa-apa kesalahan terhadap mana-mana peruntukan Akta ini telah dilakukan oleh suatu entiti pengurusan yang bertindak sebagai seorang pengarah atau setiausaha pemastautin suatu syarikat Langkawi, mana-mana orang yang pada masa berlakunya kesalahan itu ialah seorang pengarah atau pegawai entiti pengurusan itu atau yang berupa bertindak dalam apa-apa sifat sedemikian, atau telah dalam apa-apa cara atau apa-apa takat bertanggungjawab bagi pengurusan apa-apa hal ehwal entiti pengurusan sedemikian, atau telah membantu dalam pengurusan sedemikian, melakukan kesalahan itu.

PENGAL 3

MESYUARAT DAN PROSIDING

Mesyuarat anggota

67. (1) Tertakluk kepada apa-apa batasan dalam memorandum atau perkara persatuan, pengarah suatu syarikat Langkawi boleh memanggil mesyuarat anggota syarikat itu mengikut apa-apa cara dan pada bila-bila masa dan di mana-mana tempat di dalam atau di luar Langkawi sebagaimana yang difikirkan perlu atau dihasrati oleh pengarah.

(2) Pengarah suatu syarikat Langkawi, walaupun apa-apa jua dalam perkara persatuan, hendaklah, atas rekuisisi sepuluh anggota atau lebih, atau anggota yang pada tarikh rekuisisi didepositkan memegang tidak kurang daripada satu persepuluh jumlah modal berbayar syarikat itu, dengan serta-merta mengambil tindakan untuk memanggil suatu mesyuarat anggota.

(3) Tertakluk kepada apa-apa batasan dalam memorandum atau perkara persatuan, seorang anggota hendaklah disifatkan sebagai hadir di suatu mesyuarat anggota jika—

- (a) dia menyertai melalui telefon atau cara elektronik lain; dan
- (b) semua anggota yang menyertai mesyuarat itu boleh mendengar antara satu sama lain dan boleh mengenali suara masing-masing, dan bagi maksud ini penyertaan adalah menjadi bukti *prima facie* bagi pengecaman.

(4) Seorang anggota boleh diwakili di suatu mesyuarat anggota oleh seorang proksi yang boleh bercakap dan mengundi bagi pihaknya.

(5) Peruntukan yang berikut terpakai berkenaan dengan pemunyaan syer bersejama:

- (a) jika dua orang atau lebih memegang syer secara bersejama, setiap daripada mereka itu boleh hadir dengan sendirinya atau melalui proksi di suatu mesyuarat anggota dan boleh bercakap sebagai seorang anggota;
- (b) jika hanya seorang daripada mereka hadir dengan sendirinya atau melalui proksi, dia bolehlah mengundi bagi pihak mereka semua; dan
- (c) jika dua daripada mereka atau lebih hadir dengan sendirinya atau melalui proksi, mereka hendaklah mengundi sebagai satu.

Notis mesyuarat anggota

68. (1) Tertakluk kepada apa-apa kehendak dalam memorandum atau perkara persatuan untuk memberikan notis yang lebih panjang, pengarah hendaklah memberi tidak kurang daripada tujuh hari notis mengenai mesyuarat anggota kepada orang yang nama pada tarikh notis itu diberikan tertera sebagai anggota dalam daftar anggota yang dirujukkan dalam seksyen 76 dan yang berhak untuk mengundi di mesyuarat itu.

(2) Walau apa pun subseksyen (1), tetapi tertakluk kepada apa-apa batasan dalam memorandum atau perkara persatuan, suatu mesyuarat anggota yang diadakan dengan melanggar kehendak untuk memberikan notis adalah sah jika anggota yang memegang majoriti sebanyak sembilan puluh peratus, atau apa-apa majoriti yang kurang daripada itu sebagaimana yang dinyatakan dalam memorandum atau perkara persatuan —

- (a) daripada jumlah bilangan syer bagi anggota yang berhak mengundi ke atas semua perkara yang akan diambil kira di mesyuarat itu; atau
- (b) daripada undi setiap kelas atau siri syer jika anggota adalah berhak untuk mengundi ke atasnya sebagai suatu kelas atau siri bersama dengan suatu majoriti mutlak bagi undi yang selebihnya,

telah menepikan notis mesyuarat itu; dan bagi maksud ini, kehadiran seorang anggota di mesyuarat itu hendaklah disifatkan sebagai suatu penepian di pihaknya.

(3) Kegagalan yang tidak sengaja pengarah untuk memberikan notis bagi suatu mesyuarat kepada seorang anggota, atau hakikat bahawa seorang anggota tidak menerima notis itu, tidaklah menjadikan mesyuarat itu tidak sah.

Kuorum, pengerusi, pengundian, dsb., dalam mesyuarat

69. (1) Kecuali sebagaimana yang diperuntukkan selainnya dalam perkara persatuan suatu syarikat Langkawi, jika suatu syarikat Langkawi mempunyai lebih daripada seorang anggota, dan dua anggota atau lebih hadir di suatu mesyuarat anggota, anggota yang hadir hendaklah menjadi kuorum, dan di mesyuarat itu—

- (a) mana-mana anggota yang dilantik oleh anggota itu boleh menjadi pengerusi mesyuarat itu; dan
- (b) tiap-tiap anggota hendaklah mempunyai satu undi berkenaan dengan setiap syer yang dipegang olehnya.

(2) Dalam suatu pengundian yang dibuat di suatu mesyuarat, seorang yang berhak kepada lebih daripada satu undi tidaklah perlu, jika dia mengundi, menggunakan semua undinya atau membuang semua undi yang digunakannya dengan cara yang sama.

(3) Sesuatu perbadanan boleh, raelalui ketetapan pengarahnya atau badan kawalan lainnya—

- (a) jika perbadanan itu adalah seorang anggota suatu syarikat Langkawi, memberi kuasa kepada mana-mana orang sebagaimana yang difikirkannya patut untuk bertindak sebagai wakilnya sama ada di suatu mesyuarat anggota tertentu atau di semua mesyuarat anggota syarikat itu atau mana-mana kelas anggota; atau
- (b) jika perbadanan itu adalah seorang pemiutang, termasuk seorang pemegang debentur, suatu syarikat Langkawi, memberi kuasa kepada mana-mana orang sebagaimana yang difikirkannya sesuai untuk bertindak sebagai wakilnya sama ada di suatu mesyuarat anggota tertentu atau di semua mesyuarat mana-mana pemiutang syarikat itu,

dan seseorang yang diberi kuasa sedemikian hendaklah, menurut autoritinya dan sehingga autoritinya dibatalkan oleh perbadanan itu, berhak untuk menjalankan, bagi pihak perbadanan itu, kuasa yang sama sepertimana yang boleh dijalankan oleh perbadanan itu sekiranya ia adalah seorang anggota individu, pemiutang atau pemegang debentur syarikat itu.

(4) Jika-

- (a) seorang yang nadir di suatu mesyuarat anggota diberi kuasa untuk bertindak sebagai wakil suatu perbadanan di mesyuarat itu menurut kuasa suatu authoriti yang telah diberikan oleh perbadanan itu di bawah subseksyen (3); dan
- (b) orang itu tidak selainnya berhak untuk menghadiri mesyuarat itu.

perbadanan itu hendaklah, bagi maksud subseksyen (1), disifatkan sebagai hadir dengan sendirinya pada mesyuarat itu.

(5) Sesuatu perakuan di bawah meterai perbadanan itu hendaklah menjadi keterangan *prima facie* mengenai pelantikan atau pembatalan pelantikan (mengikut mana-mana yang berkenaan) seorang wakil menurut subseksyen (3).

(6) Jika-

- (a) suatu syarikat pemegangan berhak secara benefisial kepada keseluruhan syer terbitan suatu subsidiari; atau
- (b) suatu syarikat Langkawi mempunyai seorang anggota sahaja,

dan suatu minit ditandatangani oleh seorang wakil syarikat pemegangan yang diberi kuasa menurut subseksyen (3) atau ditandatangani oleh anggota tunggal yang menyatakan bahawa apa-apa tindakan, perkara atau benda, atau apa-apa ketetapan biasa atau khas, yang dikehendaki oleh Akta ini atau oleh memorandum atau perkara persatuan subsidiari itu untuk dibuat, dilaksanakan atau diluluskan oleh atau di suatu mesyuarat agung tahunan atau suatu mesyuarat luar biasa subsidiari atau syarikat Langkawi itu telah dibuat, dilaksanakan atau diluluskan, tindakan, perkara, benda atau ketetapan itu hendaklah, bagi semua maksud, disifatkan sebagai

telah dibuat, dilaksanakan, atau diluluskan dengan sewajarnya oleh atau di mesyuarat agung tahunan, atau mengikut kehendak hal itu, oleh atau di mesyuarat luar biasa subsidiari itu.

Pengundian oleh anggota

70. (1) Kecuali sebagaimana yang diperuntukkan selainnya dalam memorandum atau perkara persatuan suatu syarikat Langkawi, semua syer mengundi sebagai satu kelas dan setiap syer mempunyai satu undi.

(2) Pengarah suatu syarikat Langkawi boleh menetapkan tarikh notis suatu mesyuarat diberi sebagai tarikh rekod bagi menentukan syer yang berhak mengundi di mesyuarat itu.

Tindakan melalui persetujuan secara berlulis anggota

71. Tertakluk kepada apa-apa batasan dalam memorandum atau perkara persatuan suatu syarikat Langkawi, sesuatu tindakan yang boleh diambil oleh anggota di suatu mesyuarat anggota boleh juga diambil melalui sesuatu ketetapan semua anggota yang bersetuju secara bertulis, atau melalui teleks, telegram, telefaks, kabel atau perhubungan elektronik bertulis lain, tanpa perlu apa-apa notis.

Kuasa Mahkamah untuk memerintahkan mesyuarat dipanggil

72. (1) Jika atas apa-apa sebab adalah tidak praktik untuk memanggil sesuatu mesyuarat mengikut apa-apa cara yang mesyuarat boleh dipanggil atau untuk menjalankan mesyuarat itu mengikut cara yang ditetapkan oleh perkara persatuan atau Akta ini, Mahkamah boleh, sama ada atas usulnya sendiri atau atas permohonan mana-mana pengarah atau mana-mana anggota yang berhak untuk mengundi di mesyuarat itu atau atas permohonan wakil diri mana-mana anggota itu, memerintahkan supaya suatu mesyuarat dipanggil, diadakan dan dijalankan mengikut apa-apa cara yang difikirkan sesuai oleh Mahkamah, dan Mahkamah boleh memberikan apa-apa arahan bersampingan atau berbangkit yang difikirkannya suai manfaat.

(2) Apa-apa mesyuarat yang dipanggil, diadakan dan dijalankan menurut apa-apa arahan yang dibuat menurut seksyen ini hendaklah, bagi semua maksud, disifatkan sebagai suatu mesyuarat yang telah dipanggil, diadakan dan dijalankan dengan sewajarnya.

Ketetapan khas

73. (1) Sesuatu ketetapan hendaklah menjadi suatu ketetapan khas apabila ketetapan itu telah diluluskan oleh suatu majoriti yang tidak kurang daripada tiga perempat daripada mana-mana anggota yang berhak untuk mengundi dengan sendirinya atau, jika proksi dibenarkan, melalui proksi, di suatu mesyuarat anggota yang notis tidak kurang daripada dua puluh satu hari yang menyatakan niat untuk mencadangkan ketetapan itu sebagai suatu ketetapan khas telah diberikan dengan sewajarnya.

(2) Walau apa pun subseksyen (1), jika dipersetujui oleh sebilangan majoriti anggota yang mempunyai hak untuk mengundi di mesyuarat itu, iaitu suatu majoriti yang bersama memegang pada agregatnya tidak kurang daripada tujuh puluh lima peratus daripada jumlah undi anggota yang berhak untuk mengundi, suatu ketetapan bolehlah dicadangkan dan diluluskan sebagai suatu ketetapan khas di suatu mesyuarat yang notis kurang daripada dua puluh satu hari telah diberikan.

Penyerahan salinan ketetapan dan perjanjian tertentu

74. (1) Sesuatu salinan bercetak tiap-tiap ketetapan atau perjanjian yang kepadanya seksyen ini terpakai hendaklah, dalam masa empat belas hari selepas ketetapan atau perjanjian itu diluluskan atau dibuat, diserahkan oleh syarikat Langkawi itu kepada Pendaftar.

(2) Suatu salinan tiap-tiap ketetapan atau perjanjian sedemikian yang pada masa ini berkuat kuasa hendaklah termaktub dalam atau dilampirkan pada tiap-tiap salinan memorandum, perkara persatuan atau prospektus, megikut mana-mana yang berkenaan, dan jika diubahkan, dikeluarkan selepas ketetapan itu diluluskan atau perjanjian itu dibuat.

(3) Jika perkara persatuan suatu syarikat Langkawi belum didaftarkan, suatu salinan bercetak tiap-tiap ketetapan atau perjanjian itu hendaklah dikemukakan kepada mana-mana anggota atas permintaannya apabila dibayar apa-apa amaun (jika ada) yang tidak melebihi amaun yang ditetapkan, sebagaimana yang diarahkan oleh syarikat itu.

(4) Seksyen ini hendaklah terpakai bagi —

- (a) ketetapan khas;
- (b) ketetapan yang telah dipersetujui oleh semua anggota suatu syarikat Langkawi, iaitu ketetapan yang, jika tidak dipersetujui sedemikian, tidak boleh menjadi berkesan bagi maksud ketetapan itu melainkan jika ia telah diluluskan sebagai ketetapan khas;
- (c) ketetapan atau perjanjian yang telah dipersetujui oleh semua anggota daripada kelas pemegang syer yang sama, iaitu ketetapan yang, jika tidak dipersetujui sedemikian, tidak boleh menjadi berkesan bagi maksud ketetapan itu melainkan jika ia telah diluluskan oleh suatu majoriti tertentu atau selainnya mengikut suatu cara tertentu; dan
- (d) semua ketetapan atau perjanjian yang dengan berkesannya mengikat semua anggota daripada apa-apa kelas pemegang syer sama ada dipersetujui oleh semua anggota daripada kelas itu atau tidak.

(5) Jika suatu syarikat Langkawi tidak mematuhi subseksyen (1), syarikat itu dan tiap-tiap pegawai syarikat itu yang ingkar melakukan suatu kesalahan terhadap Akta ini.

Penalti: Lima ribu ringgit. Penalti ingkar.

(6) Jika sesuatu syarikat Langkawi tidak mematuhi subseksyen (2) atau (3), syarikat itu dan tiap-tiap pegawai syarikat itu yang ingkar melakukan suatu kesalahan terhadap Akta ini.

Penalti: Lima puluh ringgit bagi setiap salinan yang berkenaan dengannya keingkaran telah berlaku.

(7) Bagi maksud subseksyen (5) dan (6), seorang pelikuidasi bagi suatu syarikat Langkawi hendaklah disifatkan sebagai seorang pegawai syarikat itu.

Minit prosiding

75. (1) Tiap-tiap syarikat Langkawi hendaklah menyebabkan minit semua prosiding mesyuarat anggota dan mesyuarat pengarah dicatatkan dalam buku yang disimpan bagi maksud itu.

(2) Melainkan jika Pendaftar mengarahkan selainnya, semua buku minit suatu syarikat Langkawi hendaklah disimpan di pejabat berdaftar syarikat itu tetapi pendua buku minit itu atau mana-mana satu daripadanya boleh disimpan di tempat lain dan hendaklah terbuka untuk pemeriksaan tanpa apa-apa caj oleh mana-mana anggota.

PENGGAL 4

DAFTAR ANGGOTA

Daftar anggota

76. (1) Tiap-tiap syarikat Langkawi hendaklah menyimpan suatu daftar anggota dan mencatatkan dalam daftar itu —

- (a) nama, kerakyatan dan alamat, dan apa-apa butir dan maklumat berkaitan yang lain, sebagaimana yang ditetapkan dalam perkara persatuan, bagi anggota, dan suatu pernyataan mengenai syer yang dipegang oleh setiap anggota, dengan membezakan setiap syer melalui nombornya (jika ada) atau melalui nombor (jika ada) perakuan yang menjadi keterangan mengenai pemegangan anggota itu dan mengenai amaun yang dibayar atau yang dipersetujui sebagai dianggap telah dibayar atas syer setiap anggota;
- (b) tarikh yang nama setiap orang telah dicatatkan dalam daftar sebagai seorang anggota;
- (c) tarikh yang mana-mana orang yang terhenti menjadi seorang anggota dalam masa tujuh tahun yang dahulunya telah terhenti menjadi anggota sedemikian; dan
- (d) tarikh bagi tiap-tiap pengumpulan syer kepada anggota dan bilangan syer yang terkandung dalam setiap pengumpulan.

(2) Daftar anggota hendaklah menjadi keterangan *prima facie* mengenai apa-apa perkara yang dimasukkan dalam daftar sebagaimana yang dikehendaki atau dibenarkan oleh Akta ini.

(3) Jika berlaku keingkaran pada mematuhi seksyen ini oleh suatu syarikat Langkawi, syarikat itu dan tiap-tiap pegawai syarikat itu yang ingkar melakukan suatu kesalahan terhadap Akta ini.

Penalti: Lima ribu ringgit. Penalti ingkar.

Tempat daftar disimpan

77. (1) Melainkan jika Pendaftar mengarahkan selainnya, daftar anggota sesuatu syarikat Langkawi hendaklah disimpan di pejabat berdaftar syarikat itu dan hendaklah dibuka untuk diperiksa tanpa apa-apa caj oleh mana-mana anggota sahaja.

(2) Walau apa pun subseksyen (1), tiap-tiap syarikat Langkawi hendaklah, dalam masa satu bulan selepas daftar itu mula-mula disimpan di suatu tempat selain pejabat berdaftar syarikat itu, menyerahkan kepada Pendaftar notis mengenai tempat di mana daftar itu disimpan dan hendaklah, dalam masa satu bulan selepas apa-apa pertukaran dalam tempat di mana daftar itu disimpan, menyerahkan kepada Pendaftar notis mengenai pertukaran itu.

Akibat keingkaran oleh ejen

78. Jika daftar anggota disimpan di tempat selain pejabat berdaftar suatu syarikat Langkawi dan oleh sebab apa-apa keingkaran oleh orang yang bertanggungjawab bagi tempat sedemikian syarikat itu tidak mematuhi seksyen 77 atau apa-apa kehendak lain Akta ini mengenai pengemukaan daftar itu, orang itu boleh dikenakan penalti yang sama seolah-olah dia adalah seorang pegawai syarikat yang ingkar itu.

Kuasa Mahkamah untuk mcinbetulkan daftar

79. (1) Jika, berhubung dengan suatu syarikat Langkawi —

- (a) nama mana-mana orang, tanpa sebab yang mencukupi, dicatatkan dalam atau ditinggalkan daripada daftar; atau
- (b) keingkaran berlaku atau kelengahan yang tidak berpatutan terjadi dalam mencatatkan ke dalam daftar itu fakta mengenai mana-mana orang yang terhenti menjadi seorang anggota,

orang yang terkilan atau mana-mana anggota syarikat itu boleh memohon kepada Mahkamah untuk membetulkan daftar itu, dan Mahkamah boleh menolak permohonan itu atau boleh mengarahkan pembetulan daftar itu dan pembayaran oleh syarikat itu bagi apa-apa kerosakan yang ditanggung oleh mana-mana pihak kepada permohonan itu.

(2) Apabila suatu permohonan dibuat di bawah subseksyen (1), Mahkamah boleh memutuskan —

- (a) apa-apa persoalan yang berhubungan dengan hak atau hak milik mana-mana orang yang adalah suatu pihak kepada permohonan itu supaya namanya dicatatkan dalam atau ditinggalkan daripada daftar itu, sama ada persoalan itu timbul antara anggota atau anggota yang dikatakan di suatu pihak dan syarikat Langkawi itu di suatu pihak yang lain; dan
- (b) secara amnya, apa-apa persoalan yang perlu atau suai manfaat untuk diputuskan bagi pembedulan daftar itu.

(3) Mahkamah apabila membuat suatu perintah bagi pembedulan daftar itu hendaklah melalui perintahnya mengarahkan suatu notis mengenai pembedulan itu diserahkan kepada Pendaftar.

(4) Tiada apa-apa permohonan untuk pembedulan sesuatu daftar berkenaan dengan sesuatu catatan yang telah dibuat dalam daftar lebih dari tiga puluh tahun sebelum tarikh permohonan itu boleh dilayan oleh Mahkamah.

PENGGAL 5

PENYATA SYARIKAT

Penyata syarikat Langkawi

80. (1) Pendaftar boleh, sebagaimana dalam hal keadaan yang disifatkan perlu melalui notis bertulis, menghendaki suatu syarikat Langkawi untuk menyerahkan kepada Pendaftar suatu penyata berkenaan dengan syarikat itu bagi suatu tahun kalendar tertentu.

(2) Penyata itu hendaklah mengandungi butir yang ditetapkan dan mengikut bentuk yang ditetapkan bagi maksud itu atau yang seberapa hampir dengannya sebagaimana hal keadaan membenarkan, dan hendaklah ditandatangani oleh seorang pengarah atau setiausaha syarikat itu.

(3) Jika sesuatu syarikat Langkawi tidak mematuhi seksyen ini, syarikat itu dan tiap-tiap pegawai syarikat itu yang ingkar adalah melakukan suatu kesalahan terhadap Akta ini.

Penalti: Sepuluh ribu ringgit. Penalti ingkar.

BAHAGIAN VI

AKAUN DAN AUDIT

PENGAL 1

AKAUN

Akaun yang perlu disimpan

81. (1) Sesuatu syarikat Langkawi hendaklah menyebabkan disimpan rekod perakaunan dan rekod lain yang sepatutnya yang dengan secukupnya akan menghuraikan transaksi dan kedudukan kewangan syarikat itu.

(2) Tiap-tiap syarikat Langkawi dan pengarah syarikat itu hendaklah menyebabkan catatan yang sesuai dibuat dalam rekod perakaunan dan rekod lain syarikat itu dalam masa enam puluh hari selepas selesainya transaksi yang berhubungan dengan rekod itu.

(3) Rekod perakaunan dan rekod lain suatu syarikat Langkawi hendaklah disimpan di pejabat berdaftar syarikat itu atau di mana-mana tempat lain di Langkawi sebagaimana yang difikirkan sesuai oleh pengarah, dan rekod itu hendaklah pada bila-bila masa dibuka untuk pemeriksaan oleh mana-mana pengarah syarikat Langkawi itu dan hendaklah disimpan mengikut apa-apa cara yang akan membolehkan rekod itu diaudit dengan mudah dan sepatutnya.

(4) Walau apa pun subseksyen (3), rekod perakaunan dan rekod lain mengenai pengendalian suatu syarikat Langkawi di luar Langkawi boleh disimpan oleh syarikat itu di suatu tempat di luar Langkawi, dan hendaklah dihantar kepada dan disimpan di suatu tempat di Langkawi apa-apa pernyataan dan penyata berkenaan dengan perniagaan yang diuruskan dalam rekod perakaunan dan rekod lain yang disimpan sedemikian yang akan membolehkan supaya disediakan akaun untung dan kerugian dan kunci kira-kira yang benar dan adil dan apa-apa dokumen yang dikehendaki disertakan bersama dengannya.

(5) Jika mana-mana rekod perakaunan dan rekod lain disimpan di suatu tempat di luar Langkawi menurut subseksyen (4), syarikat itu hendaklah, jika dikehendaki oleh Pendaftar untuk mengemukakan rekod perakaunan dan rekod lain itu di suatu tempat di Langkawi, mematuhi kehendak itu.

(6) Pendaftar boleh, dalam mana-mana hal tertentu, mengarahkan supaya rekod perakaunan dan rekod lain bagi suatu syarikat Langkawi dibuka untuk pemeriksaan oleh seorang juruaudit yang diluluskan yang bertindak bagi pihak seorang pengarah suatu syarikat Langkawi, tetapi hanya apabila suatu aku janji bertulis diberikan kepada Pendaftar bahawa maklumat yang diperolehi oleh juruaudit itu semasa pemeriksaannya tidak akan dizahirkan olehnya kecuali kepada pengarah itu.

(7) Mana-mana pengarah suatu syarikat Langkawi yang tidak mengambil semua langkah yang munasabah untuk menjamin supaya syarikat itu mematuhi kehendak seksyen ini dan seksyen 83 dan 84 adalah melakukan suatu kesalahan terhadap Akta ini.

Akaun hendaklah dibentangkan di hadapan mesyuarat

82. (1) Tertakluk kepada seksyen 85, pengarah sesuatu syarikat Langkawi hendaklah menyebabkan supaya dibentangkan di hadapan syarikat itu dalam suatu mesyuarat anggota akaun diaudit atau akaun tidak diaudit, mengikut mana-mana yang berkenaan, bagi syarikat itu tidak lebih daripada sembilan bulan selepas tarikh setakat mana telah dibuat akaun diaudit atau akaun tidak diaudit itu.

(2) Walau apa pun subseksyen (1), suatu syarikat Langkawi tidak dikehendaki membentangkan di hadapan syarikat itu dalam suatu mesyuarat anggota akaun diaudit atau akaun tidak diaudit, mengikut mana-mana yang berkenaan, bagi syarikat itu sekiranya anggota itu dengan sebulat suara membuat resolusi bahawa akaun sedemikian tidak perlu dibentangkan dalam suatu mesyuarat anggota berkenaan dengan setiap tahun kewangan.

(3) Jika keingkaran berlaku dalam mematuhi seksyen ini, syarikat Langkawi itu dan tiap-tiap pegawai syarikat itu melakukan suatu kesalahan terhadap Akta ini.

Penalti: Sepuluh ribu ringgit. Penalti ingkar.

Akaun dihantar kepada anggota

83. Suatu salinan tiap-tiap akaun diaudit atau akaun tidak diaudit, mengikut mana-mana yang berkenaan, yang hendak dibentangkan di hadapan suatu syarikat Langkawi di suatu mesyuarat anggota berserta dengan suatu salinan laporan juruaudit ke atas akaun itu (jika berkenaan) hendaklah, tidak kurang daripada tujuh hari sebelum tarikh mesyuarat itu, dihantar kepada semua anggota syarikat itu.

Juruaudit hendaklah dilantik

84. (1) Tertakluk kepada seksyen 85, pengarah sesuatu syarikat Langkawi hendaklah, dalam masa sembilan puluh hari selepas ia diperbadankan, melantik seorang atau orang-orang sebagai juruaudit atau juruaudit-juruaudit syarikat itu.

(2) Suatu syarikat Langkawi hendaklah, bilamana ia melantik seorang juruaudit, menyerahkan kepada Pendaftar, dalam masa tiga puluh hari dari tarikh pelantikan juruaudit itu, suatu notis mengenainya dalam borang yang ditetapkan berserta dengan persetujuan bertulis juruaudit itu.

Juruaudit tidak diperlukan dalam keadaan tertentu

85. Sesuatu syarikat Langkawi tidak perlu melantik seorang juruaudit selama—

- (a) syarikat itu atau seorang pengarah, pegawai, ejen atau mana-mana orang bagi pihak syarikat itu tidak mengeluarkan suatu pelawaan atau mengedarkan borang permohonan kepada awam atau mana-mana orang awam untuk melanggan syer syarikat itu; atau
- (b) anggota syarikat memutuskan pada mesyuarat anggota syarikat itu bahawa pelantikan itu tidak perlu dibuat berkenaan dengan setiap tahun kewangan.

Pemberhentian dan peletakan jawatan juruaudit

86. (1) Suatu syarikat Langkawi boleh, di suatu mesyuarat anggota yang notis khas mengenainya telah diberi kepada juruaudit dan Pendaftar, tetapi tidak sebaliknya, memberhentikan seorang juruaudit daripada jawatannya, tetapi hendaklah di mesyuarat yang mana juruaudit itu diberhentikan atau di suatu mesyuarat anggota yang diadakan dalam masa sebulan kemudiannya melantik seorang juruaudit yang diluluskan untuk mengambil tempat juruaudit yang diberhentikan itu.

(2) Seorang juruaudit bagi suatu syarikat Langkawi boleh, jika dia bukannya seorang juruaudit tunggal, meletakkan jawatannya pada bila-bila masa tetapi seorang juruaudit tunggal bagi suatu syarikat Langkawi boleh meletakkan jawatannya di suatu mesyuarat anggota sahaja.

(3) Jika seorang juruaudit memberikan notis bertulis kepada pengarah suatu syarikat Langkawi bahawa dia berhasrat untuk meletakkan jawatannya, pengarah hendaklah, dengan seberapa segera yang praktik, memanggil suatu mesyuarat anggota syarikat itu bagi maksud melantik seorang juruaudit bagi menggantikan juruaudit yang berhasrat untuk meletakkan jawatannya, dan apabila juruaudit yang lain telah dilantik peletakan jawatannya itu akan berkuat kuasa.

(4) Suatu syarikat Langkawi hendaklah, dalam masa tiga puluh hari dan apa-apa pertukaran juruaudit syarikat itu, menyerahkan kepada Pendaftar suatu notis mengenainya dalam borang yang ditetapkan dan notis itu hendaklah disertakan dengan persetujuan bertulis juruaudit yang baru itu.

Saraan juruaudit

87. Fi dan perbelanjaan seorang juruaudit bagi suatu syarikat Langkawi, melainkan jika dikehendaki oleh juruaudit itu supaya ditetapkan melalui suatu ketetapan anggota syarikat itu, boleh ditetapkan oleh pengarah syarikat itu.

Juruaudit boleh menghadiri mesyuarat

88. Seorang juruaudit bagi suatu syarikat Langkawi boleh menghadiri dan bercakap di semua mesyuarat anggota syarikat itu.

Hak dan kewajipan juruaudit

89. (1) Tiap-tiap juruaudit bagi suatu syarikat Langkawi hendaklah melaporkan kepada anggota sama ada, pada pendapatnya, akaun syarikat itu telah disediakan dengan berpatutan supaya memberikan gambaran yang benar dan adil mengenai hal ehwal syarikat itu.

(2) Tiap-tiap juruaudit bagi suatu syarikat Langkawi adalah berhak untuk dibekalkan dengan suatu salinan memorandum dan perkara persatuan syarikat itu dan hendaklah membiasakan dirinya dengan terma dan syarat yang terkandung dalamnya.

BAHAGIAN VII

PERKIRAAN DAN PEMBENTUKAN SEMULA

Perkiraan

90. (1) Dalam seksyen ini, "perkiraan" ertinya—

- (a) sesuatu penyusunan semula atau pembentukan semula sesuatu syarikat Langkawi yang diperbadankan di bawah Akta ini;
- (b) sesuatu percantuman atau penyatuan satu syarikat Langkawi atau lebih dengan satu syarikat Langkawi lain atau lebih, jika syarikat yang berterusan itu atau syarikat yang disatukan itu adalah suatu syarikat Langkawi;
- (c) sesuatu pemisahan dua perniagaan atau lebih yang dijalankan oleh sesuatu syarikat Langkawi; atau
- (d) apa-apa gabungan mana-mana perkara yang dinyatakan dalam perenggan (a) hingga (c).

(2) Pengarah suatu syarikat Langkawi boleh, melalui suatu ketetapan oleh pengarah, meluluskan sesuatu pelan perkiraan yang mengandungi butir-butir mengenai perkiraan yang dicadangkan.

(3) Setelah pelan perkiraan diluluskan oleh pengarah, syarikat Langkawi itu hendaklah membuat suatu permohonan kepada Mahkamah untuk kelulusan bagi pelan perkiraan yang dicadangkan itu.

(4) Mahkamah boleh, apabila suatu permohonan dibuat di bawah subseksyen (3), membuat suatu perintah interim atau muktamad, dan dalam membuat perintah itu Mahkamah boleh—

- (a) menentukan apa-apa notis, jika ada, mengenai perkiraan yang dicadangkan itu yang perlu diberi kepada mana-mana orang;
- (b) menentukan sama ada kelulusan mengenai perkiraan yang dicadangkan itu oleh mana-mana orang hendaklah diperoleh dan cara memperoleh kelulusan itu;
- (c) menentukan sama ada mana-mana pemegang saham atau obligasi hutang dalam syarikat itu boleh menentang perkiraan yang dicadangkan itu dan menerima pembayaran bagi nilai sahamnya atau obligasi hutangnya;

- (d) menjalankan sesuatu pendengaran dan membenarkan mana-mana orang yang berkepentingan untuk hadir; dan
- (e) meluluskan atau menolak pelan perkiraan sebagaimana yang dicadangkan atau meluluskannya dengan apa-apa pindaan sepertimana yang diarahkan olehnya.

(5) Jika Mahkamah membuat sesuatu perintah yang meluluskan suatu pelan perkiraan, pengarah syarikat Langkawi itu, jika mereka masih berminat untuk menyempurnakan pelan itu, hendaklah mengesahkan pelan perkiraan sepertimana yang telah diluluskan oleh Mahkamah, sama ada atau tidak Mahkamah telah mengarahkan apa-apa pindaan dibuat kepada pelan perkiraan itu.

(6) Pengarah syarikat Langkawi, setelah mengesahkan pelan perkiraan itu, hendaklah —

- (a) memberikan notis kepada orang yang Mahkamah kehendaki diberikan notis; dan
- (b) menyerahkan pelan perkiraan kepada orang itu untuk kelulusan jika dikehendaki oleh perintah Mahkamah.

(7) Setelah pelan perkiraan telah diluluskan oleh orang yang daripadanya kelulusan dikehendaki oleh perintah Mahkamah, perkara perkiraan hendaklah disempurnakan oleh syarikat Langkawi itu dan hendaklah mengandungi —

- (a) pelan perkiraan itu;
- (b) perintah Mahkamah yang meluluskan pelan perkiraan itu; dan
- (c) cara yang mana pelan perkiraan itu telah diluluskan, jika kelulusan dikehendaki oleh perintah Mahkamah.

(8) Perkara perkiraan hendaklah diserahkan kepada Pendaftar yang hendaklah menyimpan dan mendaftarkannya dalam daftar.

(9) Apabila perkara perkiraan didaftarkan, Pendaftar hendaklah mengeluarkan sesuatu perakuan yang telah ditandatangani dan dimeterai yang memperakui bahawa perkara perkiraan telah didaftarkan.

(10) Suatu perakuan perkiraan yang dikeluarkan oleh Pendaftar di bawah subseksyen (9) hendaklah menjadi keterangan *prima facie* mengenai pematuhan semua kehendak Akta ini yang berkenaan dengan perkiraan itu.

(11) Suatu perkiraan hendaklah berkuat kuasa dari tarikh perkara perkiraan didaftarkan oleh Pendaftar atau pada tarikh yang kemudiannya, yang mana tarikh itu hendaklah tidak lebih daripada tiga puluh hari dari tarikh perkara perkiraan itu didaftarkan dengan Pendaftar, sebagaimana yang dinyatakan dalam perkara perkiraan itu.

Peraturan-peraturan berkenaan dengan pengambilalihan dan percantuman

91. Menteri boleh membuat peraturan-peraturan untuk menyelia dan mengawal transaksi pengambilalihan dan percantuman.

BAHAGIAN VIII

SYARIKAT LANGKAWI ASING

Pemakaian dan tafsiran

92. (1) Bahagian ini terpakai bagi sesuatu syarikat asing hanya jika syarikat itu mempunyai sesuatu tempat perniagaan atau menjalankan perniagaan di Langkawi dan tidak didaftarkan di bawah Akta Syarikat 1965.

(2) Dalam Bahagian ini, ungkapan "menjalankan perniagaan di Langkawi" ertinya menjalankan perniagaan berkenaan dengan aktiviti yang berhubungan dengan kapal layar di, dari atau melalui Langkawi.

(3) Walau apa pun subseksyen (1), sesuatu syarikat Langkawi asing tidak boleh dikira sebagai menjalankan perniagaan di Langkawi hanya oleh sebab hakikat bahawa di Langkawi, syarikat itu—

- (a) adalah atau menjadi suatu pihak kepada apa-apa tindakan atau guaman atau apa-apa prosiding pentadbiran atau timbangtara atau apa-apa tuntutan atau pertikaian, atau
- (b) menjalankan transaksi berasingan yang tidak disolisit yang diselesaikan dalam tempoh tiga puluh satu hari, yang bukannya satu daripada sebilangan transaksi yang seumpama yang diulangi lebih daripada dua kali.

Pendaftaran syarikat Langkawi asing

93. (1) Sesuatu syarikat asing tidak boleh mempunyai sesuatu tempat perniagaan atau menjaikan perniagaan di Langkawi melainkan jika ia didaftarkan sebagai suatu syarikat Langkawi asing di bawah Bahagian ini, dan sesuatu syarikat asing yang bertindak dan tiap-tiap pegawai syarikat itu yang membenarkan syarikat asing itu untuk bertindak dengan melanggar subseksyen ini adalah melakukan suatu kesalahan terhadap Akta ini.

(2) Tiap-tiap syarikat asing hendaklah, sebelum menubuhkan sesuatu tempat perniagaan atau menjaikan perniagaan di Langkawi, menyerahkan kepada Pendaftar untuk pendaftaran —

- (a) sesuatu salinan yang diperakui perakuan pemerbadanannya atau pendaftarannya di tempat ia diperbadankan atau di tempat asalnya, atau suatu dokumen yang mempunyai kesan yang seumpama;
- (b) sesuatu salinan yang diperakui piagam, statut atau memorandum dan perkara persatuan atau surat cara lain yang menjadi atau menentukan perlembagaan syarikat itu;
- (c) sesuatu senarai pengarah dan pegawainya yang mengandungi butir-butir yang seumpama berkenaan dengan pengarah syarikat itu sebagaimana yang dikehendaki terkandung dalam daftar pengarah dan pegawai suatu syarikat Langkawi di bawah seksyen 65;
- (d) jika senarai yang dirujuk dalam perenggan (c) termasuk pengarah yang bermastautin di Langkawi yang merupakan anggota lembaga pengarah tempatan, suatu memorandum yang disempurnakan dengan sewajarnya oleh atau bagi pihak syarikat Langkawi asing itu yang menyatakan kuasa pengarah tempatan itu;
- (e) sesuatu memorandum pelantikan atau surat kuasa wakil di bawah meterai syarikat Langkawi asing itu atau yang disempurnakan bagi pihak syarikat itu mengikut apa-apa cara yang mengikat syarikat itu dan, dalam mana-mana hal itu, yang ditentusahkan mengikut cara yang ditetapkan, yang menyatakan nama dan alamat suatu entiti pengurusan yang diberi kuasa untuk menerima bagi pihaknya penyampaian proses dan apa-apa notis yang dikehendaki untuk disampaikan ke atas syarikat itu; dan

(f) sesuatu akuan berkanun dalam bentuk yang ditetapkan yang dibuat oleh seorang pegawai entiti pengurusan itu,

dan Pendaftar bolehlah, apabila dibayar fi yang ditetapkan, dan tertakluk kepada Akta ini dan apa-apa syarat yang boleh dikenakan olehnya, mendaftarkan syarikat itu di bawah Bahagian ini sebagai suatu syarikat Langkawi asing dengan mendaftarkan dokumen itu.

(3) Pendaftar hendaklah mengeluarkan sesuatu perakuan dalam bentuk yang ditetapkan berkenaan dengan tiap-tiap pendaftaran suatu syarikat Langkawi asing, dan perakuan itu hendaklah menjadi keterangan konklusif bahawa kehendak mengenai pendaftaran telah dipatuhi.

(4) Jika suatu memorandum pelantikan atau surat kuasa wakil yang diserahkan kepada Pendaftar menurut perenggan (2)(e) telah disempurnakan oleh seseorang bagi pihak suatu syarikat Langkawi asing, suatu salinan surat ikatan atau dokumen yang melaluinya orang itu diberi kuasa untuk menyempurnakan memorandum pelantikan atau surat kuasa wakil itu, yang ditentukan melalui akuan berkanun mengikut cara yang ditetapkan, hendaklah diserahkan kepada Pendaftar dan salinannya hendaklah bagi segala maksud dikira sebagai salinan asal.

(5) Suatu syarikat Langkawi asing hendaklah membayar suatu fi tahunan bagi apa-apa amaun sebagaimana yang ditetapkan tidak lewat daripada tiga puluh hari dari 1 Januari bagi setiap tahun kalendar. -

Larangan dan sekatan ke atas syarikat Langkawi asing

94. Sesuatu syarikat Langkawi asing tidak boleh menjalankan apa-apa perniagaan di Langkawi yang sesuatu syarikat Langkawi dilarang menjalankan.

Pejabat berdaftar syarikat Langkawi asing

95. Tiap-tiap syarikat Langkawi asing hendaklah pada bila-bila masa mempunyai suatu pejabat berdaftar di Langkawi, yang pejabat itu adalah pejabat utama suatu entiti pengurusan.

Penyata hendaklah diserahkan apabila dokumen, dsb., diubah

96. (1) Sekiranya apa-apa pertukaran atau perubahan dibuat dalam—

- (a) piagam, statut, memorandum atau perkara persatuan sesuatu syarikat Langkawi asing, atau surat cara yang lain yang berhubungan dengan syarikat itu, yang diserahkan dengan Pendaftar;
- (b) pengarah suatu syarikat Langkawi asing atau dalam nama atau alamat mana-mana pengarah;
- (c) alamat pejabat berdaftar suatu syarikat Langkawi asing di tempat pemerbadanannya atau tempat asalnya;
- (d) nama suatu syarikat Langkawi asing;
- (e) kuasa mana-mana pengarah yang bermastautin di Langkawi yang merupakan anggota lembaga pengarah tempatan suatu syarikat Langkawi asing; atau
- (f) entiti pengurusan atau nama atau alamat entiti pengurusan yang dirujuk dalam perenggan 93(2)(V),

syarikat Langkawi asing itu hendaklah, dalam masa satu bulan selepas pertukaran atau perubahan itu, menyerahkan kepada Pendaftar butir-butir mengenai pertukaran atau perubahan itu dan apa-apa dokumen sebagaimana yang dikehendaki oleh peraturan-peraturan.

(2) Apabila menerima butir-butir yang disebut terdahulu mengenai pertukaran atau perubahan itu, Pendaftar hendaklah, tertakluk kepada Akta ini, mendaftarkan pertukaran atau perubahan itu.

(3) Apabila diserahkan kepada Pendaftar butir-butir mengenai apa-apa pertukaran atau perubahan mengenai nama suatu syarikat Langkawi asing yang dirujuk dalam perenggan (1)(d), Pendaftar hendaklah mengeluarkan suatu perakuan dalam bentuk yang ditetapkan yang telah ditandatangani dan dimeterai, dan perakuan itu hendaklah menjadi keterangan *prima facie* dalam semua Mahkamah mengenai pertukaran dan perubahan kepada nama syarikat itu.

(4) Jika sesuatu syarikat Langkawi asing menambahkan atau mengurangkan modal syer yang dibenarkan, syarikat itu hendaklah, dalam masa tiga puluh hari selepas pertukaran sedemikian, menyerahkan kepada Pendaftar notis mengenai amaun yang daripadanya dan yang kepadanya ia telah ditukarkan sedemikian.

(5) Jika sesuatu syarikat Langkawi asing yang tidak mempunyai modal syer menambahkan jumlah anggotanya yang melebihi nombor yang didaftarkan, ia hendaklah, dalam masa tiga puluh hari selepas penambahan itu diputuskan atau berlaku, menyerahkan kepada Pendaftar notis mengenai penambahan itu.

Penyampaian ke atas syarikat Langkawi asing

97. Apa-apa proses atau dokumen yang dikehendaki disampaikan ke atas sesuatu syarikat Langkawi asing adalah disampaikan dengan secukupnya jika proses atau dokumen itu dialamatkan kepada syarikat Langkawi asing itu dan ditinggalkan atau dihantarkan melalui pos ke pejabat berdaftar di Langkawi, tetapi —

- (a) jika pada bila-bila masa pejabat berdaftar yang dimaklumkan tidak lagi wujud; atau
- (b) jika atas apa-apa sebab lain penyampaian proses atau notis tidak boleh disempurnakan,

dokumen itu bolehlah disampaikan ke atas syarikat itu dengan meninggalkannya di, atau menghantarkannya melalui pos kepada, mana-mana tempat perniagaan yang ditubuhkan oleh syarikat itu di Langkawi, atau, jika tiada tempat perniagaan sedemikian telah ditubuhkan, dokumen itu bolehlah disampaikan ke atas syarikat itu melalui pos berdaftar ke mana-mana tempat perniagaan syarikat itu di negara syarikat itu diperbadankan.

Pemberhentian perniagaan di Langkawi

98. Jika sesuatu syarikat Langkawi asing terhenti mempunyai suatu tempat perniagaan atau menjalankan perniagaan di Langkawi, syarikat itu hendaklah, dalam masa tiga puluh hari selepas syarikat itu terhenti sedemikian, menyerahkan kepada Pendaftar notis mengenai fakta itu, dan dari hari notis itu diserahkan sedemikian, obligasi syarikat itu untuk menyerahkan apa-apa dokumen (yang bukannya suatu dokumen yang sepatutnya diserahkan sebelum hari itu) kepada Pendaftar hendaklah terhenti, dan Pendaftar hendaklah dengan sertamerta membatalkan nama syarikat Langkawi asing itu daripada daftar.

Pelikuidasian atau pembubaran syarikat Langkawi asing di tempat pemerbadanan atau tempat asal

99. (1) Jika sesuatu syarikat Langkawi asing dilikuidasikan atau dibubarkan di tempat pemerbadanannya atau di tempat asalnya—

- (a) entiti pengurusan hendaklah, dalam masa satu bulan selepas bermulanya pelikuidasian atau pembubaran itu atau dalam apa-apa masa selanjutnya sebagaimana Pendaftar dalam hal keadaan khas boleh membenarkan, menyerahkan atau menyebabkan diserahkan kepada Pendaftar notis mengenai fakta itu dan, jika seorang pelikuidasi dilantik, suatu notis mengenai pelantikan itu;
- (b) Pendaftar hendaklah, selepas menerima notis itu, dengan serta-merta melantik seorang pelikuidasi dan, sehingga penggulangan hal ehwal syarikat itu di Langkawi selesai, syarikat Langkawi asing itu hendaklah disifatkan sebagai terus wujud di Langkawi; dan
- (c) Mahkamah hendaklah disifatkan telah memerintahkan supaya syarikat itu digulung.

(2) Pelikuidasi yang dilantik oleh Pendaftar hendaklah mendapatkan semua aset syarikat Langkawi asing itu yang terletak atau yang boleh didapati kembali di Langkawi dan hendaklah, dalam berbuat sedemikian, mempunyai semua kuasa seseorang pelikuidasi sesuatu syarikat Langkawi.

(3) Sebelum membayar atau memindahkan hakmilik kepada seorang pelikuidasi asing bagi suatu syarikat Langkawi asing di tempat ia dibentuk atau diperbadankan apa-apa aset yang didapati di dalam Langkawi, pelikuidasi yang dilantik oleh Pendaftar hendaklah —

- (a) membayar kepada Pendaftar semua penalti, kos, fi dan caj yang genap masa dan terhutang;
- (b) membayar amaun semua cukai yang kena dibayar di bawah Akta Cukai Pendapatan 1967 [*Akta 53*]; dan
- (c) membayar kepada mana-mana orang yang bermastautin di Langkawi yang kepadanya, pada masa pelantikan pelikuidasi di Langkawi, apa-apa hutang yang ditanggung *bonafide* oleh suatu syarikat Langkawi asing berkenaan dengan pembekalan perkhidmatan kepada atau untuk syarikat Langkawi asing itu genap masa, amaun hutang sedemikian,

dan apa-apa penalti, kos, fi, caj, cukai dan hutang sedemikian hendaklah menjadi suatu gadaian ke atas aset syarikat Langkawi asing itu yang berperingkat selepas kos pelikuidasi yang dilantik oleh Pendaftar tetapi mempunyai keutamaan daripada apa-apa jua pun caj dan tuntutan yang lain.

(4) Peruntukan Bahagian X Akta Syarikat 1965 yang berhubungan dengan pembatalan daripada daftar nama syarikat yang tidak berfungsi hendaklah terpakai *mutatis mutandis* kepada sesuatu syarikat Langkawi asing.

Nama syarikat Langkawi asing

100. (1) Kecuali dengan keizinan Menteri, sesuatu syarikat Langkawi asing tidak boleh didaftarkan dengan suatu nama yang pada pendapat Pendaftar adalah nama yang tidak diingini atau adalah suatu nama, atau termasuk suatu nama, yang daripada jenis yang Pendaftar tidak selainnya sanggup untuk menerima bagi pendaftaran.

(2) Jika suatu syarikat Langkawi asing didaftarkan, sama ada kerana kesilapan atau selainnya, dengan suatu nama yang dengannya ia tidak patut didaftarkan, Pendaftar boleh, selepas memberikan notis selama tiga puluh hari kepada syarikat Langkawi asing itu yang menghendaki syarikat itu menukarkan namanya, membatalkan syarikat itu daripada daftar apabila syarikat itu ingkar mematuhi kehendak itu.

(3) Tiada syarikat Langkawi asing boleh menggunakan, di Langkawi atau di tempat lain, berkenaan dengan tindakan yang telah dibuat atau akan dibuat di Langkawi, apa-apa nama selain nama yang dengannya syarikat itu telah didaftarkan di bawah Bahagian ini, dan tiap-tiap syarikat Langkawi asing dan tiap-tiap pegawai syarikat itu yang dengan disedarinya memberi kuasa atau membenarkan keingkaran itu adalah melakukan suatu kesalahan terhadap Akta ini.

Penyata syarikat Langkawi asing

101. (1) Sesuatu syarikat Langkawi asing hendaklah membuat suatu penyata berkenaan dengan syarikat itu bagi tiap-tiap tahun kalendar.

(2) Penyata itu hendaklah mengandungi butir yang ditetapkan dan mengikut bentuk yang ditetapkan bagi maksud itu atau yang seberapa hampir dengannya sebagaimana hal keadaan membenarkan.

(3) Pendaftar boleh, sebagaimana dalam hal keadaan yang disifatkan perlu melalui notis bertulis, menghendaki suatu syarikat Langkawi asing untuk menyerahkan kepada Pendaftar suatu penyata berkenaan dengan syarikat itu bagi suatu tahun kalendar tertentu.

BAHAGIAN IX ENTITI PENGURUSAN

Pemberikuasaan entiti pengurusan

102. Tertakluk kepada apa-apa terma dan syarat yang difikirkannya sesuai untuk dikenakan, Menteri boleh memberikan kuasa kepada mana-mana perbadanan untuk menjadi suatu entiti pengurusan bagi maksud bertindak bagi pihak sesuatu syarikat Langkawi atau syarikat Langkawi asing menurut peruntukan Akta ini.

Pembatalan pemberikuasaan

103. Menteri boleh membatalkan suatu pemberikuasaan yang diberikan di bawah seksyen 102 jika entiti pengurusan itu—

- (a) telah melanggar peruntukan mana-mana terma, syarat, sekatan atau batasan sebagaimana yang dinyatakan dalam pemberikuasaan itu; atau
- (b) telah disabitkan dengan suatu kesalahan di bawah Akta ini atau suatu kesalahan jenayah di Malaysia atau di mana-mana negara atau bidang kuasa lain.

BAHAGIAN X

PELBAGAI

Penerimaan dan penggulangan

104. (1) Peruntukan Bahagian VIII dan X Akta Syarikat 1965 (setakat yang ia berhubung dengan sesuatu syarikat yang dihadkan melalui syer) hendaklah terpakai bagi penerimaan dan penggulangan

sesuatu syarikat Langkawi, tertakluk kepada apa-apa pengubahsuaian yang Menteri boleh raembuat melalui perintah, dan khususnya rujukan kepada suatu "syarikat" hendaklah dikira sebagai rujukan kepada suatu syarikat Langkawi.

(2) Kaedah-Kaedah Syarikat (Penggulungan) 1972 [*P.U. (A) 289/72*] hendaklah juga terpakai bagi penggulungan sesuatu syarikat Langkawi, tertakluk kepada apa-apa pengubahsuaian yang Menteri boleh membuat melalui perintah, dan khususnya rujukan kepada suatu "syarikat" hendaklah dikira sebagai rujukan kepada suatu syarikat Langkawi.

(3) Dalam seksyen ini, "pengubahsuaian" termasuklah pindaan, penyesuaian, perubahan, variasi, penambahan, pembahagian, penggantian atau pengecualian.

Penyampaian dokumen ke atas syarikat Langkawi

105. Apa-apa dokumen bolehlah disampaikan kepada sesuatu syarikat Langkawi dengan meninggalkannya di, atau menghantarkannya melalui pos kepada, pejabat berdaftar syarikat itu, atau jika pejabat berdaftar syarikat itu terhenti wujud, dokumen itu boleh disampaikan dengan meninggalkannya di atau menghantarkannya melalui pos kepada mana-mana tempat perniagaan yang ditubuhkan oleh syarikat itu di Langkawi.

Pemindahan hakmilik dari Langkawi

106. (1) Sesuatu syarikat Langkawi boleh, apabila mendapat kelulusan daripada Pendaftar dan dalam masa dua bulan dari tarikh yang padanya kelulusan itu diperoleh, memohon kepada pegawai yang sesuai dari negara yang lain atau suatu bidang kuasa dalam negara itu, yang menurut undang-undangnya pemindahan hakmilik sedemikian dibenarkan, bagi sesuatu surat cara yang memindahkan hakmilik syarikat itu seolah-olah syarikat itu telah diperbadankan di bawah undang-undang negara atau bidang kuasa lain itu, dan pada tarikh surat cara pemindahan hakmilik itu, syarikat itu hendaklah, tertakluk kepada peruntukan seksyen ini, menjadi suatu syarikat di bawah undang-undang negara atau bidang kuasa itu dan didomisilkan di negara atau bidang kuasa itu.

(2) Sesuatu syarikat Langkawi tidak boleh memohon kepada Pendaftar bagi kelulusan dibawah subseksyen (1) melainkan jika—

(a) permohonan itu dibenarkan—

(i) jika syarikat itu mempunyai modal syer, oleh pemegang tidak kurang daripada tiga perempat syer daripada setiap kelas;

(ii) oleh pemegang tidak kurang daripada tiga perempat debentur syarikat itu (jika ada) daripada setiap kelas; dan

(iii) oleh semua pengarah syarikat itu; dan

(b) syarikat itu, tidak kurang daripada tiga puluh hari sebelum memohon kepada Pendaftar untuk kelulusan sedemikian, telah menyiarkan suatu notis dalam suatu surat khabar yang secara amnya diedarkan di Langkawi mengenai niatnya untuk membuat permohonan itu,

dan sesuatu permohonan tidak boleh diterima melainkan jika permohonan itu disertakan dengan suatu affidavit yang diangkat sumpah oleh seorang pengarah syarikat itu yang menyatakan —

(c) nama dan alamat pemiutang syarikat itu dan jumlah amaun keterhutangannya kepada pemiutang itu; dan

(d) suatu pernyataan yang membawa kesan bahawa pemindahan domisil yang dicadangkan itu tidak akan memudaratkan hak atau kepentingan yang sepatutnya mana-mana anggota syarikat, pemegang debentur atau pemiutang syarikat itu.

(3) Pendaftar tidak boleh memberikan kelulusannya kepada suatu syarikat Langkawi yang memohon untuk berpindah ke negara atau bidang kuasa lain melainkan jika dia berpuas hati bahawa—

(a) kehendak subseksyen (2) telah dipatuhi; dan

(b) syarikat itu telah mematuhi mana-mana peruntukan Akta ini yang sepatutnya telah dipatuhi oleh syarikat itu,

dan Pendaftar boleh memberikan kelulusannya atas apa-apa syarat yang difikirkannya perlu untuk memelihara hak dan kepentingan yang sepatutnya mana-mana anggota, pemegang debentur atau pemiutang syarikat itu atau mana-mana kelas anggota, pemegang

debentur atau pemiutang sedemikian dan apabila syarikat itu mengambil apa-apa langkah sebagaimana yang difikirkan perlu oleh Pendaftar untuk meremedikan apa-apa kegagalan untuk mematuhi apa-apa peruntukan Akta ini.

(4) Apabila suatu surat cara yang memindahkan syarikat itu ke negara atau bidang kuasa lain telah disempurnakan oleh pegawai yang sesuai di negara atau bidang kuasa lain itu, syarikat itu hendaklah dengan serta-merta memberitahu Pendaftar mengenai butiran itu dan syarikat itu hendaklah disifatkan sebagai terhenti menjadi suatu syarikat yang diperbadankan di Langkawi dari tarikh pemindahannya ke negara atau bidang kuasa lain itu mula berkuat kuasa dan Pendaftar hendaklah memotong nama syarikat itu daripada daftar:

Dengan syarat bahawa tiada apa-apa dalam subseksyen ini boleh mengambil atau menyentuh bidang kuasa mana-mana Mahkamah (sama ada Mahkamah Tinggi atau selainnya) untuk mendengar dan menyelesaikan apa-apa prosiding yang dimulakan dalam Mahkamah itu oleh atau terhadap syarikat itu sebelum syarikat itu terhenti menjadi suatu syarikat yang diperbadankan di Langkawi.

(5) Jika suatu syarikat Langkawi memberitahu Pendaftar di bawah subseksyen (4) bahawa suatu surat cara yang memindahkan syarikat itu ke negara atau bidang kuasa lain telah disempurnakan oleh pegawai yang sesuai dari negara atau bidang kuasa lain itu dan pemberitahuan itu adalah palsu, maka, walau pun Pendaftar telah memotong nama syarikat itu daripada daftar menurut subseksyen itu—

- (a) liabiliti (jika ada) mana-mana pegawai atau anggota syarikat itu hendaklah berterusan dan boleh dikuatkuasakan seolah-olah syarikat itu masih didaftarkan di bawah Akta ini; dan
- (b) syarikat itu boleh digulung menurut peruntukan Akta ini seolah-olah syarikat itu masih didaftarkan di bawah Akta ini.

Kos prosiding di hadapan Mahkamah

107. Mahkamah boleh, berkenaan dengan apa-apa prosiding di hadapannya di bawah Akta ini, mengikut budi bicaranya sendiri, mengarahkan supaya kos suatu pihak dibayar dalam apa-apa amaun dan oleh mana-mana pihak lain sebagaimana yang difikirkannya adil.

Jaminan untuk kos

108. Jika sesuatu syarikat Langkawi adalah plaintif dalam apa-apa tindakan Mahkamah atau prosiding undang-undang yang lain, Mahkamah boleh, pada bila-bila masa, menghendaki jaminan yang secukupnya diberikan untuk kos dan Mahkamah boleh menggantung semua prosiding sehingga jaminan itu diberikan.

Pelupusan syer pemegang syer yang tidak diketahui di mana berada

109. (1) Jika setelah menjalankan usaha yang munasabah, suatu syarikat Langkawi tidak dapat mengetahui di mana beradanya seorang pemegang syer berdaftar bagi suatu tempoh yang tidak kurang dari sepuluh tahun, syarikat itu boleh menyebabkan suatu notis disiarkan dalam suatu surat khabar harian yang diedarkan di tempat yang ditunjukkan dalam daftar anggota sebagai alamat pemegang syer itu yang menyatakan bahawa syer itu, selepas tamatnya satu bulan dari tarikh notis itu, boleh dilucuthakkan kepada Pendaftar.

(2) Jika setelah tamatnya satu bulan dari tarikh suatu notis di bawah subseksyen (1), tempat di mana pemegang syer itu berada masih belum diketahui, syarikat itu boleh memindahkan syer yang dipegang oleh pemegang syer itu dalam syarikat itu kepada Pendaftar dan bagi maksud itu boleh menyempurnakan untuk dan bagi pihak pemunya syer itu pemindahan syer itu kepada Pendaftar; dan orang yang syernya telah dilucuthakkan itu hendaklah terhenti menjadi seorang anggota berkenaan dengan syer yang telah dilucuthakkan itu, tetapi hendaklah, walaupun pelucuthakan itu, masih kena membayar kepada syarikat itu semua wang yang, pada tarikh pelucuthakan itu, kena dibayar olehnya kepada syarikat itu berkenaan dengan syer itu, tetapi liabilitinya hendaklah terhenti jika dan apabila syarikat itu menerima bayaran sepenuhnya bagi semua wang yang berkenaan dengan syer itu.

Kuasa untuk memberi relief

110. (1) Dalam apa-apa prosiding bagi kecuaiian, keingkaran, kemungkiran kewajipan, atau pecah amanah terhadap seseorang yang kepadanya seksyen ini terpakai, jika ternyata kepada Mahkamah yang di hadapannya prosiding itu diambil bahawa orang itu adalah atau boleh bertanggungjawab berkenaan dengan kecuaiian, keingkaran, kemungkiran kewajipan atau pecah amanah itu, tetapi dia telah bertindak dengan jujur dan munasabah dan bahawa, dengan

mengambil kira semua hal keadaan kes itu termasuk hal keadaan yang berkaitan dengan pelantikannya, dia patut secara adil dimaafkan bagi kecuaiannya, keingkaran, kemungkiran kewajipan atau pecah amanah itu, Mahkamah boleh melepaskannya sama ada sepenuhnya atau sebahagiannya daripada tanggungannya atas apa-apa terma sebagaimana yang difikirkan sesuai oleh Mahkamah.

(2) Jika mana-mana orang yang kepadanya seksyen ini terpakai mempunyai sebab untuk memahami bahawa apa-apa tuntutan akan atau mungkin dibuat terhadapnya berkenaan dengan apa-apa kecuaiannya, keingkaran, kemungkiran kewajipan atau pecah amanah, dia boleh memohon kepada Mahkamah untuk mendapatkan relief, dan Mahkamah itu hendaklah mempunyai kuasa yang sama untuk memberikan relief kepadanya di bawah seksyen ini sepertimana Mahkamah akan mempunyai sekiranya Mahkamah itu adalah suatu Mahkamah yang di hadapannya prosiding terhadapnya bagi kecuaiannya, keingkaran, kemungkiran kewajipan atau pecah amanah telah dibawa.

(3) Orang yang kepadanya seksyen ini terpakai adalah —

- (a) pegawai sesuatu syarikat Langkawi;
- (b) orang yang diambil kerja oleh sesuatu syarikat Langkawi sebagai juruaudit, sama ada orang itu adalah pegawai syarikat itu atau tidak;
- (c) pakar dalam pengertian Akta ini; dan
- (d) semua orang, termasuk penerima dan pengurus atau pelikuidasi, yang dilantik atau diarahkan oleh Mahkamah atau Pendaftar untuk menjalankan apa-apa kewajipan di bawah Akta ini berhubung dengan sesuatu syarikat Langkawi.

Luar aturan dalam prosiding

111. (1) Tiada apa-apa prosiding di bawah Akta ini boleh menjadi tidak sah oleh apa-apa peninggalan, kecacatan, kesilapan, luar aturan atau kekurangan notis atau masa melainkan jika Mahkamah berpendapat bahawa ketidakadilan substansial telah atau boleh disebabkan oleh peninggalan, kecacatan, kesilapan, luar aturan atau kekurangan itu yang tidak boleh diremedikan oleh apa-apa perintah Mahkamah dan Mahkamah boleh, jika difikirkannya sesuai,

membuat suatu perintah atau arahan yang mengisytiharkan bahawa prosiding sedemikian adalah sah walaupun mana-mana peninggalan, kecacatan, kesilapan, luar aturan atau kekurangan sedemikian.

(2) Tanpa menyentuh keluasan subseksyen (1) atau mana-mana peruntukan lain Akta ini, jika apa-apa peninggalan, kecacatan, kesilapan, luar aturan atau kekurangan, termasuk ketiadaan kuorum dalam mana-mana mesyuarat syarikat Langkawi itu, telah berlaku dalam pengurusan atau pentadbiran suatu syarikat Langkawi yang disebabkan apa-apa pelanggaran peruntukan Akta ini telah berlaku, atau yang disebabkan telah berlaku keingkaran dalam mematuhi memorandum atau perkara persatuan syarikat itu, atau yang disebabkan apa-apa prosiding dalam atau yang berkaitan dengan apa-apa mesyuarat atau yang berupa mesyuarat telah dijadikan tidak berkesan, termasuk kegagalan untuk membuat atau menyerahkan apa-apa perisytiharan kesolvenan, Mahkamah —

- (a) boleh, sama ada atas usulnya sendiri atau atas sesuatu permohonan yang diserahkan oleh mana-mana orang yang berkepentingan, membuat apa-apa perintah atau arahan sebagaimana yang difikirkannya sesuai untuk membetulkan atau menyebabkan dibetulkan atau menjadikan negatif atau mengubahsuaikan atau menyebabkan menjadi negatif atau diubahsuaikan akibat di sisi undang-undang apa-apa peninggalan, kecacatan, kesilapan, luar aturan atau kekurangan itu, atau untuk mengesahkan apa-apa tindakan, perkara atau benda yang dijadikan tidak sah oleh atau akibat daripada apa-apa peninggalan, kecacatan, kesilapan, luar aturan atau kekurangan itu;
- (b) hendaklah, sebelum membuat apa-apa perintah atau arahan sedemikian, memuaskan hatinya bahawa perintah atau arahan sedemikian tidak akan menyebabkan ketidakadilan kepada syarikat itu atau kepada mana-mana anggota atau pemiutang syarikat itu, atau mana-mana orang lain;
- (c) jika apa-apa perintah atau arahan sedemikian telah dibuat, boleh memberi apa-apa arahan bersampingan atau berbangkit sebagaimana yang difikirkannya sesuai; dan
- (d) boleh menentukan notis atau saman yang hendak diberi kepada orang lain mengenai niat untuk membuat apa-apa permohonan sedemikian atau niat untuk membuat apa-apa perintah atau arahan sedemikian dan sama ada ia patut diiklankan dalam mana-mana surat khabar.

(3) Bagi maksud subseksyen (2), "mesyuarat", berhubung dengan sesuatu syarikat Langkawi, termasuk—

- (a) sesuatu mesyuarat syarikat itu;
- (b) sesuatu mesyuarat mana-mana kelas anggota syarikat itu;
- (c) sesuatu mesyuarat pemegang debentur atau mana-mana kelas pemegang debentur syarikat itu;
- (d) sesuatu mesyuarat pengarah syarikat itu atau mana-mana jawatankuasa pengarah itu; dan
- (e) sesuatu mesyuarat pemiutang atau mana-mana kelas pemiutang syarikat itu.

(4) Mahkamah, sama ada syarikat itu dalam proses digulungkan atau tidak, boleh melanjutkan atau memendekkan apa-apa masa bagi melakukan apa-apa tindakan atau mengambil apa-apa prosiding yang dibenarkan atau dihadkan oleh Akta ini atau peraturan-peraturan atas apa-apa terma, jika ada, sebagaimana keadilan dalam kes itu menghendaki, dan apa-apa pelanjutan sedemikian boleh diperintahkan walaupun permohonan bagi pelanjutan itu tidak dibuat sehingga selepas masa yang pada mulanya dibenarkan atau dihadkan.

Terjemahan surat cara

112. (1) Jika di bawah Akta ini suatu syarikat Langkawi atau syarikat Langkawi asing dikehendaki menyerahkan kepada Pendaftar suatu surat cara, perakuan, kontrak atau dokumen atau suatu salinan yang diperakui mengenainya dan surat cara, perakuan, kontrak, dokumen atau salinan yang diperakui mengenainya tidak ditulis dalam bahasa kebangsaan atau bahasa Inggeris, syarikat itu hendaklah menyerahkan pada masa yang sama kepada Pendaftar suatu terjemahan yang diperakui mengenainya dalam bahasa kebangsaan atau bahasa Inggeris.

(2) Jika di bawah Akta ini suatu syarikat Langkawi atau syarikat Langkawi asing dikehendaki menyediakan bagi pemeriksaan awam apa-apa surat cara, perakuan, kontrak atau dokumen dan ia tidak ditulis dalam bahasa kebangsaan atau bahasa Inggeris, syarikat itu hendaklah menyimpan di pejabat berdaftaranya di Langkawi suatu terjemahan yang diperakui mengenainya dalam bahasa kebangsaan atau bahasa Inggeris.

(3) Jika mana-mana akaun, buku minit atau rekod lain suatu syarikat Langkawi atau syarikat Langkawi asing yang dikehendaki disimpan di bawah Akta ini tidak disimpan dalam bahasa kebangsaan atau bahasa Inggeris, pengarah syarikat itu hendaklah menyebabkan suatu terjemahan benar dalam bahasa kebangsaan atau bahasa Inggeris bagi akaun, buku minit dan rekod lain itu dibuat dari semasa ke semasa pada lat-lat tempoh yang tidak melebihi tujuh hari dan hendaklah menyebabkan terjemahan sedemikian disimpan dengan akaun, buku minit dan rekod lain yang asal selagi akaun, buku minit dan rekod lain yang asal itu dikehendaki disimpan di bawah Akta ini.

Dividen kena dibayar daripada keuntungan sahaja

113. (1) Tiada apa-apa dividen boleh kena dibayar kepada mana-mana pemegang syer mana-mana syarikat Langkawi kecuali daripada keuntungan.

(2) Tiap-tiap pengarah suatu syarikat Langkawi yang dengan sengajanya membayar atau membenarkan dibayar apa-apa dividen daripada apa-apa yang disedarinya bukan keuntungan melakukan suatu kesalahan terhadap Akta ini.

Penggunaan perkataan "Corporation", dsb.

114. Tiap-tiap orang yang menjalankan perniagaan di Langkawi di bawah apa-apa nama atau gelaran yang mengandungi perkataan atau perkataan-perkataan "Berhad", "Corporation", "Incorporated", "Limited", "Societe Anonyme", "Sociedad Anonima", "Aktiengesellschaft", "Naamloze Vennotschap", "Perseroan Terbatas" atau apa-apa perkataan atau perkataan-perkataan lain dalam bahasa kebangsaan mana-mana negara yang memberi maksud suatu syarikat saham bersama yang dihadkan melalui syer, atau apa-apa singkatan perkataan itu hendaklah, melainkan jika ia adalah suatu syarikat Langkawi, syarikat Langkawi asing yang diperbadankan atau didaftarkan dengan sewajarnya di bawah Akta ini, syarikat domestik atau badan yang diperbadankan, melakukan suatu kesalahan terhadap Akta ini.

Penalti am

115. (1) Seseorang yang —

(a) melakukan apa-apa perkara yang oleh atau di bawah Akta ini dia ditegah melakukan;

- (b) tidak melakukan apa-apa perkara yang oleh atau di bawah Akta ini dia dikehendaki atau diarah melakukan; atau
- (c) selainnya melanggar atau tidak mematuhi apa-apa peruntukan Akta ini,

melakukan suatu kesalahan terhadap Akta ini.

(2) Seseorang yang melakukan suatu kesalahan terhadap Akta ini apabila disabitkan boleh dikenakan suatu penalti yang diperuntukkan dengan nyata bagi kesalahan itu, atau jika penalti tidak diperuntukkan dengan nyata, boleh dikenakan denda yang tidak melebihi sepuluh ribu ringgit.

(3) Penalti, secara wang atau selainnya, yang dinyatakan dalam, atau di sebelah bawah, mana-mana seksyen atau bahagian suatu seksyen Akta ini, hendaklah menunjukkan bahawa kesalahan itu boleh dihukum apabila disabitkan dengan suatu penalti yang tidak melebihi penalti yang dinyatakan itu, dan jika penalti itu disebutkan dengan nyata sebagai terpakai bagi suatu bahagian seksyen itu sahaja, ia hendaklah terpakai bagi bahagian itu sahaja.

Penalti ingkar

116. (1) Jika dalam atau di sebelah bawah mana-mana seksyen atau bahagian suatu seksyen Akta ini terdapat ungkapan "Penalti ingkar", ia hendaklah menunjukkan bahawa mana-mana orang yang disabitkan atas suatu kesalahan terhadap Akta ini berhubung dengan seksyen atau bahagian seksyen itu melakukan suatu kesalahan lanjut terhadap Akta ini jika kesalahan itu berterusan selepas dia disabitkan dan boleh dikenakan suatu penalti tambahan bagi setiap hari kesalahan itu berterusan yang amaunnya tidak melebihi amaun yang dinyatakan dalam seksyen atau bahagian seksyen itu sebagai amaun penalti ingkar atau, jika suatu amaun tidak dinyatakan, yang amaunnya tidak melebihi sepuluh ribu ringgit.

(2) Jika apa-apa kesalahan dilakukan oleh seseorang oleh sebab kegagalannya untuk mematuhi mana-mana peruntukan Akta ini yang atau di bawahnya dia dikehendaki atau diarahkan melakukan apa-apa perkara dalam suatu tempoh tertentu, kesalahan itu, bagi maksud subseksyen (1), hendaklah disifatkan sebagai berterusan selagi perkara yang dikehendaki atau diarahkan dilakukan olehnya masih belum dilakukan, walaupun tempoh itu telah luput.

(3) Bagi maksud mana-mana peruntukan Akta ini yang memperuntukkan bahawa seorang pegawai sesuatu syarikat Langkawi, syarikat Langkawi asing atau syarikat penjamin yang ingkar melakukan suatu kesalahan terhadap Akta ini atau boleh dikenakan suatu penalti, ungkapan "pegawai yang ingkar" atau mana-mana ungkapan yang serupa ertinya mana-mana pegawai syarikat itu yang dengan disedarinya dan dengan sengaja—

(a) melakukan kesalahan itu; atau

(b) memberi kuasa atau membenarkan kesalahan itu dilakukan.

Pendakwaan

117. Tiada pendakwaan bagi suatu kesalahan di bawah Akta ini boleh dimulakan kecuali oleh atau dengan keizinan bertulis Pendakwa Raya.

Pengkompaunan kesalahan

118. (1) Pendaftar boleh, dengan keizinan Pendakwa Raya, mengkompaun mana-mana kesalahan yang dilakukan oleh mana-mana orang terhadap Akta ini atau peraturan-peraturan dan ditetapkan oleh Menteri sebagai suatu kesalahan yang boleh dikompaun dalam peraturan-peraturan dengan membuat suatu tawaran bertulis kepada orang yang disyaki secara munasabah telah melakukan kesalahan itu untuk mengkompaun kesalahan itu apabila dibayar kepada Pendaftar suatu amaun wang yang tidak melebihi lima puluh peratus daripada amaun denda maksimum bagi kesalahan itu dalam masa sebagaimana yang dinyatakan dalam tawaran itu.

(2) Suatu tawaran di bawah subseksyen (1) boleh dibuat pada bila-bila masa selepas kesalahan itu dilakukan tetapi sebelum apa-apa pendakwaan bagi kesalahan itu telah dimulakan, dan jika amaun yang dinyatakan dalam tawaran itu tidak dibayar dalam masa sebagaimana yang dinyatakan dalam tawaran itu, atau dalam apa-apa tempoh lanjutan sebagaimana yang diberi oleh Pendaftar, pendakwaan bagi kesalahan itu boleh dimulakan pada bila-bila masa selepas itu terhadap orang yang kepadanya tawaran itu dibuat.

(3) Jika sesuatu kesalahan telah dikompaun di bawah subseksyen (1), tiada pendakwaan boleh dimulakan berkenaan dengan kesalahan itu terhadap orang yang kepadanya tawaran untuk mengkompaun itu dibuat.

Tatacara jika tidak dinyatakan

119. Sekiranya apa-apa tindakan atau langkah dikehendaki atau dibenarkan dilakukan atau diambil di bawah Akta ini dan tiada apa-apa borang ditetapkan atau tatacara dinyatakan sama ada dalam Akta ini ataupun peraturan-peraturan, sesuatu permohonan boleh dibuat kepada Pendaftar bagi arahan tentang cara bagaimana tindakan atau langkah itu boleh dilakukan atau diambil, dan apa-apa tindakan atau langkah yang dilakukan atau diambil mengikut arahnya hendaklah menjadikan pelaksanaan yang sah bagi tindakan atau langkah itu.

Peraturan-peraturan

120. (1) Menteri boleh dari semasake semasa membuat peraturan-peraturan bagi menetapkan semua perkara dan benda yang dikehendaki atau dibenarkan di bawah Akta ini untuk ditetapkan atau diperuntukkan, atau yang perlu atau suai manfaat, bagi menjalankan atau memberikan kuat kuasa yang sepenuhnya kepada peruntukan Akta ini.

(2) Tanpa menjejaskan keluasan subseksyen (1), peraturan-peraturan boleh dibuat untuk menetapkan—

- (a) borang yang hendak digunakan bagi maksud Akta ini dan perkara yang dinyatakan dalam borang itu;
- (b) bentuk permohonan dan apa-apa notis lain di bawah Akta ini;
- (c) fi dan caj yang kena dibayar di bawah Akta ini dan penalti bagi pembayaran lewat, atau mewakilkan kuasa untuk menetapkan fi, caj dan penalti kepada orang atau badan yang ditetapkan;
- (d) cara rekod perakaunan dan rekod lain yang dikehendaki dibuat atau disimpan di bawah Akta ini perlu dibuat atau disimpan, dan pengisytiharan, laporan, lampiran, jadual atau butiran yang perlu disertakan dengan atau dilampirkan kepada rekod perakaunan atau rekod lain itu;
- (e) kesalahan yang boleh dikompaunkan dan tatacara untuk pengkompaunan kesalahan itu; dan
- (f) apa-apa perkara lain yang suai manfaat atau perlu bagi maksud Akta ini.

Larangan oleh Menteri

121. (1) Menteri boleh tanpa memberi sebab-sebab baginya, mengeluarkan, melalui pemberitahuan dalam *Warta*, arahan Menteri yang—

- (a) melarang pemerbadanan permulaan mana-mana syarikat Langkawi atau kelas syarikat;
- (b) melarang pendaftaran permulaan sesuatu syarikat Langkawi asing; atau
- (c) mengarahkan mana-mana syarikat Langkawi supaya terhenti menjalankan perniagaannya atau sebahagian daripada perniagaannya sama ada dengan serta-merta atau dalam masa sebagaimana yang dinyatakan dalam arahan itu.

(2) Suatu arahan yang dibuat di bawah seksyen ini boleh dibatalkan atau diubah oleh Menteri.

Kerahsiaan

122. (1) Semua prosiding (selain prosiding jenayah) yang berhubungan dengan mana-mana syarikat Langkawi atau syarikat Langkawi asing yang dimulakan di dalam mana-mana Mahkamah, sama ada di bawah peruntukan Akta ini atau semata-mata bagi maksud menentukan hak atau obligasi pegawai, anggota atau pemegang debentur, dan apa-apa rayuan ke atas prosiding itu, hendaklah, melainkan jika Mahkamah memerintahkan sebaliknya, didengar *in camera* dan tiada apa-apa butiran mengenai prosiding itu boleh disiarkan oleh mana-mana orang tanpa kebenaran Mahkamah.

(2) Jika-

- (a) dalam apa-apa prosiding bagi penggulungan suatu syarikat Langkawi Mahkamah berpuas hati bahawa syarikat itu atau mana-mana pegawai syarikat itu tidak mematuhi apa-apa peruntukan Akta ini; atau
- (b) suatu syarikat Langkawi atau mana-mana pegawai syarikat itu telah disabitkan oleh Mahkamah atas apa-apa kesalahan di bawah Akta ini,

Mahkamah boleh, jika difikirkannya sesuai, memerintahkan supaya rekod, buku dan daftar syarikat itu dan catatan dalam daftar dan rekod Pendaftar yang berhubungan dengan syarikat itu dibuka kepada awam untuk pemeriksaan.

(3) Seseorang yang, berkenaan dengan mana-mana syarikat Langkawi, selain bagi maksud pentadbiran Akta ini atau menjalankan perniagaan syarikat itu di Langkawi atau di tempat lain —

- (a) mendedahkan;
- (b) mencuba, menawarkan atau mengancam untuk mendedahkan; atau
- (c) mendorong atau cuba mendorong orang lain untuk mendedahkan,

apa-apa maklumat yang berkaitan dengan atau menyentuh —

- (i) pemegangan syer dalam, atau pemunyaan benefisial, apa-apa syer atau syer-syer syarikat itu;
- (ii) pengurusan syarikat itu; dan
- (iii) apa-apa hal ehwal atau transaksi perniagaan, kewangan atau lain syarikat itu,

melakukan suatu kesalahan terhadap Akta ini.

(4) Tiada apa-apa jua pun dalam seksyen ini boleh menghalang mana-mana Mahkamah daripada menjalankan budi bicaranya untuk menghendaki mana-mana orang untuk mengemukakan apa-apa dokumen atau memberikan apa-apa keterangan dalam apa-apa prosiding di hadapan Mahkamah itu yang berkaitan dengan prosiding itu.

Kuasa pengecualian

123. Menteri boleh, atas syor Pendaftar, apabila sesuatu permohonan secara bertulis dibuat, mengecualikan mana-mana syarikat Langkawi atau syarikat Langkawi asing, atau mana-mana orang atau kelas orang, atau kelas syarikat Langkawi atau syarikat Langkawi asing daripada mana-mana peruntukan Akta ini dan boleh, dalam memberikan pengecualian itu, mengenakan apa-apa terma dan syarat sebagaimana yang difikirkan sesuai oleh Menteri.

Fi, penalti dan pembatalan

124. (1) Sesuatu syarikat Langkawi hendaklah membayar kepada Pendaftar fi tahunan yang genap masa pada tarikh pembayaran fi tahunan itu.

(2) Jika suatu syarikat Langkawi tidak membayar fi tahunan yang dirujuk dalam subseksyen (1) pada atau sebelum tamatnya tempoh enam bulan dari tarikh pembayaran fi tahunan itu, maka hendaklah kena dibayar sebagai tambahan kepada fi tahunan itu suatu amaun yang bersamaan dengan lima puluh peratus daripada fi tahunan.

(3) Jika suatu syarikat Langkawi tidak membayar fi tahunan dan amaun tambahan yang dinyatakan dalam subseksyen (2) pada atau sebelum tamatnya tempoh satu bulan dari tarikh tamatnya tempoh enam bulan yang dinyatakan dalam subseksyen (2), Pendaftar boleh selepas tamatnya tempoh satu bulan itu menghantar kepada setiausaha syarikat Langkawi itu suatu notis bertulis bahawa nama syarikat Langkawi itu hendaklah dibatalkan daripada daftar jika fi tahunan dan amaun yang dinyatakan dalam subseksyen (2) tidak dibayar dalam masa satu bulan dari tarikh notis itu atau apa-apa tempoh lanjutan sebagaimana yang dibenarkan oleh Pendaftar.

(4) Jika syarikat Langkawi itu tidak membayar fi tahunan dan amaun tambahan yang dinyatakan dalam subseksyen (2) dalam tempoh satu bulan dari tarikh notis itu atau tempoh lanjutan sebagaimana yang dibenarkan oleh Pendaftar di bawah subseksyen (3), Pendaftar boleh membatalkan nama syarikat Langkawi itu daripada daftar.

(5) Walaupun nama syarikat Langkawi itu telah dibatalkan daripada daftar di bawah seksyen ini, syarikat Langkawi itu tetap bertanggungjawab terhadap semua tuntutan, hutang, liabiliti dan obligasi syarikat Langkawi itu, dan pembatalan itu tidak menjejaskan liabiliti mana-mana anggota, pengarah, pegawai atau ejen di bawah Akta ini atau mana-mana undang-undang lain.

(6) Pembatalan nama suatu syarikat Langkawi daripada daftar di bawah seksyen ini tidak dijejaskan oleh apa-apa kegagalan di pihak Pendaftar untuk menyampaikan suatu notis kepada setiausaha atau untuk menyiarkan suatu notis dalam *Warta*.

(7) Subseksyen (2) hingga (5) tidak terpakai bagi suatu syarikat Langkawi yang sedang dalam proses penggulungan dan pembubaran.

Syarikat yang dibatalkan bertanggung untuk fi, dsb.

125. Sesuatu syarikat Langkawi yang diperbadankan di bawah Akta ini akan terus bertanggung untuk semua fi, termasuk fi tahunan dan penalti yang kena bayar di bawah Akta ini, termasuk amaun tambahan sebagaimana yang dinyatakan dalam subseksyen 124(2), walaupun nama syarikat Langkawi itu telah dibatalkan daripada daftar; dan fi sedemikian, termasuk fi tahunan dan penalti, hendaklah diberi keutamaan daripada semua tuntutan lain terhadap aset syarikat Langkawi itu.

Fi yang kena dibayar kepada Pendaftar

126. Pendaftar boleh enggan mengambil apa-apa tindakan yang dikehendaki olehnya di bawah Akta ini yang mana suatu fi ditetapkan sehingga semua fi telah pun dibayar.

Kesan pembatalan

127. (1) Jika nama suatu syarikat Langkawi telah dibatalkan daripada daftar, syarikat Langkawi itu, dan pengarah, anggota, pelikuidasi dan penerima syarikat itu, tidak boleh—

- (a) memulakan apa-apa presiding undang-undang, menjalankan apa-apa perniagaan atau dalam apa-apa cara berurusan dengan aset syarikat Langkawi itu;
- (b) membela apa-apa prosiding undang-undang, membuat apa-apa tuntutan atau menuntut apa-apa hak untuk, atau atas nama, syarikat Langkawi itu; atau
- (c) bertindak dengan apa-apa cara berkenaan dengan hal ehwal syarikat Langkawi itu.

(2) Walau apa pun subseksyen (1) Jika nama syarikat Langkawi itu telah dibatalkan daripada daftar, syarikat Langkawi itu, atau seorang pengarah, anggota, pelikuidasi atau penerima syarikat itu, boleh—

- (a) memohon kepada Pendaftar supaya syarikat Langkawi itu didaftarkan semula;
- (b) terus membela prosiding yang telah dimulakan terhadap syarikat Langkawi itu sebelum tarikh pembatalan itu; dan

(c) terus menjalankan presiding undang-undang yang telah dimulakan bagi pihak syarikat Langkawi itu sebelum tarikh pembatalan.

(3) Hakikat bahawa nama syarikat Langkawi itu telah dibatalkan daripada daftar tidak menghalang —

- (a) syarikat Langkawi itu daripada menanggung liabiliti;
- (b) mana-mana pemiutang daripada membuat suatu tuntutan terhadap syarikat Langkawi itu dan meneruskan tuntutannya sehingga penghakiman atau pelaksanaan; atau
- (c) pelantikan oleh Mahkamah seorang pelikuidasi rasmi untuk syarikat Langkawi itu di bawah Bahagian VIII dan X Akta Syarikat 1965, setakat yang ia berhubung dengan suatu syarikat Langkawi yang dihadkan melalui syer.

JADUAL

[Seksyen 25]

KUASA SYARIKAT LANGKAWI

1. Untuk menjalankan apa-apa perniagaan, selain suatu perniagaan yang dilarang oleh Akta ini atau peraturan-peraturan daripada dijalankan, yang pada pandangan syarikat itu boleh dengan mudahnya dijalankan atau yang dikira boleh, secara langsung atau tidak langsung, menambahkan nilai atau menjadikan beruntung apa-apa harta atau hak syarikat itu
2. Untuk membuat atau menjadi suatu pihak kepada apa-apa transaksi atau dokumen
3. Untuk memperoleh, memegang, melupuskan atau berurusan dengan apa-apa maklumat atau apa-apa jenis hak atau harta
4. Untuk memperoleh, memegang, melupuskan atau berurusan dengan keseluruhan atau mana-mana bahagian pengusahaan mana-mana syarikat, persatuan atau perniagaan lain
5. Untuk melupuskan atau selainnya berurusan dengan keseluruhan atau mana-mana bahagian pengusahaan atau perniagaannya
6. Untuk mengambil alih apa-apa kewajipan, obligasi atau liabiliti
7. Untuk memperoleh apa-apa hak atau kepentingan

8. Untuk menyediakan atau memperoleh penyediaan apa-apa perkhidmatan
9. Untuk member! pinjaman dan meminjam
10. Untuk memperoleh pendaftaran atau pengiktirafannya di mana-mana tempat di luar Langkawi
11. Untuk mewujudkan dan menghapuskan liabiliti dan hak dan kepentingan
12. Untuk menerbitkan syer dan debentur, dan untuk mengambil syer dan debentur dan untuk menebus dan melucuthakkan syer dan debentur itu
13. Untuk mengambil kerja atau mengekalkan orang dalam dan berkenaan dengan perniagaan syarikat itu atau perniagaan mana-mana syarikat atau orang lain
14. Untuk menanggung rugi dan menjamin dan untuk mendapatkan tanggung rugi dan jaminan
15. Untuk mengambil semua jenis insurans sama ada ke atas harta atau hak syarikat itu atau tidak
16. Untuk menaja mana-mana syarikat lain
17. Untuk memberikan hadiah, derma dan upah yang boleh dibuat dengan sah di sisi undang-undang, sama ada hadiah, derma atau upah itu adalah bagi maksud memajukan perniagaan syarikat itu atau pun tidak
18. Dengan carapenyelesaian atau urusan atau pelupusan lain, untuk memberikan hak kepada seseorang yang bukan seorang anggota syarikat itu untuk berkongsi dalam keseluruhan.atau apa-apa bahagian perolehan atau keuntungan syarikat itu dengan mengetepikan anggota syarikat itu, dengan syarat bahawa dalam menjalankan kuasa sedemikian tiada pembahagian apa-apa perolehan atau keuntungan itu boleh dibuat menurut penyelesaian, pelupusan atau urusan lain itu yang boleh melebihi amaun yang sewajarnya boleh dibahagikan sebagai dividen atau yang sepatutnya boleh dipulangkan sebagai lebih modal kepada beberapa atau semua anggota syarikat itu
19. Untuk membuat apa-apa benda yang syarikat itu boleh membuat secara bersekutu dengan mana-mana orang lain dan sebagai prinsipal atau ejen atau sebagai pemegang amanah atau bagi faedah syarikat itu sendiri
20. Untuk menaja apa-apa perniagaan lain
21. Untuk membuat segala perkara benda yang bersampingan dengan atau berfaedah bagi perjalanan kuasa syarikat itu
22. Untuk membuat semua benda lain yang tidak dilarang oleh atau di bawah Akta ini atau peraturan-peraturan.

HURAIAN

Akta Syarikat Kapal Layar Antarabangsa Langkawi 2005 ("Akta ini") yang dicadangkan dalam Rang Undang-Undang ini mengadakan peruntukan mengenai pemerdanaan, pendaftaran dan pentadbiran syarikat kapal layar antarabangsa di Langkawi dan mengenai perkara-perkara yang berkaitan dengannya.

BAHAGIAN I

2. Bahagian I bertujuan mengadakan peruntukan bagi perkara permulaan.
3. *Fasal 1* mengandungi tajuk ringkas dan membenarkan Menteri menetapkan tarikh mula berkuat kuasanya Akta yang dicadangkan.
4. *Fasal 2* mengandungi takrif ungkapan tertentu yang digunakan dalam Akta ini.
5. *Fasal 3* dan *4* memperuntukkan mengenai tafsiran bagi terma "subsidiari", "syarikat pemegangan" dan "syarikat berkaitan" berkenaan dengan perbadanan.
6. *Fasal 5* memperuntukkan bagi ketidakpakaian Akta Syarikat 1965 kepada sesuatu syarikat Langkawi atau syarikat Langkawi asing melainkan jika diadakan peruntukan yang bertentangan secara nyata dalam Akta ini.
7. *Fasal 6* menyatakan jenis perniagaan yang boleh dijalankan oleh sesuatu syarikat Langkawi, tetapi syarikat itu tidak boleh menjalankan apa-apa perniagaan dengan seorang pemastautin Malaysia kecuali dalam hal keadaan yang tertentu sebagaimana yang dinyatakan dalam *fasal* itu.

BAHAGIAN II

8. Bahagian II bertujuan mengadakan peruntukan bagi perkara yang berhubungan dengan pentadbiran Akta.
9. *Fasal 7* memperuntukkan bahawa Pendaftar hendaklah bertanggungjawab untuk pentadbiran Akta ini dan juga mengadakan peruntukan mengenai pengiktirafan kehakiman terhadap meterai dan tandatangan Pendaftar.
10. *Fasal 8, 9, 10* dan *11* mengadakan peruntukan mengenai kuasa Pendaftar untuk memperoleh maklumat, menjalankan pemeriksaan atau penyiasatan dan memeriksa orang berhubung dengan suatu penyiasatan.
11. *Fasal 12* memperuntukkan bahawa penyerahan dokumen dengan Pendaftar, atau sesuatu permohonan untuk apa-apa perakuan atau dokumen, atau apa-apa cabutan atau salinan perakuan atau dokumen sedemikian daripada Pendaftar hendaklah dibuat melalui sesuatu entiti pengurusan, kecuali jika permohonan itu dibuat oleh seseorang anggota syarikat Langkawi atau syarikat Langkawi asing untuk kegunaannya sendiri.
12. *Fasal 13* menyatakan tatacara bagi penyerahan atau pemfailan dokumen dengan Pendaftar melalui cara elektronik.

13. *Fasal 14* memperkatakan nilai keterangan dokumen yang diserahkan atau difailkan secara elektronik dengan Pendaftar.
14. *Fasal 15* memperuntukkan bahawa salinan asal dokumen yang telah diserahkan atau difailkan secara elektronik dengan Pendaftar oleh sesuatu entiti pengurusan hendaklah disimpan di pejabat entiti pengurusan itu.
15. *Fasal 16* member! kuasa kepada Pendaftar untuk meluluskan seseorang sebagai seorang juruaudit yang diluluskan bagi sesuatu syarikat Langkawi, dan untuk membatalkan kelulusan itu.
16. *Fasal 17* menyatakan hal keadaan yang seseorang tidak boleh dengan disedarinya bersetuju untuk dilantik atau dengan disedarinya bertindak sebagai seorang juruaudit suatu syarikat Langkawi.
17. *Fasal 18* member! kuasa kepada Pendaftar untuk meluluskan seseorang sebagai seorang pelikuidasi yang diluluskan bagi sesuatu syarikat Langkawi, dan untuk membatalkan kelulusan itu.
18. *Fasal 19* mengadakan peruntukan bagi Pendaftar menyimpan daftar dan membenarkan orang yang berkepentingan untuk memeriksa daftar itu. *Subfasal (4)* memperkatakan nilai keterangan perkara yang dinyatakan dalam sesuatu perakuan yang dikeluarkan di bawah tandatangan dan meterai Pendaftar. *Subfasal (5)* menyatakan hal keadaan yang Pendaftar boleh enggan mendaftarkan suatu dokumen. *Subfasal (7)* memperuntukkan bahawa seorang boleh merayu kepada Menteri terhadap apa-apa tindakan atau keputusan Pendaftar, termasuk keengganannya untuk mendaftarkan sesuatu syarikat Langkawi atau syarikat Langkawi asing. *Subfasal (9)* menyatakan cara Pendaftar boleh menguruskan rekod lama suatu syarikat Langkawi atau syarikat Langkawi asing.

BAHAGIAN III

19. Bahagian III mengandungi peruntukan yang berhubungan dengan pembentukan syarikat. Bahagian ini dibahagikan kepada dua penggal, iaitu Penggal 1 dan Penggal 2.
20. Penggal 1 mengadakan peruntukan mengenai pemerbadanan syarikat Langkawi.
21. *Fasal 20* dan *21* menyatakan tentang tatacara bagi pemerbadanan syarikat Langkawi, yang adalah syarikat yang terhad melalui syer. *Fasal* ini juga mengadakan peruntukan untuk pengeluaran perakuan pemerbadanan oleh Pendaftar apabila syarikat itu diperbadankan.
22. *Fasal 22* menyatakan tatacara untuk membolehkan pendaftaran suatu syarikat asing yang diperbadankan di bawah undang-undang mana-mana negara, selain Malaysia, untuk diteruskan di Langkawi, dan apabila syarikat asing itu didaftarkan syarikat asing itu hendaklah disifatkan sebagai suatu syarikat Langkawi yang didomisikan di Langkawi tanpa menjejaskan keterusan syarikat itu. *Fasal 23* memperuntukkan bahawa sebelum sesuatu syarikat asing mengemukakan permohonannya untuk pendaftaran di bawah *fasal 22*, syarikat asing itu boleh meminta supaya pendaftaran sedemikian diluluskan secara prinsip oleh Pendaftar.

23. *Fasal 24* mengandungi peruntukan yang berhubungan dengan memorandum sesuatu syarikat Langkawi.
24. *Penggal 2* memperuntukkan berkenaan dengan status dan nama sesuatu syarikat Langkawi.
25. *Fasal 25* bertujuan untuk menyatakan kuasa sesuatu syarikat Langkawi.
26. *Fasal 26* bertujuan untuk mengadakan peruntukan berkenaan dengan kesan apa-apa tindakan atau tindakan yang berupa, atau apa-apa pemindahan atau pemindahan hakmilik yang dijalankan atau disempurnakan oleh sesuatu syarikat Langkawi yang tidak mempunyai sifat atau kuasa untuk menjalankan atau menyempurnakan tindakan atau tindakan yang berupa itu, atau pemindahan atau pemindahan hakmilik itu.
27. *Fasal 27* menyatakan peruntukan berkenaan dengan nama syarikat Langkawi yang didaftarkan di bawah Akta ini.
28. *Fasal 28* bertujuan untuk membenarkan suatu syarikat Langkawi untuk menukarkan namanya melalui ketetapan khas atau jika diarahkan sedemikian oleh Pendaftar, dan mengadakan peruntukan mengenai kesan pertukaran nama itu.
29. *Fasal 29* menyatakan perkara mengenai kandungan perkara persatuan syarikat Langkawi.
30. *Fasal 30* bertujuan untuk membenarkan suatu syarikat Langkawi melalui ketetapan khas untuk mengubah atau menambahkan perkara persatuan atau memorandumnya.
31. *Fasal 31* memperuntukkan bahawa seseorang anggota boleh meminta untuk suatu salinan memorandum dan perkara persatuan syarikat itu.
32. *Fasal 32* menyatakan cara untuk membuat kontrak bagi pihak sesuatu syarikat Langkawi dan penubuhan sesuatu cawangan syarikat Langkawi.
33. *Fasal 33* melarang pegawai, pekhidmat, pekerja atau ejen suatu syarikat Langkawi menjalankan perniagaan apabila syarikat itu tidak ada anggota untuk tempoh lebih daripada enam bulan, melainkan jika di bawah arahan Mahkamah atau seorang pelikuidasi yang diluluskan.

BAHAGIAN IV

34. Bahagian IV mengandungi peruntukan yang berhubungan dengan terbitan syer dan daftar gadaian. Bahagian ini dibahagikan kepada tiga penggal, iaitu Penggal 1, Penggal 2 dan Penggal 3.
35. Penggal 1 menyatakan tentang perkara yang berhubungan dengan pengumpulan dan berurusan dalam syer suatu syarikat Langkawi.
36. *Fasal 34* menghendaki suatu syarikat Langkawi yang membuat suatu pengumpulan syernya untuk membuat suatu penyata mengenai pengumpulan itu, dan Pendaftar boleh sebagaimana dalam hal keadaan yang disifatkan perlu

menghendaki syarikat itu untuk menyerahkan kepada Pendaftar suatu penyata berkenaan dengan mana-mana pengumpulan syernya.

37. *Fasal 35* menyatakan tentang cara sesuatu syarikat Langkawi boleh membuat panggilan ke atas syernya.

38. *Fasal 36* memberi kuasa kepada sesuatu syarikat Langkawi untuk menentukan, melalui ketetapan khas, bahawa bahagian tertentu modal syernya tidak boleh dipanggil kecuali dalam perkara penggulungan syarikat itu.

39. *Fasal 37* menghendaki premium yang diterima oleh suatu syarikat Langkawi atas terbitan syer dipindahkan kepada suatu akaun premium syer, dan mengenakan batasan tertentu ke atas pemakaian akaun itu.

40. *Fasal 38* memberi kuasa kepada suatu syarikat Langkawi untuk menerbitkan syer, yang boleh dibahagikan kepada satu kelas syer atau lebih, dan nilai syer itu hendaklah dinyatakan hanya dalam mata wang asing.

41. *Fasal 39* membenarkan suatu syarikat Langkawi berurusan dalam syernya sendiri dalam hal keadaan yang tertentu, termasuklah perolehan dan pelupusan syer itu.

42. *Fasal 40* memberi kuasa kepada suatu syarikat Langkawi untuk mengenselkan semua atau mana-mana bahagian syer yang diperoleh semula olehnya, selain syer yang boleh ditebus yang telah ditebuskan atau dibeli.

43. *Fasal 41* membenarkan suatu syarikat Langkawi untuk menerbitkan dengan diskaun syer daripada suatu kelas yang telah diterbitkan dengan terlebih dahulu mendapatkan kelulusan bertulis daripada Pendaftar.

44. *Fasal 42* memperuntukkan bahawa suatu syarikat Langkawi boleh melalui ketetapan khas mengubah modal syernya.

45. *Fasal 43* memberi kuasa kepada Mahkamah untuk mengesahkan apa-apa syer yang diterbitkan dengan tidak sewajarnya oleh suatu syarikat Langkawi tertakluk kepada apa-apa syarat sebagaimana yang difikirkannya patut dikenakan.

46. *Fasal 44* membenarkan suatu syarikat Langkawi untuk mengurangkan modal syernya melalui ketetapan khas tertakluk kepada pengurangan itu disahkan oleh Mahkamah.

47. *Fasal 45* bertujuan untuk melindungi hak pemegang syer keutamaan dengan menghendaki hak itu dinyatakan dalam perkara persatuan sebelum pengumpulan syer sedemikian.

48. *Fasal 46* membenarkan suatu syarikat Langkawi untuk menerbitkan syer keutamaan boleh tebus jika dibenarkan sedemikian oleh perkara persatuannya.

49. *Fasal 47* menghadkan suatu syarikat Langkawi daripada membuat apa-apa tawaran atau mengeluarkan apa-apa pelawaan kepada awam untuk melanggan atau membeli syer atau kepentingannya melainkan jika tawaran atau pelawaan sedemikian berhubung dengan syer atau kepentingan yang memberi hak kepada pemegang syer dan kepentingannya hak untuk menggunakan apa-apa kemudahan atau aktiviti percutian atau rekreasi yang berhubung dengan kapal layar.

50. Penggal 2 berhubung dengan perkara yang berkaitan dengan hakmilik dan pemindahan syer dan kepentingan suatu syarikat Langkawi.
51. *Fasal 48* menyatakan mengenai jenis syer atau kepentingan mana-mana anggota suatu syarikat Langkawi.
52. *Fasal 49* menghendaki setiap syer suatu syarikat Langkawi untuk mempunyai suatu nombor yang tersendiri yang melaluinya ia boleh dibezakan, tetapi penomboran sedemikian tidak diperlukan dalam hal keadaan tertentu sebagaimana yang dinyatakan dalam *fasal* itu.
53. *Fasal 50* memperkatakan nilai keterangan suatu perakuan syer dan kandungan perakuan syer yang dikeluarkan oleh suatu syarikat Langkawi.
54. *Fasal 51* membenarkan suatu syarikat Langkawi untuk mempunyai suatu meterai syer bagi maksud perakuan syernya.
55. *Fasal 52* mengadakan peruntukan berkenaan dengan pendaftaran pemindahan hakmilik syer atau debentur oleh suatu syarikat Langkawi, dan juga membenarkan pemindahan hakmilik syer atau debentur oleh wakil diri bagi orang yang mati.
56. *Fasal 53* menghendaki suatu syarikat Langkawi mengeluarkan perakuan syer dan debentur dalam tempoh dua bulan selepas pengumpulan syer dan debentur itu, dan untuk menyelesaikan apa-apa pemindahan hakmilik syer atau debentur dalam tempoh satu bulan selepas hakmilik itu diserahkan kepada syarikat itu.
57. Penggal 3 mengandungi peruntukan yang berhubung dengan daftar gadaian.
58. *Fasal 54* memperuntukkan mengenai ketidakpakaian Penggal ini kepada suatu gadaian yang diwujudkan oleh suatu syarikat Langkawi atau syarikat Langkawi asing ke atas harta yang terletak di luar Malaysia.
59. *Fasal 55* menghendaki suatu syarikat Langkawi atau syarikat Langkawi asing untuk menyenggarakan sesuatu daftar gadaian, dan untuk menyimpan sesuatu salinan tiap-tiap surat cara yang mewujudkan suatu gadaian di pejabat berdaftaranya.

BAHAGIAN V

60. Bahagian V mengandungi peruntukan yang berhubung dengan pengurusan dan pentadbiran sesuatu syarikat Langkawi dan dibahagikan kepada lima penggal, iaitu Penggal 1, Penggal 2, Penggal 3, Penggal 4 dan Penggal 5.
61. Penggal 1 adalah berhubung dengan pejabat berdaftar dan nama sesuatu syarikat Langkawi.
62. *Fasal 56* menghendaki tiap-tiap syarikat Langkawi mempunyai suatu pejabat berdaftar di Langkawi, yang pejabat itu adalah pejabat utama suatu entiti pengurusan.

63. *Fasal 57* mengandungi peruntukan yang menghendaki supaya dipamerkan nama sesuatu syarikat Langkawi di tiap-tiap pejabatnya, dan pada meterai, surat cara yang boleh niaga dan dokumen lain.
64. Penggal 2 adalah berhubung dengan pelantikan dan kewajipan pengarah dan pegawai suatu syarikat Langkawi.
65. *Fasal 58* memperuntukkan bahawa tiap-tiap syarikat Langkawi hendaklah mempunyai sekurang-kurangnya seorang pengarah, yang mana seorang pengarah boleh menjadi suatu perbadanan yang boleh bertindak dengan sendirinya atau melalui seorang penama yang dilantik secara bertulis.
66. *Fasal 59* memperuntukkan bahawa seseorang boleh dilantik atau dinamakan sebagai seorang pengarah suatu syarikat Langkawi hanya jika persetujuan bertulisnya telah diserahkan kepada Pendaftar.
67. *Fasal 60* memperuntukkan bahawa apa-apa kecacatan dalam pelantikan atau kelayakan seseorang pengarah suatu syarikat Langkawi tidak boleh menjadikan tidak sah apa-apa tindakan pengarah itu.
68. *Fasal 61* memberi kuasa kepada Pendaftar untuk menghalang orang tertentu daripada menguruskan syarikat Langkawi.
69. *Fasal 62* menghendaki seorang pengarah menzahirkan kepentingannya dalam apa-apa kontrak atau kontrak yang dicadangkan dengan syarikat Langkawi yang dia ialah seorang pengarah.
70. *Fasal 63* mengenakan suatu kewajipan ke atas tiap-tiap pegawai suatu syarikat Langkawi untuk bertindak secara jujur dan bersungguh-sungguh dan meiarangnya daripada menggunakan secara tidak patut apa-apa maklumat yang diperolehnya disebabkan oleh jawatannya untuk mendapatkan kebaikan bagi dirinya atau orang lain.
71. *Fasal 64* memperuntukkan bahawa tiap-tiap syarikat Langkawi hendaklah mempunyai seorang setiausaha atau lebih, yang sekurang-kurangnya seorang. daripadanya adalah suatu entiti pengurusan dan yang juga adalah setiausaha pemastautin.
72. *Fasal 65* menghendaki suatu syarikat Langkawi menyimpan di pejabat berdaftaranya sesuatu daftar pengarah dan pegawainya yang hendaklah mengandungi butir seperti nama penuh dan alamat kediaman biasa pengarah atau pegawai itu.
73. *Fasal 66* mengandungi peruntukan yang berhubung dengan suatu kesalahan yang dilakukan terhadap mana-mana peruntukan Akta oleh suatu entiti pengurusan yang bertindak sebagai seorang pengarah atau setiausaha pemastautin suatu syarikat Langkawi.
74. Penggal 3 menyatakan tentang perkara yang berkenaan dengan mesyuarat anggota suatu syarikat Langkawi dan prosidingnya.

75. *Fasal 67* memberi kuasa kepada pengarah suatu syarikat Langkawi untuk memanggil suatu mesyuarat anggota apabila dan bila perlu, dan juga memperuntukkan untuk seorang anggota mesyuarat itu diwakili melalui proksi atau untuk mengambil bahagian dalam suatu mesyuarat anggota melalui telefon dan cara elektronik yang lain.
76. *Fasal 68* menghendaki sekurang-kurangnya tujuh hari notis diberikan berkenaan dengan suatu mesyuarat anggota, tetapi suatu notis yang lebih singkat boleh dipersetujui oleh anggota yang memegang majoriti sebanyak sembilan puluh peratus atau majoriti yang lebih rendah sebagaimana yang dinyatakan dalam perkara persatuan atau memorandum.
77. *Fasal 69* memperkatakan perkara yang berkaitan dengan kuorum dan pengundian dalam suatu mesyuarat anggota.
78. *Fasal 70* memperuntukkan bahawa setiap syer mempunyai satu undi, kecuali diperuntukkan selainnya dalam memorandum dan perkara persatuan suatu syarikat Langkawi, dan *fasal 71* memperuntukkan bahawa apa-apa tindakan yang boleh diambil oleh anggota dalam mesyuarat anggota boleh juga diambil melalui suatu resolusi semua anggota yang dipersetujui secara bertulis atau melalui teleks, telegram, telefaks kabel atau apa-apa cara perhubungan elektronik bertulis yang lain.
79. *Fasal 72* memberi kuasa kepada Mahkamah untuk mengarahkan supaya dipanggil suatu mesyuarat anggota jika ia tidak praktik untuk syarikat Langkawi itu memanggil suatu mesyuarat mengikut cara yang mesyuarat dikehendaki supaya dipanggil atau untuk menjaiankan suatu mesyuarat mengikut cara yang ditetapkan dalam perkara persatuan atau Akta.
80. *Fasal 73* mengandungi peruntukan berkaitan dengan ketetapan khas dalam suatu mesyuarat anggota.
81. *Fasal 74* mengadakan peruntukan bagi penyerahan salinan ketetapan dan perjanjian sebagaimana yang dinyatakan dalam *fasal* ini dengan Pendaftar.
82. *Fasal 75* menghendaki suatu syarikat Langkawi untuk menyimpan dan menyenggara di pejabat berdaftarnya minit semua prosiding mesyuarat anggota dan pengarah.
83. Penggal 4 memperuntukkan mengenai daftar anggota.
84. *Fasal 76* menghendaki suatu syarikat Langkawi untuk menyimpan dan menyenggara suatu daftar anggota.
85. *Fasal 77* memperuntukkan bahawa daftar anggota hendaklah disimpan di pejabat berdaftar syarikat Langkawi dan terbuka untuk pemeriksaan tanpa apa-apa caj oleh mana-mana anggota sahaja.
86. *Fasal 78* menyatakan akibat keingkaran untuk mematuhi/asa/ 77 dan apa-apa kehendak yang lain Akta ini mengenai pengemukaan daftar.

87. *Fasal 79* memberi kuasa kepada Mahkamah untuk membetulkan daftar berkenaan dengan catatan dalam daftar itu.
88. Penggal 5 mengandungi peruntukan yang berkaitan dengan penyata suatu syarikat Langkawi.
89. *Fasal 80* memperuntukkan bahawa Pendaftar boleh sebagaimana dalam hal keadaan yang disifatkan perlu menghendaki suatu syarikat Langkawi untuk menyerahkan kepada Pendaftar suatu penyata berkenaan dengan syarikat itu bagi suatu tahun kalendar tertentu.

BAHAGIAN VI

90. Bahagian VI bertujuan untuk memperuntukkan berkenaan dengan akaun dan audit suatu syarikat Langkawi dan mempunyai dua penggal, iaitu Penggal 1 dan Penggal 2.
91. Penggal 1 adalah berhubung dengan akaun suatu syarikat Langkawi.
92. *Fasal 81* menghendaki suatu syarikat Langkawi menyimpan rekod perakaunan dan rekod lain yang sesuai yang hendaklah terbuka untuk pemeriksaan oleh pengarah syarikat itu dan mana-mana juruaudit yang diluluskan yang bertindak bagi seorang pengarah.
93. *Fasal 82* memperuntukkan bahawa pengarah suatu syarikat Langkawi boleh menyebabkan dibentangkan dalam suatu mesyuarat anggota akaun diaudit dan akaun tidak diaudit syarikat itu.
94. *Fasal 83* menghendaki suatu salinan tiap-tiap akaun diaudit atau akaun tidak diaudit yang akan dibentangkan dalam suatu mesyuarat anggota untuk diedarkan kepada semua anggota syarikat itu sekurang-kurangnya tujuh hari sebelum suatu mesyuarat anggota.
95. Penggal 2 adalah berhubung dengan pengauditan akaun suatu syarikat Langkawi.
96. *Fasal 84* memperuntukkan mengenai pelantikan seorang juruaudit bagi suatu syarikat Langkawi.
97. *Fasal 85* memperuntukkan mengenai hal keadaan yang mana pelantikan seorang juruaudit bagi suatu syarikat Langkawi tidak diperlukan.
98. *Fasal 86* mengandungi peruntukan berkenaan dengan pemberhentian atau peletakan jawatan juruaudit suatu syarikat Langkawi.
99. *Fasal 87* memperuntukkan bahawa fi dan perbelanjaan juruaudit suatu syarikat Langkawi boleh ditetapkan oleh pengarah syarikat.
100. *Fasal 88* membenarkan seorang juruaudit suatu syarikat Langkawi menghadiri dan berucap dalam semua mesyuarat anggota syarikat itu.

101. *Fasal 89* menghendaki seorang juruaudit membuat suatu laporan mengenai akaun syarikat itu kepada anggota syarikat itu.

BAHAGIAN VII

102. Bahagian VII bertujuan untuk mengadakan peruntukan berkenaan dengan perkiraan dan pembentukan semula suatu syarikat Langkawi.

103. *Fasal 90* memperuntukkan bagi tafsiran istilah "perkiraan" dan menyatakan tatacara untuk membuat perkiraan, termasuk kelulusan suatu pelan perkiraan oleh pengarah syarikat itu.

104. *Fasal 91* memberi kuasa kepada Menteri untuk membuat peraturan-peraturan berkenaan dengan pengawasan dan pengawalan transaksi pengambilalihan dan percantuman.

BAHAGIAN VIII

105. Bahagian VIII bertujuan untuk memperuntukkan bagi perkara yang berhubungan dengan syarikat Langkawi asing.

106. *Fasal 92* memperuntukkan bagi pemakaian Bahagian ini kepada syarikat asing yang mempunyai suatu tempat perniagaan atau yang menjalankan perniagaan di Langkawi dan tidak didaftarkan di bawah Akta Syarikat 1965. *Fasal* ini juga menyatakan tafsiran bagi istilah "menjalankan perniagaan di Langkawi".

107. *Fasal 93* menyatakan peruntukan berkenaan dengan pendaftaran suatu syarikat asing yang bercadang untuk mempunyai suatu tempat perniagaan atau menjalankan perniagaan di Langkawi.

108. *Fasal 94* melarang suatu syarikat Langkawi asing daripada menjalankan apa-apa perniagaan di Langkawi yang syarikat Langkawi dilarang daripada menjalankannya.

109. *Fasal 95* menghendaki tiap-tiap syarikat Langkawi asing untuk mempunyai suatu pejabat berdaftar di Langkawi, yang pejabat itu ialah pejabat utama suatu entiti pengurusan.

110. *Fasal 96* menghendaki suatu syarikat Langkawi asing menyerahkan kepada Pendaftar butir mengenai apa-apa pindaan atau perubahan yang melibatkan syarikat itu, termasuk memorandum dan perkara persatuan syarikat itu atau pengarah syarikat itu.

111. *Fasal 97* menyatakan peruntukan yang berkenaan dengan penyampaian apa-apa proses atau dokumen ke atas suatu syarikat Langkawi asing.

112. *Fasal 98* menghendaki suatu syarikat Langkawi asing untuk memberitahu Pendaftar jika syarikat itu terhenti mempunyai suatu tempat perniagaan atau menjalankan perniagaan di Langkawi.

113. *Fasal 99* memberi kuasa kepada Pendaftar untuk melantik seorang pelikuidasi untuk suatu syarikat Langkawi asing yang berada dalam likuidasi atau dibubarkan dalam tempat perbadanannya atau tempat asalnya dan juga memperuntukkan bagi kewajipan dan tanggungjawab pelikuidasi itu.

114. *Fasal 100* mengadakan peruntukan mengenai pendaftaran nama syarikat Langkawi asing.

115. *Fasal 101* memperuntukkan bahawa Pendaftar boleh sebagaimana dalam hal keadaan yang disifatkan perlu menghendaki suatu syarikat Langkawi asing untuk menyerahkan kepada Pendaftar suatu penyata berkenaan dengan syarikat itu bagi suatu tahun kalendar tertentu.

BAHAGIAN IX

116. Bahagian IX bertujuan untuk memperuntukkan berkenaan dengan suatu entiti pengurusan.

117. *Fasal 102* memberi Menteri kuasa untuk memberikan kuasa kepada mana-mana perbadanan untuk menjadi suatu entiti pengurusan bagi maksud bertindak bagi pihak suatu syarikat Langkawi atau syarikat Langkawi asing.

118. *Fasal 103* memperkatakan keadaan yang mana apa-apa pemberikuasaan di *baw&h fasal 102* boleh dibatalkan oleh Menteri.

BAHAGIAN X

119. Bahagian X bertujuan untuk memperuntukkan mengenai perkarapelbagai.

120. *Fasal 104* memperuntukkan mengenai pemakaian peruntukan Bahagian VIII dan X Akta Syarikat 1965 dan Kaedah-Kaedah Syarikat (Penggulungan) 1972 bagi penerimaan dan penggulungan suatu syarikat Langkawi.

121. *Fasal 105* menyatakan peruntukan berkenaan dengan penyampaian mana-mana dokumen ke atas suatu syarikat Langkawi.

122. *Fasal 106* membolehkan suatu syarikat Langkawi untuk memindahkan pemerbadanannya ke negara atau bidang kuasa yang lain yang undang-undang negara atau bidang kuasa itu membenarkan pemindahan sedemikian, apabila diluluskan oleh Pendaftar.

123. *Fasal 107* dan *108* memperuntukkan mengenai kos berkenaan dengan apa-apa prosiding di hadapan mahkamah dan pembayaran jaminan untuk kos sedemikian.

124. *Fasal 109* memperkatakan pelupusan oleh suatu syarikat Langkawi syer seorang pemegang syer yang tempat di mana dia berada tidak dapat ditentukan oleh syarikat itu.

125. *Fasal 770* mengadakan peruntukan yang memberi Mahkamah kuasa untuk member! relief, dalam hal keadaan yang dinyatakan, kepada mana-mana pegawai atau juruaudit suatu syarikat Langkawi, mana-mana pakar dan orang termasuk seorang penerima dan pengurus atau pelikuidasi suatu syarikat Langkawi, sama ada sepenuhnya atau sebahagiannya daripada liabiliti dalam mana-mana prosiding untuk kecuiaan, keingkaran, kemungkiran kewajipan atau pecah amanah.
126. *Fasal 111* memperuntukkan bahawa suatu peninggalan, kesilapan, luar aturan atau kekurangan mengenai notis atau masa tidak akan menjadi tidak sah apa-apa prosiding, termasuk suatu mesyuarat syarikat Langkawi, melainkan jika Mahkamah berpendapat bahawa ketidakadilan substansial telah disebabkan.
127. *Fasal 112* menghendaki bahawa semua dokumen, akaun dan rekod lain yang tidak disediakan dalam bahasa kebangsaan atau bahasa Inggeris dan yang dikehendaki diserahkan kepada Pendaftar hendaklah disertakan dengan terjemahan yang diperakui bagi dokumen, akaun atau rekod lain itu dalam bahasa kebangsaan atau bahasa Inggeris.
128. *Fasal 113* melarang pembayaran dividen oleh suatu syarikat Langkawi kecuali daripada keuntungannya.
129. *Fasal 114* melarang seseorang yang menjalankan perniagaan di Langkawi, selain suatu syarikat Langkawi, syarikat Langkawi asing, syarikat tempatan atau syarikat yang tidak diperbadankan, daripada menggunakan suatu nama atau jawatan yang mengandungi perkataan tertentu yang dinyatakan dalam *Fasal* itu.
130. *Fasal 115* mengandungi peruntukan yang menyatakan suatu penalti am bagi kesalahan yang dilakukan di bawah Akta ini dan tidak ada penalti khas diperuntukkan dengan nyata.
131. *Fasal 116* mengandungi peruntukan yang memperkatakan penalti ingkar.
132. *Fasal 117* memperuntukkan bahawa suatu pendakwaan di bawah Akta ini hanya boleh dimulakan oleh atau dengan keizinan bertulis Pendakwa Raya.
133. *Fasal 118* memperuntukkan mengenai pengkompaunan kesalahan.
134. *Fasal 119* memberi kuasa kepada Pendaftar untuk menentukan tatacara yang sesuai bagi apa-apa perkara di bawah Akta ini yang tidak ada tatacara yang dinyatakan oleh Akta ini atau peraturan-peraturan.
135. *Fasal 120* memberi kuasa kepada Menteri untuk membuat peraturan-peraturan bagi maksud menjalankan atau memberi kesan kepada peruntukan Akta ini.
136. *Fasal 121* memberi kuasa kepada Menteri untuk mengeluarkan suatu arahan Menteri untuk melarang pemerbadanan permulaan suatu syarikat Langkawi, pendaftaran permulaan suatu syarikat Langkawi asing, atau mengarahkan suatu syarikat Langkawi yang sedia ada untuk terhenti pengendaliannya.

137. *Fasal 122* mengandungi peruntukan mengenai kerahsiaan prosiding, selain prosiding jenayah, terhadap suatu syarikat Langkawi, atau apa-apa rayuan daripada prosiding itu. *Fasal* ini juga memperuntukkan bahawa ia adalah suatu kesalahan untuk mendedahkan apa-apa maklumat yang berhubungan dengan pemegangan syer, pemilikan benefisial syer, dan pengurusan atau perkara lain suatu syarikat Langkawi.

138. *Fasal 123* memberi kuasa kepada Menteri, atas syor Pendaftar, untuk mengecualikan mana-mana syarikat Langkawi atau syarikat Langkawi asing, atau mana-mana orang atau kelas orang atau kelas syarikat Langkawi atau syarikat Langkawi asing daripada mana-mana peruntukan Akta ini.

139. *Fasal 124* memperuntukkan bagi pembayaran fi tahunan suatu syarikat Langkawi pada tarikh pembayaran fi tahunan itu, dan membolehkan Pendaftar membatalkan nama sesuatu syarikat Langkawi daripada daftar jika syarikat sedemikian tidak membayar fi tahunan atau apa-apa penalti dalam berkenaan dengan fi sedemikian dalam masa yang dinyatakan.

140. *Fasal 125* memperuntukkan bahawa sesuatu syarikat Langkawi akan terus bertanggungjawab terhadap semua fi dan penalti yang kena dibayar di bawah Akta ini walaupun nama syarikat Langkawi itu telah dibatalkan daripada daftar, dan bahawa apa-apa fi dan penalti itu hendaklah diberi keutamaan daripada semua tuntutan lain terhadap aset suatu syarikat Langkawi.

141. *Fasal 126* memperuntukkan bahawa Pendaftar boleh enggan mengambil apa-apa tindakan yang dikehendaki olehnya di bawah Akta yang mana suatu fi ditetapkan sehingga semua fi itu telah dibayar.

142. *Fasal 727* menyatakan akibat pembatalan nama sesuatu syarikat Langkawi.

IMPLIKASI KEWANGAN

Rang Undang-Undang ini akan melibatkan Kerajaan dalam perbelanjaan wang tambahan yang amaunnya tidak dapat ditentukan pada masa ini.

[PN(U²)2407]